

TUBA EVANGELICA EXERCITIA

EX COMMISSIONE EMMI CARDINALIS ARCHIE-
PISCOPI TOLETANI COMITIS DE THEBA ,
ALIORUMQUE ANTISTITUM IN REGNIS ARA-
GONIÆ , ET VALENTIÆ IUSSU AD
ECCLESIASTICOS HABITA ,

Quibus Dei gratia uberrimos novæ conversationis
fructus in Clero peperit.

Auctore, et Predicatore

FRANCISCO ALBA

PRESBYTERO QUONDAM IN HISPANIARUM REGNIS
MISSIONARIO

*Hispanica lingua predicavit ; sed ut universo
Clero hac Exercitia prodesse queant ,
latino idiomate hoc opus ipse
composuit .*



Superiorum Facultate
ANNO DOMINI 1778.

А. А. ОФИЦИАЛЪ

В. А. ОФИЦИАЛЪ
ОФИЦИАЛЪ



ОФИЦИАЛЪ
ОФИЦИАЛЪ

EVULGATOR AD LECTOREM.

AUCTOR hujus operis anno 1770. nonnulla manuscripta mittenda curavit ad me in Galliæ Provinciam, ut ea imprimerem. Novissime autem misit ad me hunc librum Exercitiorum, necnon & alium cui titulus: *Scientia animæ*. De tribus operantibus in anima Deo scilicet, diabolo, & natura, liquido demonstrans quando, & quomodo operetur Deus in nobis, quando, & quomodo diabolus, quando, & quomodo natura, tam in via ordinaria spiritus, quam extraordinaria ita ut sine ulla illusione omnis interna operatio innotescat. Hos duos libros usque modo non potui imprimere propter gravia infortunia, quæ domus mea passa est. Nunc vero cum docti viri, quibus hos libros tradidi, dixerint mihi esse utilissimos, & necessarios in Ecclesia, do operam impressioni. Accipe ergo hunc primum, & dabo operam, ut quamprimum habeas mysticum. Vale.

DOMINO MEO
JESU CHRISTO
ET HUIC CRUCIFIXO.

Quid, o mi JESU dulcissime, ti-
bi retribuam pro omnibus, quæ re-
tribuisti mihi? Subsecuta est me mi-
sericordia tua omnibus diebus vitæ
mee.

* iij

vi
mea. *Quas ergo reddam vices? In me quid bonum non habitat, ut tui dignum quid promere possim: inops enim, & pauper sum ego innumerus indoluitus ærumnis, & homo natus de muliere repletus multis miseriis. Absit a me hæc nequam spiritus efferata præsumptio, ut ex me quasi ex me quid bonum tibi offerre cogitem. Si quid hoc in volumine bonum, a te est tamquam a fonte, a quo omne datum optimum, & omne donum perfectum: non a me, qui natura fui filius iræ, sicut & cæteri. Accipe ergo quod tuum est, atque propter ipsius cultum virtutis ne, precor, respicias miseram conditionem tua tibi humiliter offerentis. Ignosce, o bone JESU, præsumptioni meæ, quia, cum sim peccator a vulva, loquor de justitia. Quid scit, aut quem potest de justitia movere sermonem, qui bibit quasi aquam iniquitatem? Sed quia optime novi. Te numquam confundere peccatores in te humiliter confidentes, atque tibi admodum displicere timidos, & pusillanimes, in tuo sancto nomine roboratus fiducia*
lo-

loquar, quæ intus in corde documenta dictasti pro tua gloria. Tu scis, Domine, quoniam non novi literaturam, neque anima mea aliam præter te solum habuit scientiam. Academicos non audiui. Eruditos non colui, sed te solum in Crucis Cathedra Magistrum habui. Igitur quidquid hoc in volumine bonum est, tu mihi in corde posuisti, & scribo: atque idipsum in simplicitate cordis mei consecrat anima mea Nomini Sancto tuo. Accipe, quæso: & ne dedigneris sinceram suscipere voluntatem miseri peccatoris, quam reverenter offert puer iste tuus in obsequium debitæ servitutis.

EPISTOLA

Ad TAUROLENSEM, & DERTUSANUM
CLERUM.

FRANCISCUS omnium minimus volentibus in Christo pie vivere Fratribus salutem. Vos scitis a prima die, qua de Reverendissimorum Episcoporum mandato optatæ solitudinis quietem reliqui, & hæc Exercitia vobis prædicaturus adveni, quanto amore & studio contenderim, quanto sudore laborem, ut sicut decet, & præcipue exigitur a Dignitate, stabiliretur in Clero novitas vitæ. Per id tempus spirante turbine de lateribus Aquilonis loquentem pacifica projecit ventus in altitudinem maris, atque arguentem in porta deglutivit, ut Jonam, cete marina bestia. Sed quia de vobis sollicitus, adhuc propter vestram salutem, in quantum fas est, non recuso laborem. Unde amore vestri hunc Librum Domino adspirante composui. Et
quia.

quia omnibus debitor sum, latino
idiomate illum conflagavi, ut omni-
bus prodesse possit. Conatus eo ten-
dit, ut quiescant, qui male agunt,
agere perverse, & convertamus gy-
rum indomitæ libertatis ad modum
debitæ conversationis, ut si forte
humiliantes animas nostras habea-
mus accessum, & amoveat a no-
bis Dominus plagas suas. Etenim
propter peccata nostra dura inve-
nerunt nos multa mala. Optime
nostis, quæ, & quanta sustineamus:
& nos Altaris Ministri causa su-
mus. Idcirco hunc Librum compo-
sui, ut in nos reversi per lamenta
veniamus ad viam salutis, & quie-
scat desuper ira percutientis. Ac-
cipite ergo bonum, quod accepi a
Domino, ut sitis sancti, sicut de-
cet Ministros Christi. Rogo vos in
Domino, ut, cum ad Altare ste-
teritis, hujus miseri peccatoris me-
moriam faciatis. In Christo valete.

*Hic Liber revisus est, approbatus,
& laudatus a Reverendissimo M.
Theologo Pænitentiario SS. P. N.
Pii VI. ut patet ex Censur. dat.
mense Octob. anno 1777.*

EXERCITIORUM

NORMA PRÆFIGITUR.

ET si divina gratia utpote principalis operatrix, ipsa est, quæ his in Exercitiis opimos retulit fructus, mirandasque fecit dexteræ Excelsi mutationes, tamen loci opportunitas, rerum dispositio, & horarum distributio admodum juvit, & plurimum profuit. Electus est ergo Sanctuarii locus in solitudine ab omni hominum perturbantione sequestratus, quicentum vel octoginta saltem Sacerdotes capere posset, ubi per novem dies omnino clausi, singuli singulis cubiculis attributi, unusquisque sedebat solitarius sine confabulatione alterius. Prima & præcipua observantia silentii custodia erat ita, ut nemo non solum salutationis verbum dicere præsumeret, sed neque pedum calceamenta per terram traheret. Unde ad profundum silentium tenendum constitutum est, ut, cum quid causæ rationalis egredi de cubiculo Sacerdotem compulisset tacitis plantis per claustra incederet. Hoc silentium si quis violabat, monitione præmissa ad alios novem Exercitiorum dies cum venturis Ecclesiasticis sustinendos ab Episcopo cogebatur. Commendabatur debito cum rigore silentii custodia, quia, ubi silentium non est,

A

re-

relaxatio potius, quam cordis ædificatio speranda est. Non æstimet homo ille, qui silentium non servat, quod in via spiritus quid proficiat: nam sicut per *Isaiam* dicitur: *in silentio, & spe erit fortitudo vestra: & alibi: opus justitiæ pax: cultus justitiæ silentium.* Cor enim per os, dum loquitur, facile dissipatur, & animi robur amittitur. Quare habitâ seria præmonitione, & accedente Episcopi auctoritate silentium eo exactè observatum est, ut cum in loco illo tot commemorarentur Sacerdotes, vix ullus ibi habitare videretur.

Prima Exercitiorum die convenientibus cunctis, qui de Episcopi mandato vocati erant, in ipso noctis accessu ad campanulæ sonitum incipiebat Exercitium, & quidem in hunc modum: descendentibus in Ecclesiam, atque in medio ejus hinc inde ordinate ante Altare genuflexis, Prædicator in medio eorum itidem genuflexus incipiebat hymnum *Veni, Creator Spiritus*, quo alternatim dicto cum versu, & oratione *Deus, qui corda fidelium*, per dimidiam horam orationem faciebat cunctis audientibus non cessans loqui adversus semetipsum in conspectu Dei. Hujusmodi orationem bis faciebat in die, & quia in affectibus tota consistit, ex ea miros effectus experientia docuit. Finita oratione, quæ, ut dixi, per mediam horam fiebat, & ad campanulæ sonitum terminatâ, unusquisque in cubiculum suum se recipiebat habitam orationem conferens in corde suo

suo. Deinde collato signo descendebant omnes in Refectorium. Sumpto alimento, quod semper opportuna lectio committabatur, conveniebant omnes per ordinem dicentes psalmum ad Ecclesiam, ubi *Salve Regina* cum oratione cantantes gratias terminabant. His expletis media ad animi explicamentum hora concedebatur, in qua summissa voce confabulantes eam recreationem ad invicem accipiebant, quæ non solum sensibilibus mulceret, sed etiam spiritualiter ædificaret, deponere iussi ritus exaltationem, stultiloquium, & scurrilitatem memores illius B. P. Ambrosii: *verbum Sacerdotis, aut est verum, aut sacrilegum*: ex his duobus unum. Mediâ horâ completâ ad campanulæ sonitum ad pristinum revertebantur silentium: atque unusquisque in suum se recipiens cubiculum quieti usque ad præfinitum tempus vacabat.

Ad ortum surgentis auroræ Prædicator per claustra jaculatoria carmina intonans a somno dormientes excitabat, ut se parerent ad orationem. Non multo post dato signo conveniebant ad Ecclesiam ad integram orationis horam, quâ expletâ usque ad horam diei septimam sibi ad invicem ministrantes celebrabant. Hora septima Prædicator orationem faciebat, ut supra: quâ peractâ ii, qui non celebraverunt, sacrum faciebant: qui vero Sacrum jam fecerant, spirituali lectiōi in cubiculo operam dabant. Peracta Missarum celebratione ad campanulæ signum omnes in Ecclesiam

A ij

descen-

descendebant, ubi Prædicator mediam orationis horam faciebat ut supra dictum est. Post orationem recitabantur horæ minores: quibus finitis ad campanulæ sonitum conveniebant ad prandium. Post prandium, & mediam honestæ confabulationis horam unusquisque in cubiculo suo quieti & silentio vacabat. Hora secunda post meridiem ad campanulæ sonitum evigilantes ad Ecclesiam conveniebant, ubi Vesperas, & Completorium recitabant. Post Completorium Rosarium. Post Rosarium iterum revertentur in cubiculum mediam insumentes horam in examinando conscientiam. Deinde collato signo ad Ecclesiam convenientes Matutinum cum laudibus recitabant: quibus persolutis in cubiculum secedebant. Post modicum temporis horâ quinta descendebant in Ecclesiam ad audiendum sermonem, in quo Prædicator horam cum dimidia, vel circiter duas horas insumere solebat. Audito sermone unusquisque in cubiculum suum se recipiebat, audita ruminans. Hora septima in Ecclesiam properantes unum ex Presbyteris spirituales librum per mediam horam legentem audiebant: atque statim post lectionem mentalis per mediam horam fiebat oratio, unusquisque prout ei dictabat Spiritus Domini. Expleta oratione accedebant ad Coenaculum, atque omnibus sicut in præcedente nocte peractis, exercitii dies implebatur ita, ut per totum Novenarium nihil temporis fuerit otiosum, sed totum tempus spiritualiter occup-


cupatum, a nullo sæculi implicamento, nulla epistolarum vicissitudine impeditum. Tribus diebus in Novenario servabatur jejunium, & corporis flagellatio in nocte habebatur.

Quantum hæc exercitia operante divina gratia contulerint, haud facile dici potest. Quot conversiones, quot vitæ novitates nemo ad exprimendum, sufficiet. Finito exercitiorum Novenario, transactisque septem, vel octo diebus ab Episcopo, qui præsens esse solebat, ad Prædicatoris levamen constitutis, ad aliud Novenarium conveniebant totidem Sacerdotes, donec omnes diœcesani Ecclesiastici hæc Exercitia sustinuissent.

PRIMA DIE

IN NOCTE.

*Oratio a Predicatore habita in medio
Presbyterorum .*

ua fronte Omnipotentem, qui
Coelorum continet altitudi-
nem, qui lucem inhabitat in-
accessibilem, ad cujus intuitum
abyssi profunda commoven-
tur, & Coelorum cardines concutiuntur,
ego omnium vilissima creatura, cui nulla
est æquitas, & omnis dominatur iniquitas,
adire præsumo, & non potius super fa-
ciem corruo præ timore, præ tremore,
præ verecundia indutus sicut diploide con-
fusione mea? Quomodo non toto corpo-
re, & animo contremisco ante faciem Dei,
cum etiam ante tremendam illam Altissimi
Majestatem tremente curventur genu, qui
portant orbem, & duabus alis faciem ve-
lantia adorent Cherubim quoque ac Se-
raphim viventem in sæcula? Quomodo
non expavesco, cum illi trementes ado-
rent, qui omnino nescierunt peccati le-
gem, & ego tremulus non adoro, qui
bibō quasi aquam iniquitatem? O me mil-
lies miserum, dum coram Omnipotente
adhuc inflexa cervice ausus sum oculos
in Coelum levare, & non potius sedere
in pulvere accinctus sacco, & caput con-
sper-

spersus cinere. Ne mihi, quæso, Domine,
 temeritati attribuas, neque contra me ira-
 scaris, dum rediens ad cor prosternor re-
 tro secus pedes tuos, & converto adver-
 sum me sermones meos. Si, quia suavis
 es universis, complacuisti sustinere pec-
 cantem, noli a facie tua proiicere poeniten-
 tem. Dimitte me ut plangam paululum
 dolorem meum secus pedes tuos; ante-
 quam contenebrescat, & offendant pedes
 mei ad montes caliginosos. Si tu me re-
 pellis, quo ibo, ad quem confugiam? O!
 retrahit me a facie tua verecundia mea, &
 vultu rubore suffuso precandi non habet
 audaciam, qui quondam non erubuit tuam
 irritare iustitiam. Terrent me funestæ ima-
 gines peccatorum: conturbant me torren-
 tes iniquitatum, & constringit cor meum
 timor ab ira tua, quia peccavi nimis in
 vita mea. Contremiscente corde præ ini-
 quitatum multitudine tanquam undosis
 abyssi vorticibus immersum me reputo,
 & non alium me existimo, dum respiro
 communem aerem, nisi ficulneam aren-
 tem iuxta viam destinatam ad ignem, seu
 lignum minans casum ad aquilonem. Id-
 circo tenent me angustiae in conflictu ama-
 ritudinis, & possident me dolores sicut
 dolores parturientis. Quid mihi superest
 (heu me miserum!) nisi illius infausa fors
 qui proiciens post tergum suum sermo-
 nes tuos solummodo peccare didicit, &
 bonum facere penitus ignoravit? Væ mi-
 hi! ambulavi vias difficiles: lassatus sum
 a via iniquitatis: aberravi a semita recti-
 tudinis in circuitu sicut impii, ambulans
 per

per anfractum miseræ perditionis. Effusa
per sensus, raptata per motus, dissoluta
per appetitus erravit anima mea, tanquam
filia vaga: dumque distentus per sæculi
voluptates, & corruptæ carnis delicias
studui pascere concupiscentias, heu! ci-
sternas mihi feci, cisternas dissipatas, quæ
continere non valent aquas. Inhærens
insensatorum more prætereunti sæculo,
mundum commutavi pro Paradiso, atque
errans tanquam transgressor ex utero pe-
pigi foedus cum morte, & pactum cum
inferno. Odivi disciplinam, repuli scien-
tiam, sectatus sum suspirioso anhelitu de-
lirantis mundi figuram, atque prima futi-
lium rerum specie delusus non aliter vi-
tam traxi, ac si tuum Evangelium esset
aliqua fabula pœtarum vel simplex narra-
tiuncula, quod promittitur in futurum:
Conversatus sum, quandiu vixi, non ali-
ter ac si in me non esset illa activæ indif-
ferentiæ libertas, quo naturæ privilegio
congaudet omnis anima rationalis, sed so-
la inferioris portionis innata concupiscen-
tia sequens per omnia sine legis camo, si-
ne rationis fræno animales motus, sicut
equus, & mulus, quibus non est intelle-
ctus. Unde cum irritationabiles malesua-
dæ carnis illecebras sim sequutus, atque
exlegem vitam traduxerim cum Christia-
næ professionis injuria, cum rationis con-
tumelia, interiorisque domus deploranda
ruina, merito dicendus homo non sum,
sed potius bestia, vel homo phantasma. O
me nimium infelicem! ne irascaris, Do-
mine, si loquar coram te, cum sim pars lu-
di.

ti pessima, indignus hujus Solis gratiâ, & merito dignus, qui caream sepulturâ. Dimitte me, ut confitear adversum me injustitiam meam tibi: si forsitan motus misericordia remittas propter gloriam Nominis tui impietatem peccati mei. Ecce, Domine, quem de limo terræ formasti: ecce quem pretioso sanguine redemisti, amissâ pietatis formâ, laxatâque Christiani pudoris habenâ contra te, cui debet incarnationis, & passionis excessus, recalcitravit ingratus: atque eo tempore graviores multiplicavit offensas, quo a te susceperat copiosiores misericordias. Idcirco tota die verecundia mea contra me est, quia filii Dei similitudinem perdiidi, cum concupiscentiarum voragine conssepultus fræna laxavi, & adinstar impii justitiæ viam perosi, facies peccatorum sumpsi. Quid faciam, miser? quoniam contenebratum est cor meum & omnino a me recessit lumen oculorum; quâ invalescente miseriâ non video vel mala, quæ tolero, vel bona, quæ perdo. Quid faciam, quoniam infixus sum in limo profundi, & non est substantia, vel potestas resurgendi? Hei mihi! relicta est mens mea denso passionum fumo obscurata, tenebroso concupiscentiarum turbine confusa ita, ut foedata rationalis compositi pulchritudine, totaque interioris mei ablata compositione deposita sit vehementer anima mea a facie iniquitatis quasi in loco horroris, & vastæ solitudinis. Effecta est interior domus mea quam decet sanctitudo, quasi spelunca hyænæ in deserto: in ea enim conversâ rationali mas-

sa

ſa inverſa judicandi formâ, perverſa acrius
 a peccandi conſuetudine carnis potentiâ,
 mordaciusque inſtigatâ naturâ factum eſt
 cor meum patens ſepulchrum, quod um-
 bra funeſtæ mortis miſerabiliter occupat,
 & tetricæ conſuſionis barathrum, ubi nul-
 lus ordo, ſed inextricabilis horror inha-
 bitat. Heu! heu! quis dabit capiti meo
 aquam, & plorabo die æ nocte recog-
 itans pro peccato reclusus in caverna ter-
 ræ quati nycticorax in domicilio! Vitam
 meam, quæ reſidua eſt, agerem in dolo-
 ribus, & annos meos in gemitibus, atque
 fugiens hominum conturbationes in vaſta
 eremo requieſcerem adinſtar Regum, &
 Conſulum terræ, qui ædificant ſibi ſoli-
 tudines. O quis mihi tribuat auditorem,
 & deſiderium meum audiat Omnipotens!
 Peccavi Domine, peccavi in Cœlum, &
 coram te: dignus quidem pro merito, ut
 aures obtures huic miſero, & opponas
 nubem tibi, ne tranſeat oratio. Dignum
 quippe eſt ut, qui te toties noluit audire
 vocantem, dorſum, & non faciem oſten-
 das ei ingrati renuens audire clamo-
 rem. Ego ego, ipſe ſum, qui rece-
 des à patre, atque privatæ innixus pru-
 dentię rationalis ſubſtantię portionem diſ-
 ſipavi cum meritricibus, dum ultro con-
 fundens turbulento paſſionum tumultu
 rationales potentias ſine timore futuri re-
 ſpexi in vanitates, & infanias falſas. Ego
 ipſe ſum, qui in longinquam carnis, & ſan-
 guinis regionem a totius Bonitatis centro
 proſectus, pavi porcos, dum complevi
 admodum turpiter appetitus ſequens ope-
 riſco

roso cordis hiatu irrequietæ carnis impulsus. Cumque totum me tibi, sicut totum te mihi tradere addictius deberem ob sublimem Ministerii rationem, & tanti dignitatem officii, cum in honore essem, non intellexi, sed insipientium jumentorum naturam referens deterior evasi. Clamo ad te, Domine: suspiro in Cœlum deducens ab oculis flumina lacrymarum, si forte sit spes inveniendi misericordiæ solatium, qui mittit in sidera vivo cum dolore lamentum....

Predicator ad campanula signum statim cessavit ab oratione.

DIE SECUNDA

Oratio prima in mane.



Ei mihi, Domine! quia tribulatio, & angustia invenerunt me. Amisso clavo, contrario vento, sine fidere, sine velis veni in altitudinem maris. Demersit me afflictionum oceanus: & circumdederunt me mala, quorum non est numerus! Propterea impleti sunt lumbi mei dolore, & angustia possidet me sicut angustia parturientis. In peccatorum cœnum prolapsus vitam traho difficilem imitans in præruptis ovem errantem, atque sub noctis horrore palrans sicut cœci parietem. Tentatus a propria con-

concupiscentia effusus sum sicut aqua,
 atque divinæ Legis excusso jugo mancipari complacuit infami carnis servitio. Idcirco prohibiti sunt Coeli, ne pluant super terram, & ecce facta est anima mea sicut terra sine aqua tibi. O quis mihi tribuat tacitos habitare secessus, ubi ab omni prorsus conturbatione semotus incessantes in Cœlum mitterem voces, gemitus, suspiria, singultus, donec audirem a te, cujus voluntas privari non potest ingenitâ misericordiâ: dimissâ sunt tibi peccata multa! Quis det, ut, quod expecto tribuat mihi Deus! Timor mortis conturbat me, quoniam in profundum me deprimunt torrentes iniquitatum, quæ numerum superantes supergressæ sunt caput meum, & nulla est sanitas in carne mea, nec pax ossibus meis a facie peccatorum meorum. Innumeris ab infanzia jacens sordibus involutus per omnia complevi indomitos propriæ voluntatis affectus, atque factus quasi columba seducta non habens cor abii, post mundalium rerum species utpote qui pascit ventos, & sequitur aves volantes. Desipui, Domine, desipui: insipienter egi, dum temulentus a vino de calice Babylonis repuli obsequim debitæ servitutis, & conversatus sum toto affectu in medio domus Magnæ Meretricis. Te provocantem me, sicut aquila pullos suos, audire contemnens obfirmavi vultum meum adiciens ad peccandum: neque a cordis mei mali pravitate detriti, donec de abyssò, in abyssum festino pede descendens ven-

B ne-

nerim in profundum. Fornicata cum amatoribus multis anima mea instabilis facta est aberrans in invio, & non in via per montes superbiæ, per valles avaritiæ, per prata luxuriæ, & non est recordata finis sui. O me miserum! odio prosequens justitiæ semitam ambulavi per viam non bonam: cumque effuderim animum per carnis desideria, & sæculi voluptates, factus sum in hac die super faciem terræ, sicut qui descendens de Jerico incidit in latrones. Neque ita malum vulnera accepisse, ac vulnere dolore non sentire: nam qui sentit doloris puncturam, ipse dolor compellit eum quærere medicinam: qui vero omnino caret doloris stimulo, non curat sollicitus vivere de remedio. Sic ego (hei mihi!) inordinatos affectus quos admisi, animæ meæ hostes ignoravi, quia a passionum caligine judicandi conversâ formâ arbitratus sum amatores, & hostes esse nescivi; idcirco inflicta vulnera non sensi. Nunc autem cum annos meos tibi recogito, & sedens in pulvere cogito pro peccato meo, video, quod per omnes juncturas a planta pedis usque ad verticem capitis non sit in corde meo sanitas, sed ossium putredo, vulnus & livor, & plaga tumens, quæ neque est circumligata, nec curata medicamine, nec fota oleo. Neque spes mihi ulla est præter miserrimæ mortis ærumnam, nisi forsitan misericordiâ motus ille Samaritanus vino lavet, oleo urgat, & vulnera ligare complaceat. Lætatus sum usque modo de semita iniqui-

quitatis, & exultavi, sicut impius, in rebus pessimis: nunc autem subeunte tristissimâ peccatorum imagine militans contra me suspiriosi conscientiae terrores de offensa iustitia, & formido, & pavor de morte secunda: quapropter anima mea turbata est valde, & cor meum conturbatum est intra me. O quale iudicium! Iudicabit in æquitate, & iustitiâ, qui intuetur abyssi profunda, & scrutatur renes, & corda. Iudicabitur homo, qui iniquitatem secum portavit ab utero. Quod si Angeli prævaricantes inventi sunt animo revolventes cogitationes iniquas, quanto magis hi, qui habitant domos luteas? Propterea anxiatum est cor meum, & ossa mea pavore contremiscunt. Igitur si unusquisque secundum opera sua iudicandus, quæ est expectatio mea in futurum, cum opera mea mala exuperent maris arenas, quæ præ multitudine numerari non possunt? Quid si opera mea interrogas, formidare non debeo, cum iustus te interrogante non poterit respondere unum pro mille? Hei mihi! si ficulnea, quia ficus non habebat, maledicta est a Domino, & continuo aruit, quid agendum de ficulnea, quæ fructum bonum facere nescivit, imò quæ in circulo temporum protulit ficus malas, malas valde, quæ comedi non possunt? Væ mihi! ego ego illa infructuosa ficulnea sine virore pietatis, sine fructu operis, sine affectu virtutis, & sine succo devotionis. Arbor solitaria plantata in terra deserta, invia, & in-

quosa. In terra deserta, quia recedente
 gratia propter peccata mea dura, & oc-
 cupante cor meum passionum diluvio
 relictus sum tanquam lignum aridum in
 eremo; dejecto animo erga spiritualia,
 irrequieto cordis pruritu erga terrena:
 mundana enim, & carnalia me rapiunt;
 coelestia in fastidio sunt. Vigor, & fer-
 vor in ambiendo gloriam filiae miseræ
 Babylonis: tepor, & torpor ad opera
 charitatis. Ad sæculi vanitates festinus
 accurro, sicut equus impetu vadens ad
 proelium: ad ea autem, quæ Dei sunt,
 ac si traherer ad supplicium. Displicet
 mihi silentium; placet stultiloquium. Cu-
 biculum desero ab oratione removens
 animum; & quietis impatiens quæro tu-
 multum. Odio prosequor ibi esse, ubi
 tristitia est. Sed ibi esse desiderat ani-
 ma mea, ubi tuba, & tibia, cytharâ,
 & lyra, voces, & organa. In somnis
 mihi sollicitudo erga ea, quæ transeunt
 tanquam nubes ventis validis agitata.
 Segnis incuria erga ea, quæ nobis pro-
 mittuntur in Coelis post statuta tempo-
 ra. Unde factum est cor meum in fasti-
 dio contabescens, indocile, insensibile,
 volubile, sine halitu charitatis, sine af-
 fectu virtutis incerto gyro ambulans in
 terra invia via perditionis, via inaquosa
 sine lacrymarum salutarî pluvia, terra
 arida non habente irriguum superius,
 neque irriguum inferius, cor vanum,
 cor durum, cor lapideum. Heu heu! si,
 quemadmodum scriptum est, cor durum
 habebit male in novissimo, quid timere
 non

non debeo, qui non cor, sed pro corde filicem habeo! Idcirco quia præteriri non possunt, quæ scripta leguntur, & venit hora, ut qui in monumentis sunt, rursus circumdati pelle resurgant in ictu oculi, in novissima tuba, totum me tremor occupat de terribili aspectu districti judicis, & extimesco, ne forsitan sortem sortiar superventuræ calamitatis. Hodie quia caligante intellectus oculo a denso passionum fumo futura non video, comedo, dormio, exulto atque in Fortis armati pace conquiesco. Sed o! quid cum irruerit repentina calamitas, & interitus quasi tempestas ingruerit? quid, cum me inexorabiliter occupet funestæ mortis hora tremenda, & super me compleatur rerum ultima linea? Quæ patiantur, qui moriuntur, nescio, quia nullus remansit, ut referat, neque mihi narravit aliquis de sepulchro. Hoc solummodo scio ab ipsa edoctus natura, quoniam justa est dies mortis, & adesse festinant tempora. Terribilia dicta sunt de mortis hora formidanda. Sed o quantum differt notitia ab experientia! Idcirco mortis agonem numquam, sicut oportuit, formidavi: quia mortis periculum numquam feci: tantummodo sola mortis vexatio intellectum dabit auditui. Igitur vociferabor ad te, Domine, qui amas animas; laborabo in gemitumeo: de medio petrarum dabo voces: neque die, ac nocte cessabo a clamore, & a flumine lacrymarum, donec raucae fiant fauces meæ, & attenuentur oculi mei:

suspicientes in excelsum. Ne me perdas illa die, Domine, neque occupet inopem, & compunctum corde dies illa magna, & amara valde. Protegat me tuæ potentia virtutis ab umbra mortis, & a facie tempestatis.

Oratio secunda ante meridiem.

EXi a me, Domine, quia homo peccator sum. Quæ pars luci ad tenebras? Tu candor æternæ lucis: ego autem nigredo carbonis. Tu essentialiter mundus: ego naturaliter sordidus. Tu Bonitas: ego iniquitas. Tu Veritas: ego vanitas. Tu Claritas: ego obscuritas. Igitur exi a me, Domine. Quod si exire nolueris, quia tibi naturale est facere misericordiam, pronus corruam in faciem meam non ausus respicere in Majestatem tuam; indignus quippe est, ut divinæ Lucis conspectui præsentetur, qui in tenebris, & in umbra mortis commoratur. Corruo præ verecundiâ, atque ad hanc rem stupefco mirabilem quomodo talem, ac tantum super se sustineat terra peccatorem. Ego, ego, Domine, qui fregi jugum, qui rupi vincula, qui solvi fœdera, qui currere renui viam mandatorum tuorum, & effudi cor meum per vias iniquitatum. Juravi, & statui in baptismo renunciare Satana, & omnibus operibus ejus, consepultum cum Christo vivere, & custodire judicia justitiæ tuæ. Sed hei mihi misero, quia mentitus sum tibi in corde meo! nondum enim in me
vige-

vigebat proxima rationis potentia, & jam jam in occurſu carnalium voluptatum dereliqui mandata tua. Si videbam ſuperbum, currebam cum eo volens cunctis in faſtu, & pompâ præcedere, atque in tumore ſpiritus ſuperare: cumque ſim pulvis, & cinis, putredo, & vermis, ipſa nullitas, & univerſa vanitas, de conſpicio genere reſpiro ſuperbiam, de ingenio jaſtantiam, & de nihilo vanam gloriam. Quæro honoris locum ultra meritum: ambio Præfecturas, & Dignitates ultra propriæ facultatis vires ad omnia idoneum me reputans & cæteros inhabiles, indignos, atque inutiles arbitrans, contendo cum pertinacia, atque non ſine proximi injuria pugno pro mei cerebri deſenſanda ſententia, volens, ut ab omnibus retineatur tanquam axioma, & ſola prævaleat ſuper ſeptem Sapientum dicta. Ab omnibus volo laudari, atque aliorum præconiis in ſidera ferri. Quod ſi os alienum me non extollat laudis eloquio, meipſum laudibus effero. Si quis mecum agat, quo vel parum lædatur propria excellentia, ſtatim cor tumens rapitur iracundiâ: levem enim contemptum æquo animo tolerare non poſſum. O me infelicem! ſuperbum vidi, & pari via ſimul cum ſuperbo cucurri. Si quidem ſimili modo, ſi detrahentem audiebam detrahebam cum eo. Sedens adverſus fratrem, ſicut ſerpens in ſilentio, mordebam in occulto: cumque injungerer iis, quos captivat otioſitas, & in unum

con-

congregat ipsa ipsorum perversitas, ut loquantur injustitias, nulli pepercit linguæ meæ viperina mordacitas. Egrediens namque quasi leo de spelunca sua circumcursabam vias, vicos, & plateas, ut fratrum defectus audirem, & aliorum vitia considerare. Factus scrutator actionum Civitatis compita circuibam, atque penetrans domos, & ad ea, quæ geruntur, habens mentem intentam omnes hominum gressus dinumerabam. Canina sciendi fame correptus in omnibus populi conventiculis frequens eram, ubi, sicut novacula acuta, fraternæ dilectionis fœdera dissipans proximorum vitia, lapsus, vel defectus, quos videram, vel audieram, sine prudentiæ camo, atque sine modestiæ frœno narrabam. Defectus autem addere, vel supponere familiare fuit. Detrahentis amore proximo, cujus gesta prorsus ignorabam, mordaciter detrahebam: atque ne amico, vel diviti detrahenti displicerem, vel gestu, vel risu, vel annuens oculis murmurabam. Quis tutus a lingua mea? Malis detraxi, quia mali: & bonos itidem linguâ momordi, quia boni: nam, cum in his nihil mali potuerit meus nequam oculus invenire, curabam saltem honestas eorum actiones in pravum convertere. O me miserum! quot, & quanta mala intulit in medio christianæ plebis hujus mordax lingua peccatoris! Læsi proximi famam, obscuravi opinionem honestam, amicitias dissolvi, discordias diffeminavi, animos ad odium, malas voluntates, & ri-

xas accendi, quid plura? homo pestilens
 lingua fratrum turbans unionem, & dis-
 sipans Civitatem. Et utinam mala, quæ
 perpetravi, in superbia, & detractio-
 nem haberent, & ultra non venirent!
 Sed hei mihi! quia non solum cum su-
 perbo superbus, cum vano vanus, &
 cum linguoso linguosus, sed etiam cum
 immundo immundus sequutus sum cor-
 ruptæ carnis affectus. Libidinoso oculo,
 & insatiabili inhiabam videre foeminas
 circumornatas ut similitudo Templi, equa-
 rum visu calore concepto, irrequietus
 æstuabam pro consumando peccato. In-
 de quot turpia, quot amatoria carmina,
 quot equivoca verba? Tu scis, Domine,
 qui intueris abyssi profunda, quantas ha-
 beam iniquitates, quanta scelera, & pec-
 cata. Sed quod magis cor meum dolore
 contorquet, non est animum luxuriâ
 scœdasse, sed aperuisse in re libidinis ocu-
 los innocentis, & docuisse multos in via
 perditionis. Væ mihi! quid expedit, ni-
 si ut suspendatur mola asinaria in collo
 meo, & demergar in profundum maris?
 Quæ poena ei, qui non solum animam
 suam demersit in profundum, sed etiam
 scandalo perdidit animam cæterorum!
 Propterea cor meum comprimitur in an-
 gustia; atque timore orribili concutitur
 anima mea. In cunctis deliqui: in cun-
 ctis offendi: si quid boni feci, intentione,
 vel modo corrupti. Quid ergo fiet
 in novissimo de hoc nequam servo, qui
 prorsus est meritis destitutus, & pecca-
 tis oneratus? Quid me manet (o miser!)
 post

post tanta, & tam multa crimina? vel Dei misericordia, vel ignis æterni poena. Absit hæc a me, Domine; absit, ut opus manuum tuarum despicias in æternum: quia non poterit anima mea confiteri in tenebris mirabilia tua, si descenderit in abyssum. O Domine, ne me, precor, fluvius absorbeat iræ furoris tui. Si parvam ignis scintillam ad momentum sustinere non possum, quin subito exiliam ab igne cutim comburente, quomodo sine fine totus habitare potero cum igne devorante? Si iusta rogam diu manere nequeo ob exuberantiam caloris, quomodo sustinere potero, si (quod absit) involvi contingat cum ardoribus sempiternis? Insanio, & temeritatis fræneticâ passione laboro, dum ita enerviter vivo ac si futura inventa forent a proprio cerebro, vel nebulonum ficta mendacio. Quotidie corruo: incessanter pecco: sed neque de lapsu resurgo, neque de culpa poeniteo: imo potius neglecto poenitentiae tempore thesaurizo mihi iram in die iræ tuæ. Quid faciam, heu miser! quid faciam? Undique me torrentes sine cessatione conturbant. Si in Coelum aspiciam te judicem video dicentem: non exies inde, usque dum reddas novissimum quadrantem. Si sub pedibus, video quoniam urget super me puteus os suum, ut forte vivum deglutiat in profundum, & similis efficiar descendentibus in lacum. Si ad dexteram, si ad lævam aspiciam, accusatores video a latere meo mille, & decem millia a dextris meis dicen-

dicentes: euge, euge: viderunt oculi nostri. Devorabimus. Si post tergum, a peccatis impulsus everfus sum, ut cadam in irreparabilis miseriæ foveam, in inferni sepulchrum, ubi nullus ordo, sed sempiternus horror, vermis, qui non moritur, ignis qui non estinguitur, & fletus, & stridor dentium. Si ante faciem aspiciam, perurgentem video funestæ mortis horam tremendam, & aperientem, ut me devoret, sua viscera sepulturam. O me miserum! undique tenent me angustiae. Coarctor a timore valido, & quo me vertam, penitus ignoro. Propterea dum cursum peragit rota nativitatis, in via bibo de torrente amaritudinis, atque diebus, quibus nunc milito, manduco panem doloris. Recedant omnes a me: omnes me solum relinquant: nec ullus sit, qui me consoletur super terram. In tacita domus latibula penetrabo, & ibi quandiu vixero, ad pedes tuos amare flebo. A planctu non quiescam, a gemitu non desistam. Espugnabo lacrymis Coelum, atque donec veniat super me tua misericordia, sicut pullus hirundinis sic clamabo, meditabor ut columba. Non dimittam te, Domine: etiam si occideris me sperabo in te: quia si apud me innumera criminum multitudo, tamen apud te est misericordia, & copiosa apud te redemptio.

SER-

S E R M O I.

HORA QUINTA IN VESPERE.

Non vos me elegistis, sed ego elegi vos.

Joann. c. 15. v. 16.

Ignoscite mihi, dilectissimi Fratres, ignoscite mihi: arrogantis animi, præsumptio esse videtur, cum sim quidem moralis ignorantiae abyssus multa, velle per os meum Dei assumere testimonia. Quis sum ego, aut cujus scientiæ, aut virtutis, ut ad erudiendos Doctores ascendam cathedram veritatis? Puer, qui neque novi literaturam, neque didici, sicut oportet, scientiam. Elati cordis audacia profesto est scientiam non habere, & magisterii locum assumere. Sed audaciam assumptis excusat auctoritas imperantis. Vere etenim, si daretur optio, libentius solitudinem repetens quiescerem in tugurio factus quasi passer solitarius in tecto: & hæc esset occupatio miseri peccatoris exequi vacans lacrymis opera poenitentis. Potius inquam, sederem solitarius, & tacerem, atque in silentio, & spe portionem meam ponerem, quam vellem tumultus repetere populorum, ubi interioris atrium difficile custoditur, & cor a figura, quæ in mundo geritur facile rapitur. Elongare fugiens potius eligerem, quam iterum sustinere delirantis sæculi confusionem. Sed quia ex
obe-

obedientia loquár, loquar ex animo offerens obedientiæ victimam Domino. Aperiam os meum non in persuasibilibus humanæ sapientiæ verbis, non in altisonantium vocum patula pompa, sed in virtute sinceri sermonis, & spiritu veritatis. Igitur loquar in nomine Domini.

Nihil est, quod magis me terreat, Fratres charissimi, nihil, quod magis cordi meo incutiat formidinem, quam de digno ad tam sublimem, tamque divinam Dignitatem accessu habere sermonem. Est quidem Sacerdotalis dignitas mons terribilis, cujus fastigium propter fumum inde egredientem nostrorum oculorum superat facultatem. Unde hac de re tractatum texere velle præsumptio est. Igitur dicere sufficiat, quod sacerdotes intrinsecâ ratione Dignitatis montes dicantur in Scripturis. Dii nihilominus, non homines, appellantur, quia absolventi potestate, quæ solius Dei est, & potestas dicitur Excellentiae, participativè funguntur. Etiam vocantur Angeli ratione officii: eos siquidem Sacrae paginae Angelos appellant, quia in Evangelio laborant, & Dei voluntatem gentium populis nunciant. Præterea quemadmodum Christus Dominus inter Deum, & homines mediator est, ita inter Christum & homines mediatores sunt, sicut dicit Jacobus: (1) *infirmatur quis in vobis? inducat Presbyteros Ecclesiae, & orent super eum*. Quapropter secundum manifestam Scripturarum phrasim Sacerdotes homines

C

VO-

(1) Cap. 5.

vocari non debent: illi namque, qui Sacerdotes homines vocant, eis utique gravem inferunt injuriam; quia, etli naturâ homines, tamen Excellentiae gratiâ hominum nomenclaturam amittunt dum elevantur, atque in ipsa mirifica elevatione Deorum naturam sortiuntur. In hujus mirandæ sortis natura corrui illa Philosophi sententia, quæ dicit *Supremum infimi non attingit infimum Supremi*: nam supremum infimi, qui in Ecclesiastica Hierarchia Sacerdotes dicuntur, attingit infimum supremi, qui sunt Angeli. Unde in veteri Testamento Angeli a Patriarchis, & Prophetis adorari patiebantur. Attamen in Lege gratiæ a Sacerdotibus adorari non patiuntur, ut Joannes testatur dicens (1) *& cecidi ante pedes ejus, ut adorarem eum: & dixit mihi vide, ne feceris: conservus tuus sum, & fratrum tuorum. Deum adora*: Optime nostis (doctos enim vos arbitror in Scripturis) quot, & quantis figurarum peniculis delineata fuerit in Lege Veteri tremenda Dignitas Sacerdotalis; ut inde per tropos, live per umbratilium figurarum significantiam intelligeremus, in quantum capere possumus, tantæ Dignitatis Excellentiam, cujus potestas, quia suprema, neque parem habet neque superiorem; & quia divina, omnino excedit loquendi facultatem. Nostis (o mira dignatio! O stupenda Sapientiæ & Scientiæ Dei infallibilis dispositio!) quia neque Cherubim, neque Seraphim, neque Thro-

(1) Apoc. cap. 19.

Throni, neque Virtutes, sed neque septem, qui adstant ante Dominum *hoc facite in meam commemorationem* audire meruerunt. Utuntur Angeli cibo invisibili, qui panis dicitur Angelorum: sed cum reverâ sint excellentioris naturæ, tamen consecrandi Corpus, & Sanguinem Christi omnino carent potestate. Sunt Angeli potentes virtute facientes verbum illius: incessante rotatu Cœlos movent, in sensibilibus regiam potestatem exercent, & tamen immutandi species panis, & vini potestatem non habent. Nos soli naturâ fragiles, infirmi, lutea vasa portantes, miseri peccatores Mysterium conficimus, quod neque conficere possunt supernæ Virtutes, neque Dominationes, neque Cœlorum Potestates. O Admirabile divinæ Sapientiæ consilium! Quoties hæc mecum serio recogito, & tantæ Dignitatis naturam mente pertracto, toties expavesco, & toto corpore contremisco. Quid est homo, Domine, ut talem, ac tantum honorem conferres, atque multo altius ab Angelis potestatis excellentiâ decorares? Nonne plasmatus de pulvere, natus de muliere filius iræ, & circumdatus infirmitate? Nonne de eo tactus dolore cordis intrinsecus olim dixeras: *pœnit me fecisse hominem*? Nonne sensus & cogitatio humani cordis in malum prona est ab adolescentia sua? Quare ergo ita magnificas eum sublimem ei conferens potestatem super Virtutes Cœlorum? Quare erigis de stercore pauperem, &

suscitas de pulvere ægenum dans ei divinæ operationis esse Ministrum? Sufficeret ad ostensionem excellentissimæ charitatis, qua diligit filios hominum Pater ille Cœlestis, servos facere divinæ mensæ participes, & non Mysteriorum operantes. Sed quia ejus charitas nimia est, placuit ei filios hominum facere participes, atque ex ipsis filiis hominum assumere Sacerdotes. Et ideo Angelos non elegit, sed homines ministros initiare complacuit, quia clarior in homine infirmo, quam in Angelo, resplendet gloria suæ Majestatis, mirabilior ostenditur virga divinæ virtutis, atque manifestius exprimitur munificentia Salvatoris. Benedictus Deus, qui ita magnificavit gloriam suam in gentibus, & dedit talem potestatem hominibus. O fratres mei charissimi! si talis potestas nobis a Domino, qualis nostra debet esse confusio, qualis timor, tremor, & pavor de tantæ dignitatis excellentia, & de vera electionis causa? Quanto terrore, quanto consilio, & prudentiâ hanc rem considerare oportet, dum legimus, quoniam neque Abraham, de quo dicit ipse Dominus: *Abraham amicus meus*: neque Moyse, de quo idem ipse ait: (1) *Moyse fidelissimus servus in domo mea*: sed neque Præcursori, qua nullus major inter natos mulierum, consecrandi, vel absolvendi commisit officium. Non ergo quisquam sibi assumit Presbyteratus honorem, nisi qui vocatur a Domino tanquam Aaron. Vocavit ad se Dominus,

quos

(1) Numer. c. 12.

quos voluit ipse. Neque aliunde tota fit ratio electionis, nisi secundum propositum suæ divinæ voluntatis. Unde spuria electio oritur a motu proprio: vera autem omnino independens est a libero hominis arbitrio. Numquid omnes Presbyteri, qui sunt in Ecclesia Dei, vocati sive electi credendi sunt? Absit: multi enim vocati non sunt, sed seipsos ingesserunt: de quibus dicit Dominus: (1) *ipsi regnaverunt, sed non ex me. Ego non vocavi eos.* Et alibi: (2) *quæ nolui, elegistis: propterea servi mei comedent, & vos exuriatis: servi mei bibent, & vos sitietis.* Utinam plures non essent incompetenter intrusi, quam a Domino vocati; quorum damnatio non probabilis, sed certa est: nam deficiente vocationis gratiâ, quæ nulli conceditur, nisi iis, qui a Domino eliguntur ad Presbyteratum, suscepti muneris partes explere non possunt, imo fascinatâ in agendo rationis potentiâ omnia eis cooperantur in malum. Igitur hi omnes, qui non Dei nutu, sed propriæ voluntatis motu seipsos ingerunt, infallibiliter pereunt: nam sicut in scriptura legitur (3) *qui a via erraverit, in cætu gigantum commorabitur: & alibi: omnis plantatio quam non plantavit Pater meus Cælestis eradicabitur.* Matt. 15. v. 13.

Nihil ergo, fratres mei dilectissimi, magis extimescendum, nihil magis formidandum, quam a via legitimæ voca-

C 3

tio-

(1) Osee c. 8. v. 4.

(2) Isaïæ, c. 55. v. 13.

(3) Prov. c. 21.

tionis errare: nam a vocationis errore horror procedit incompositæ vitæ, turbulentusque terror perturbatæ conscientiæ. Transversâ vocationis semitâ funesta fors miseræ perditionis accessoria est. Non dabit aberrans, etsi in tempore germinaverit radices altas: imo miserabiliter concidet, & arescet, quia radicem non habet. Non prosperabitur in via salutis, qui erraverit a semita vocationis: sed evanescent sicut lanugo omnes conceptiones suæ, & multiplicabuntur in eo ruinae. Cum his, qui temere se intromittere gestiunt, loquitur illa Sacrae Scripturae pertinens sententia: *homo qui non est de genere Aaron, & accesserit, occidetur*: quibus in verbis Spiritualis occisio iis qui a via vocationis aberrant, figuratim intimatur. Unde error a via vocationis certa mors est, & perditio errantis. Infallibile autem erroris argumentum vita deformis. Vocati sunt a Domino ii, qui puro intuitu ad suum respicientes profectum, & salutem animarum laudabiliter implent Presbyteratus officium servientes Domino in sanctitate, & iustitia coram ipso omnibus diebus suis. Amant secessus, fugiunt tumultus: abiectâ omnium terrenarum rerum curâ, & sæculari negotio assidui sunt in lectionis, & orationis cubiculo; neque facile apparent in conspectu populi, nisi rationabili necessitate compulsi: cumque contingit eis incedere per Civitatem, graves, & circumspicere gradientes, habitu, gestu & incessu cunctis afferunt venerationem. Qui autem

tem

tem erraverunt ab utero, & vocati non sunt a Domino hi sunt, qui intentionis acie palpitantes postquam Presbyteratum obtinuerunt, rem sacram agunt perfunctorie, atque odio habentes jugem disciplinam, Laicorum more sequuntur delyrantis mundi figuram. Solliciti quærent ea, quæ gentes inquirunt: habentes alimenta, & quibus tegantur, numquam implentur: pro pinguiori stipendio, vel beneficio infatigabiliter sudant, atque pro ascendendo ad altiora gentiliter agonizant. Neglecto orationis cubiculo, atque sacramentorum literarum studio tota die, ac nocte vagantur per domos foeminarum, vel per thecas mercatorum conferentes successus, & causas præliorum, vel novitates de conclavi Principum animum mendaciis pascentes, vel quod frequentius est, de omni hominum genere murmurantes. A concupiscentiarum spiritu, qui in mundo est, sub speciosa quadam honesta opinione traducti facile despicunt ea, quæ ad Sacerdotale pertinent Ministerium: sicque corde dissipati, & non compuncti neque curam gerunt suarum animarum, neque cæterorum. Ecce vocati, & non vocati, fratres mei. Ecce granum, & palea. Nunc autem levate oculos, considerate Clericos, & videte quam innumera intrusorum copia sit in Ecclesia. *Electi mei*, ait Dominus, *laborabunt, & non deficient*: quos autem non vocavi, exurient, & fame contabescunt. Igitur ille Presbyter, qui non simplici oculo, sed alicujus intimæ rei respectu,

ut

ut fieret Presbyter, impetravit, & postquam Presbyteratus sibi assumpsit honorem, neglectâ cordis custodiâ & orationis instantiâ incumbit super caduca, & spiritualium fastidio affectus versatur circa terrena, atque parum distans a laicis Inhæret sæculo vitam ducens alienam ab instituto, vocatus non est a Domino sed indubitanter a diabolo. O! O quam innumera Presbyterorum turba, & multitudo copiosa in Ecclesia Dei, qui neque vocati, neque introducti, dum seiplos ingerunt, semetipsos miserabiliter in inferna demergunt: quorum gressus, luxurians habitus, corporum cultus, conversandi modus, indisciplinatus rerum appetitus, atque irrequietus affectus in conveniendo ad mundi theatrum de illegitima vocatione perhibent testimonium. O quam multi, dum Presbyteratum assumunt, sælicem sortem invenisse se credunt, sed animarum suarum inveniunt irreparabile præcipitium! Primam rerum speciem solummodo considerantes, neque ponentes in præcordiis, ut oratione assiduâ pariter & devotâ ediscant quæ sit voluntas Dei beneplacens, & perfecta, temerario ausu, & animi levitate rapiuntur, ut officium assumant, cuius onus etiam Angeli suscipere formidant. Inconsiderati, incircumspecti, sine consilio, proprio innitentes cerebro, vel avaritiæ morbo correpti, vel ambitionis spiritu miserabiliter occupati in suis se extollunt cogitationibus adinstar antiqui latronis, qui ambulans in magnis, atque in mi-

rabilibus super se dixit in spiritu cordis arrogantiâ elati *sedebo in monte testamenti*. [1] Unde accidit ut opere perficientes temeræ præsumptionis impulsus ascendant usque ad Cœlos, & descendant usque ad abyssos. Quæ te causa compulit, dic, Clerice, dic, Sacerdos, ut acciperes locum Ministerii hujus? Sancté vivere, & pauperibus evangelizare? Compulit te Dei cultus, an carnis spiritus, vel cupiditatis affectus? Quis te vocavit ad Presbyteratus officium? quis te introduxit in tremendum Altissimi Tabernaculum? Non Dei, sed propria voluntas, cujus argumentum vitæ libertas. Sponsa ausa non est Regis intrare cubiculum, donec ab ipso Rege introducta est, & tu neque vocatus, neque introductus in Regis cubiculum intrare præsumis? Tu, quin prius REX virgam auream contra te extendat, in Regis atrium introire non vereris? Superbia cordis tui extulit te, ut Ministerium eligeres, cujus pondus tuas longè superat facultates. Idcirco ait ad te Dominus: (2) *expellam te de Statione tua, & de Ministerio tuo deponam te*. In furore meo tuam conteram arrogantiam: non enim habitabit in medio domus meæ, qui facit superbiam. O Ecclesiæ Dei miseranda calamitas perpetuis potius deflenda lacrimis, quam digna sermonis! Nihil calamitosius, (3) fratres mei, in Ecclesia Jesu Christi, quam ad Sacerdota-

le

(1) Isaïæ.

(2) Isaïæ c. 22. v. 19.

(3) In quodam Concilio.

le Ministerium accedere sine vocatione : ex eo namque provenit efferata in Clero morum insolentia , vita scandalosa cum funesta fidelium ruina rerum visibilium fames avara , Sacrorum incuria , scrupulosus zelus pro sola dignitate tuenda , parum , vel nihil pro Dei gloria . Non aliunde mala , quæ patitur Mater Ecclesia , nisi ab illegittima multorum vocatione causantur , dum in eligendo Ministerium iudicium prudentiæ suæ quadam animi temeritate sequuntur . Proprio innixus cerebro dicit iste : fieri Presbyter volo ; dicit ille : Sacerdotium suscipere proposui in animo : atque hæc sola idea sufficit , ut protinus satisfaciant , si fieri potest , propriæ voluntatis studio . Dignitatem arripiunt , cuius onera nesciunt . Non invigilant , ut examinent motiones internas : sed tota eligendi ratio propria voluntas ; atque eo devenit præceps multorum facilitas ut non aliter eligant Presbyteratum , ac si eligerent sutoris , vel sartoris officium . Quid miserabilius in Ecclesia Dei ? Idcirco tam multi sunt hodie inutiles arbores , autumnales sine fructu , liberius laicis inhærentes sæculo , terram occupantes in otio , nihil proficientes exemplo , sed populum trucidantes scandalo , depravatam habentes animam , Clerici in tanti nominis contumeliam , atque in Ecclesiæ dedecus , & sacri ordinis ignominiam . O turpem temporum notam ! In tempore illo Sancti homines omni virtutum genere celebrari , & sanctitate famosi , cum ad Sacer-

cerdotium quærentur, in secretoria vastæ solitudinis nemora penetrantes, in speluncis, in cavernis terræ, in petrae foraminibus latitabant, inter quos Ammonius (1), qui cum de mandato Episcopi quæsitus inventus fuisset in solitudine, tentantibus inquisitoribus illum trahere per violentiam, de marsupio eduxit novaculam, & sibi abscidit auriculam dicens: revertimini ad Dominum vestrum, & dicite, quia irregularis sum, & ideo Sacris initiari non possum. Cumque illi reversi Ammonii factum Episcopo retulissent, adducite, inquit, illum ad me: hæc enim lex apud sinagogam, non apud Ecclesiam, quæ potius, quam corporis perfectionem, quærit in ministris morum sanctitatem. Illi iterum Episcopi jussa complentes, cum Ammonium secum trahere niterentur, Ammonius forficem de sinu educens ait illis: videte, quia si trahere me contenditis per violentiam, subito præcido linguam. Tunc funestum effectum formidantes relicto eo reversi sunt. Aiebat Ammonius: tanti ministerii pondus suscipere, eorum est qui præfulgent sanctitate: & tamen gloriari non debent quasi immunes a periculo. Illud ergo Sancti suscipiant: ego autem bene me cognosco; idcirco tantum onus humeris meis imponere recuso. Non minus poterat multorum compescere petulantiam in aggrediendo tantæ dignitatis excellentiam mira Nilaamonis historia, cujus memoria celebratur in Eccle-

(1) In Vitis Patrum de clericatus honore fugiendo.

clesia (1). Is Sacerdotale fugiens officium inter quatuor parietum angustias incognitus latuit. Sed cum demum fuisset inventus, & vi traheretur, ut susciperet Presbyteratum, in ipso itinere quo trahebatur invitus, oravit ad Dominum dicens: Domine, longe impar sum ad tantum onus assumendum: precor Bonitatem tuam, ut prius quam perveniam suscipere Sacerdotium, suscipere digneris spiritum meum. Hæc cum dixisset, ipso in itinere animam exhalavit. Qua ergo fronte hac in nostra misera tempestate homines, qui sancti non sunt, imo qui ulla sine verecundia laxatâ Christiani pudoris habenâ exlegem vitam egerunt thura adolentes idolis pravarum cupiditatum assumere non verentur Presbyteratus officium? Quomodo ausi sunt Sacerdotale suscipere Ministerium qui Angelicam vitam non tenuere in deserto solitudinis, sed vitam vixere paganam in medio Babylonis? Sancti tanti oneris Dignitatem accipere formidarunt, & homines sæculo dediti virtutibus destituti, carnalibus passionibus occupati in ambiendo tantæ Dignitatis officium nullum in animo patiuntur scrupulum? Arrogantis animi præsumptio est. Temeritas est. Superbia est. Quis non deducat quasi torrentem lachrymas contemplanis miseram nostri temporis horam, qua homines justitiæ semitas ignorantes, sed tantummodo terrena sapientes inverecundâ facie, ex propria satisfactione pro
im-

(1) In Martyrol. Rom. Mense Januar.

impetranda re caninâ fame agonizant, quam sancti homines, Dei totis viribus suscipere recusabant. Olim Sancti, qui verbo, & exemplo Ecclesiæ Dei utiles esse poterant, Sacerdotale pondus fugiebant: hodie vero indisciplinati juvenes, qui Dei populo esse non possunt, nisi offendiculo, non dormiunt Civitatem circumeuntes, Episcopalis Aulæ favorem captantes a manu, a linguâ, ab obsequio animos sollicitantes, & ut ita dicam, pedibus, & manibus repentes gravissimo non parcent labori, ut si quomodo partem habere queant in patrimonio Crucifixi. Utinam mendacium potius loquerer: plures sunt, fratres mei, qui in atria Sanctuarii ingrediuntur Simoniaci, quam legitimè promoti. Quis est, qui in ipso interiori motu, & studio promovendi ad Presbyteratum puro oculo tanquam in terminativum obiectum divinum respicit cultum, suum simul spirituales profectum, & salutem animarum? Habes pauca nomina in Sardis. Omnes quæ sua sunt quæerunt non quæ Jesu Christi (1) *O quanti homines infelices ad Sacros Ordines accedunt non cælestem panem quærentes sed terrenum: non Spiritum, sed lucrum.* Suspirioso rapiuntur anhelitu ad Presbyteratum, ut ab Ecclesia proventus percipiant, ut tuto victum habeant, ut nepotes extollant, ut cum commoditate, atque ullo sine labore vitam vivant, ut liberius vitiis indulgeant, ut de gradu in gradum ad dignitatum culmen ascendant. Ecce quæ

D

& qua-

(1) S. Bonaventura.

& qualis sit plurimorum intentio, fratres mei: quorum oculus cum sit nequam in eligendo Presbyteratum, quid inde, nisi totum opus eorum tenebrosus?

Duas genas habet intentio, sicut legitur in Canticis (1) *quam pulchra sunt genae tuae*: quarum altera hæc est scilicet *quid intendis?* Altera, *propter quid intendis?* In cunctis, ait Philosophus, *principalitas stat in intentione agentis*; ipsa quidem dat actui speciem, naturam, & nomen. Igitur fieri Presbyter optas? Bonum opus desideras: oportet enim Presbyterum Sanctum esse, quia Sanctum super altare offert pro humano genere Sacrificium. Oportet nihilominus scientiâ, & doctrinâ præditum: ipse namque est Presbyter in populo Dei, & ex ipso pendent animæ cœterorum. Sed propter quid intendis assumere Presbyteratum? ut crescas in sanctimonia: & infatigabili animarum zelo labores in vinea, an ut servili sine labore possideas redditus in abundantia? Intra, intra in tui cordis cubile secretum, exentera intentionem tuam, & mihi dicito veritatem: traxit te ad Sacerdotium amor salutis tuæ, veritas, scientia, & doctrina, an alicujus temporalis lucri concupiscentia? O quis mihi det in vasta eremo breve tugurium, ubi per residuum vitæ fugacis in fletu, & gemitu solus sederem. similis factus pellicano solitudinis! Oportet potius amarè flere, quam prædicare. Dignius arbitrator trahere ab imo corde lamentum, quam

(1) S. Bernardus sup. cant.

quam de innumerabilium misera perditione conflare tractatum. Innumeris scattet Ecclesia latronibus, fratres mei, qui non intrantes per osium simplicis intentionis, ascenderunt aliunde per fenestras suæ cupiditatis. Ad ea, quæ spiritus Dei sunt, non intenderunt animum, sed temporalia rapuerunt oculos eorum. Parentes etiam filios adhuc matris ubera lambentes designant Sacerdotes; hunc, inquiunt, filium destinamus ad militiam, ut si forte possit faustam tentare fortunam: illum ad matrimonium ad prolem nostri generis propagandam: illum autem reservamus ad Ecclesiam causâ honoris, & gratiâ utilitatis, ut habeamus, qui nos adjuvare possit in tempore senectutis, & non desit nobis baculus, neque virga, cum defecerit virtus nostra. Quid aliud Parentes faciunt, nisi Dei prævenire consilium? Quid aliud quærunt, nisi sibi ipsis temporale solatium, & animabus filiorum interminabile detrimentum? Non est amor Patris erga filium, sed amor proprius erga lucrum. Sunt præterea juvenes, qui de sua vocatione prorsus incerti vivunt ad quælibet amplectenda parati; si prius offerri contingat utile matrimonium, statim uxorem ducunt. Si prius habere possint pinguem canonicatum, ad Sacros Ordines statim accedunt. Si autem Officialis militiæ titulum, statim animum ad arma convertunt. Quid hoc est, nisi Deum despicere, futura contemnere, & sola terrena desiderare? Pro his sudant, hæc sola habere sollicitant, qui in

occurſu avaritiæ ſuæ animam æſtimant tanquam paleam. Unde accidit, ut ſacris initiati in ſectando gyros ambitionis, & avaritiæ vivant quaſi mare fervens, quod quieſcere non poteſt: quorum ruina ante oculos manifeſta eſt. Sunt nihilominus Presbyteri in populo Dei, quorum vocatio a Deo non fuit divinitus inſpirata, ſed a Mammona: potius enim vocati erant ad mercaturæ negotium, quam ad Presbyterale Miniſterium. Hi ſunt, qui animam poſt tergum proiicientes cum Dignitatis contumelia, & profeſſionis injuria turpiter recedunt a Sanctuario, atque Sacro valedicentes inſtituto ſuſpirioſo cordis anhelitu turpi incumbunt mercimonio. Emunt de bonis Eccleſiæ, ut vendant: vendunt, ut lucrifaciant: lucrifaciunt, ut in crumenâ reponant; reponunt, ut obcœcati a diabolo in noviffimo dierum demergantur in profundum. Paſcunt in villis oves, & boves, equos, & equas, porcos, & capras, atque deferentes cum infamia Sacerdotale officium ad nundinas accurrunt, in quibus ipſi per ſeres ſuas vendunt more negotiatorum. In diebus abundantiæ vinum, frumentum, vel oleum comparant, non ut in penuriæ tempore Parochianis diſtribuant, ſed ut reſervent, ut abſcondant eo peſſimo fine, ut in neceſſitatis anguſtia carius vendant. Quid turpius, quid iniquius, imo quid peſtilentius in Eccleſia, quam hujusmodi Clericorum ſacrilega avaritia? Quid dolore dignius quam do-

domum Dei fures sustinere rapaces, & Jesu-Christi Ecclesiam pati pessimos mercatores? Avertat Dominus propter suam misericordiam ab Ecclesia Sancta sua tales Clericos, qui a satana fascinati propter avaritiæ studium, locum Sanctum convertunt in telonium exercentes mercaturam in Ecclesiæ ignominiam, in sui detrimentum, atque in miseram stragem animarum. Horum vocatio motum non habuit a Dei gratia: sed potius vocavit eos omnium malorum scelerata radix avaritia. Nonnulli sunt insuper, qui, ut ipsa perhibet effrænata vitæ licentia, potius vocati erant ad matrimonium, quam ad offerendum Sacrificium. Hi sunt, qui phyloginiâ laborantes Clericatum ambiunt, ut mulieres licentius videant. (1) Omnis his cura de vestibus, ut eleganter incedant: digiti de annulis radiant: retortas gerunt sparsa fulligine comas: gradiuntur per medium populi ducentes cum arte plantas; strenuè compositi, mirificè culti circumcursant plateas imitantes comicas figuras, & obsequiosis motibus salutantes foeminas incumbentes ad fenestras. Hi sunt, qui dorsum vertentes Templo Dei, solemne habuerunt in medio mulierum commorari, eis adinstar tenerè amantium inservire, infertis brachiis palam deducere, atque ita erga eas amore, & obsequio trahuntur, ut non jam Clerici, sed potius mariti esse credantur. Utinam tam impia scandala abscindantur ab Ecclesia; neque patiantur

D 3

Deus

(1) S. Hieron. in Tract. de custodia virginis.

Deus pollui Sanctuarium a nefanda turpitudine Clericorum, sicut hodie non sine inconsolabili cordis lamento cernimus esse pollutum! Quis hos sceminarum clientes, quis hos mulierum amatores vocavit ad Presbyteratum? Non Deus, sed Asmodeus: non Dominus, sed malefuadæ carnis spiritus. . . .

O commiseranda Jesu-Christi Ecclesia quanto dolore, & compassione digna! In Ecclesiæ detrimentum hæc omnia geruntur. Neque soli initiati in ignis æterni pœnam abibunt, sed & hi, qui talibus hominibus Sacros Ordines conferunt. Debentur Ecclesiæ utiliores Ministri: sed hodie (proh dolor!) humanæ relationis nutu totum geritur, & Ecclesiæ utilitas non curatur. Informatio, potius dicam, testimonium, quod de vita, & moribus ad promotionem exigitur, vel tantummodo formularium est, vel in eo mala occultantur, vel bona finguntur. Unde hodie, ut quis promoveatur ad Clericatum, non quæritur spiritus, non requiritur scientia, non meritum, sed solummodo beneficium vel patrimonium. Abiit jam jam in oblivionem, & desuetudinem illud, quod scriptum est: *docti, ac spectata vita homines ad id officii munus deligantur* (1). Videmus namque quamplurimos ab adolescentia sua Parentum officia suscepisse: cumque aliam non didicerint scientiam, nisi vineas colere, & terram arare, contingente eis consanguinitatis capellania, statim ligonem, seu atramentum relin-

(1) Ex Decreto S. Zephyrini Papæ, & Marti

relinquunt, & cooptantur in numerum Clericorum. O tempora! sufficit, ut quis beneficium Ecclesiasticum habeat, ut Presbyter fiat: ac si sola, esset capellania, vel beneficium legitimæ vocationis argumentum. Unde idiotis, atque inutilibus plena est Ecclesia Dei: reperiuntur enim etiam latini sermonis ignari, qui dum recitant, neque quæ dicunt, intelligunt, sed neque Missæ Canonem capiunt. Et utinam in promovendis idiotis gradum sisteret Ecclesiæ miseranda calamitas, & non progrediretur ultra in promovendo ad Sacros Ordines homines vertiginosos, cyclopes, liberrimæ vitæ sequaces. Videmus multos (quorum sortem amare flemus) qui præcipitem fluxum sequentes indisciplinatæ juventutis, penetrant domos adamantes ardentissimo amore mulierculas oneratas peccatis. Ambulant in nocte armis accincti: cantantes ad cytharam veniunt de taberna in tabernam, atque laxantes fræna pudori in ebrietate, & lascivia pernoctant. Hi, si hæreditarium contingat accipere beneficium, statim non de cubiculo compunctionis, sed de domo turpitudinis veniunt in Episcopale Palatium, atque vel vi munerum, vel interventu nobilium, vel precibus amicorum hæc omnia mala dissimulantur, & ad Sacros Ordines promoventur ii revera, quibus potius debebatur damnatio ad triremes, quam promotio ad Ordines. Hinc est, quod, qui in juventute sua carnaliter conversati sunt, post susceptum Presbyteratum difficile as-

assueta relinquunt, sicut in Sacra legimus Scriptura: [1] *adolescens juxta viam suam etiam cum senuerit, non recedet ab ea: & liberius forsitan, quam cum laici, prolabuntur in vitia. Hinc est quod hodie hujusmodi Clericorum causâ in amaro conflictu constituta gemit Ecclesia sustinens in dolore Clericos sine conscientia, Ministros sine disciplina, & Sacerdotes in figura. Quare tot afflicta malis Mater Ecclesia? quare tot angustata pressuris? Quia dant Episcopi Sanctum canibus, & margaritas porcis* (2). Citò manum imponunt immemores illius, quod scriptum est: *qui ordinant indignos, eisdem subjacent pœnis, quibus hi, qui ordinati sunt: etsi dicant eorum vitia ignorasse.*

Nos autem fratres mei, qui jam Presbyteri sumus, nostram vocationem, & electionem attentè consideremus. Recogitemus animo, quis nos vocaverit, quis nos elegerit ad tantæ dignitatis officium: nam cum propositum a Deo non esse probetur, de periculo animæ agitur. Vocationes ergo discernere oportet: vocat enim Dominus: vocat mundus: vocat diabolus: & vocat carnis spiritus. Vocat Dominus, ut serviamus ei in cultu Tabernaculi coram frequentia populi: ut eamus, & fructum afferamus, & fructus nolter maneat. Vocat mundus ad vitæ superbiam, ad sæculi pompam, ad sectandam ejus figuram. Vocat diabolus ad avaritiam, ut Clerici, qui soli
sunt,

(1) Prov. 22. v. 6.

(2) S. Bernar. in epist. ad Innocent. Papam.

sunt, & hæredes non habent, de bonis Ecclesiæ adaugeant pecunias. Vocat carnis spiritus ad turpes illecebras. Unde facile, cujus sub castris quis militet, innotescet. Igitur unde scire possumus an a Deo vocati simus? si opera bona faciamus; ait enim Petrus: [1] *fratres magis satagite, ut per bona opera certam vestram vocationem, & electionem faciatis.* Sed si per bona opera certa fit, per mala opera incertam fieri non dubium est. Certa fit vocatio, & electio nostra, cum abjuratâ omni externâ occupatione, atque sæcularium consuetudine, solitudinem colimus; cum lectioni, orationi, & Sacrarum litterarum studio die, ac nocte vacamus; cum contenti his solummodò, quæ ad pauperem victum, & vulgarem vestitum Christiana prudentia necessaria judicat, omnia, quæ habemus, pauperibus erogamus; cum cubiculum, vel Ecclesiam, quæ quidem locus est, in quo debet orare Sacerdos, nisi rationabili necessitate compulsi, non relinquimus; deum cum verba vitæ populo prædicamus: Clericum, qui his bonis demoratur, & adusque in finem perseverat, a Domino vocatum, & electum certo constat. Fit incerta vocatio, cum dissipato corde sanctitatis locum deserimus; cum ad terrena negotia tractanda mentem inducimus; cum otiosorum coronas diligimus; cum sceminarum obsequiis operam damus; cum plus quam necessaria querimus; cum in verbi Dei prædicatione

ne

(1) Per. 2. cap. 1. v. 10.

negligentes sumus. Clericus, qui de interiori domo ædificanda nihil, vel parum cogitat, qui assiduæ meditationi non vacat, qui injunctum officii munus obire recusat, qui sæculi negotiis involvitur, atque laicorum more per visibilia vagatur, ab iis, qui a Deo vocati sunt, evidenter excluditur. Non est utique in Electorum consortio, qui negligenter se gerit in officio, atque relicto Sanctuario inhæret sæculo. Qui Christi sunt, carnem suam crucifixerunt cum vitiis, atque suum, ut oportet, implere miniterium. Qui vero Christi non sunt, hi sunt, qui secundum carnem ambulant & diligunt mundum: ipsi sunt filii Belial nescientes Dominum, neque Sacerdotale officium. Considerate ergo, fratres charissimi, quam magna Clericorum multitudo sit in Ecclesia, quorum vocatio spuria fuit, non legitima. Videtis Clericos, qui in tantum Ecclesiastica exercent officia, in quantum lucratoria; qui absoluto intra decem vel duodecim minuta tremendo Missæ Sacrificio, atque dicto solummodo in gratiarum actionem psalmo *Laudate Dominum omnes gentes, vel de profundis* in suffragium pro mortuis, statim, ulla sine mora recedunt ab Ecclesia; atque eleganter se componentes ad figuram, ut hominibus placeant, unusquisque ad ea peragenda accelerat, ubi thesaurizat: ille elephantico ambitionis morbo correptus totum extrahit diem in deosculando manus, donec tandem venire contingat ad illos honores, quos inordi-

natus desiderat appetitus. Ille avaritiæ febris miserabiliter æstuans connexiones quærit, opportunè, importunè adit, & nihil non tentat, ut pinguiores proventus obtineat. Sudat, die, ac nocte laborat, invigilat, atque in circuitu ambulat velut asinus ad molam, ut suam, si fieri potest, impleat avaritiam. Ille carnalium tractus amore diei, ac noctis infumit horas in visitando foeminas, quarum illecebræ colloquia ad carnis turpia faciunt, ut miser Clericus semper vivat exaltatâ concupiscentiâ. Ille laboris hostis infensus ad portas mercantium sedet otiosus, vel ut narret mendacia, vel ut audiat commenta, vel ut ab ore proferat inutilia. Omnes denique secundum sua desideria versantur; atque ubi est impetus spiritus eorum, illuc gradiuntur. Videmus plenas Clericis Civitatis plateas fora, compita, vias: in Ecclesiis verò solas Sanctorum Statuas. Quid hoc est, fratres mei, nisi quia omnes demptis paucis, qui vacant instituto, vocati non sunt a Domino, sed a spiritu qui dominatur in sæculo?

Igitur accincti sacco sedeamus in cinere, & cilicio plangentes Ecclesiæ mala, quæ patitur ab his, qui apud se non recte cogitantes dixerunt: *venite, hereditate possideamus Sanctuarium Dei*. Ploremus coram Domino: effundamus corda nostra coram illo humiliter deprecantes, ne nos, qui Sacerdotalis officii munere fungimur, intrusorum numero copulemur. Absit hoc a te, Domine, absit ut

a te nos repellas, ne Sacerdotio fungamur tibi, & in die superventuræ calamitatis portionem nostram ponas cum hypocritis. Conuentes super facies nostras Bonitatem tuam adoramus, atque ea, quæ injussum egimus, amare flentes, veniam exposcimus. Quod si concupiscentiæ nostræ aberrare fecerunt a semita debitæ conversationis, gratia tua nos reparaet ad opera charitatis. In misericordiarum tuarum abundantia transfer delicta nostra: atque, ut Sacerdotii partes, sicuti decet, explere possimus, confirma nos in virtute tua. Effunde desuper, Domine, mundam aquam: mitte de Sede sancta tua aspicere sapientiam, ut in vocatione, qua vocati sumus, dignè, sanctè, & piè, perseveremus ad illum diem, in quo recepto corpore in tuba novissima recipiamur in æterna Tabernacula, ubi vivis, & regnas per infinita sæcula. Amen.

DIE TERTIA

Oratio prima in mane.

Noli mihi irasci, Domine, si loquar ad te, cum sim pulvis, & cinis; neque repellar a te tanquam præsumptuosus, sive temerarius, si, cum sim putredo, & vermis, effundam in conspectu tuo loquelam gemitus. Anima in angustiis, & spiritus anxius clamat ad te:

te : ne, quæso, propter duritiem iniquitatis meæ in duritia manus tuæ adverteris mihi: neque, quia quondam aures averti a Lege tua, fiat execrabilis oratio mea: si enim usque modo erravi sicut ebrius proiciens post tergum sermones tuos, & consumens dies meos in vanitate, ecce ego ipse me reprehendo, & ago pœnitentiam in favilla, & cinere. Ne me, precor, in indignatione conteras. In iudicio, non in furore corde dejectum corripas, ne forte me ad nihilum redigas. Recordare, quia tu es, Domine, qui amas animas. Quod si formidandus criminum ultor, & Iudex severus, tamen peccatorum, & publicanorum amicus, qui verso in clementiam zelo iusti rigoris, illorum domos frequens intrabas, & manducabas cum illis. Memor esio hujus, Domine, & a me misera cratura iram tuam averte. Quis sum ego, ut torrentem iræ tuæ sustinere possim? Si parvam scintillam ferre non valeo, quomodo tonitrum magnitudinis tuæ portare potero? Ecce substantia mea tanquam nihilum ante te. Si quid sum, fumus sum deficiens, umbra fugiens, nubes evanescens, & vapor ad modicum parens. Ne ergo fluctus tuos inducas super me; neque ostendas potentiam tuam contra folium, quod vento rapitur, neque siccam persequaris stipulam, quæ a modico flatu facile tollitur. Transierunt dies mei sicut aquila volans ad mortua corpora, & sola relicta est contorquens cor meum nebulosa

E

con-

conscientia. Propterea possident me dies afflictionis ulla sine requie, atque dies mei sine solatio transeunt in amaritudine. Antequam comedam, suspiro; lancinat præcordia dolor, dum comedo, atque post captum cibum nescit cor anxium a solito cessare lamento. Quotidie lacrymæ, quotidie gemitus, atque utinam post afflictionum torrentem, quem pertransit anima mea, pars mea hæc esset ut doloris victima factus obirem nullum prorsus accipiens in mortalium terra solamen. Excruiat mea viscera peccatorum memoria, atque deposita vehementer anima sedet in tristitia exitum pertimescens in illa mortis hora tremenda: dumque mente revolvo, & animo repeto, quod ullo sine fræno vel timoris, vel amoris servire te fecerim in peccatis meis, nimio rubore suffusus vultu concido, atque apprehensivâ vi animum agitante rapior quasi deliquio. Contremiscunt ossa variarum cogitationum concussa tumultu, præsertim cum sciam quoniam peccator malè habebit in novissimo, atque virum injustum mala capient in interitu. Idcirco die, ac nocte rugio a gemitu cordis mei aquam bibens de torrente amaritudinis, & satians animam pane tribulationis. Irruit velut fortis armatus timor super me, si forte in die illa salvabitur anima mea. O me miserum! quid, si ire contingat in ignem æternum? Possibile est: & quidem facile: præsertim ego, qui a die, qua ex utero matris exivi, si quid boni feci, ignoranter, &

non

non volens feci. Facillimum profectò est mitti in stagnum ignis, qui sic cucurrit viam iniquitatis, donec appropinquaverit usque ad portas mortis. Factus est in toto corpore meo copiosus sudor præ timore, & admodum expavesco, dum hanc nimiam facilitatem a facie peccatorum meorum seriò considero. Assimilabor, Domine, descendantibus in lacum? Non aspiciam hominem ultra, nec habitatorem quietis, sed pars mea cum his, qui habitant in sepulchris? Portio mea non in terra viventium, sed in terra tenebrarum? Hei mihi! amissâ Patriâ in ignis æterni pœnam abibo, & Creatorem meum non videbo? Partem amittam gloriosæ sortis, & sequestrabor ab his, qui hæreditatem capiunt salutis? Melius erat mihi, si natus non fuisset, vel fuisset velut abortivum absconditum, vel sicut qui concepti non viderunt lucem. Cum hæc facile fieri posse corde recogito, in me non remanet fortitudo, sed & species mea immutatur in me, & emarcesco, nec habeo quidquam virium. Consternatus jaceo super faciem meam, atque præ nimio terrore vultus meus hæret terræ. Quid faciam, miser, vel quis est, qui protegat, si, quemadmodum facile est, in locum tormentorum abire contingat? Hei: hei mihi! si cognovissem & ego, & quidem in hac die mea, quæ ad pacem mihi: nunc autem abscondita sunt ab oculis meis. Nunc enim non inferis furorem tuum, nec ulcisceris scelus valde. Taces nunc, files, & patientia tua ma-

gna nimis. Sed cum venerit dies tua in
 insperato momento, excitaberis tanquam
 dormiens, tanquam potens crapulatus a
 vino, a fundamentis commovens pecca-
 torem in furore tuo. Nunc autem exul-
 tat peccator in desideriis animæ suæ: ni-
 hil ei accidit triste: sed cuncta ei eve-
 niunt prospera, & ullo absque futuri ter-
 rore glorificatur in vita jucunda. At ve-
 niet ei repentina dies, in qua turbabi-
 tur timore horribili, atque extemplo
 præoccupatus die mortis mirabitur in su-
 bitatione insperatæ salutis dicens intra
 se; ergo erravi a via veritatis. O quan-
 to angustiarum turbine volvitur anima
 mea, Domine, quanto terrore agitur,
 quanta pressura comprimitur, si, cum
 libri aperiuntur, & palam humani cor-
 dis abscondita revelentur, pars mea sit
 cum his, qui in interminabilium tene-
 brarum vorticibus sepeliuntur! Discedam
 a te, Domine Jesu? hanc animam, pro
 cujus redemptione usque ad mortem ago-
 nizasti, devorabit inferorum abyſsus, &
 vadam in ignem, qui paratus est dia-
 bolo, & angelis ejus? Quasi fulgur de
 Coelo cadens in tenebras exteriores abi-
 bo, & Coelestem Jerusalem matrem meam
 non videbo? Non jam amplius comedam,
 neque bibam super mensam tuam, sed
 esuriam, & sitiam cum divite illo, qui
 interdictâ aquæ guttâ expetitâ per La-
 zarum adhuc sitit, & sitiet in æternum?
 Noli, Domine, noli me perdere, quem
 formasti, & pretioso sanguine redemisti.
 Memorare, quæ mea substantia, & quo-
 niam

niam hominis assumptâ naturâ de Cœlo venisti, ut languores nostros ferres, ut dolores nostros portares, & peccata mundi tollereres. Venisti vinctos educere in fortitudine, omnes, qui corruunt, erigere, cœcos illuminare, errantes corrigere, & sanare contritos corde: Absit, ut, cum de longinquo veneris ægrotos reddere sanitati, me faucium relinquas sempiterno obnoxium dolori. Sanabas claudos, illuminabas cœcos, mundabas leprosos, erigebas curvos, atque de grabato faciebas surgere paralyticos. Ecce claudus, qui in via justitiæ nescivit ponere gressus, sed claudicavit carnalium cogitationum involucra sequutus. Ecce cœcus, cujus abstulit lumina corruptæ carnis sordidus appetitus: atque propter iniquitatum multitudinem non potui, ut viderem. Ecce leprosus, cujus rationales potentias maculavit propria voluntas, dum intentione, vel modo vitiat actiones honestas. Ecce curvus, qui stulté contemnens sperandarum rerum substantiam oculos suos statuit declinare in terram. Non quæ sursum sunt, quærit, sed sola terrena sapit. Ecce paralyticus qui in pravæ consuetudinis grabato jacet immotus, languidus sine affectu virtutis, aridus sine succo devotionis, frigidus sine calore charitatis. Igitur cum tu de Cœlo adveneris misericors medicus, ne, precor, insanatus recedat miser ægrotus. De te scriptum legimus: & sanabat omnes: & livore ejus sanati sumus. Sana me ergo, Domine, & sa-

nabor. Huic cœco, claudo, leproso, curvo, paralytico, qui undique morbis affectam patitur animam, efficacem porrigant tua vulnera medicinam. Habes tu, Domine, intrinsecam in verbo virtutem, & facile est in oculis tuis subito sanare dolentem. Dic animæ meæ, salus tua ego sum: & tibi dicet anima mea: solus mea tu es. Hanc morbidam ovem ne deferas tu, qui super filios hominum multiplicas misericordias. Tantummodo respice in me, & sufficit mihi, ut reddatur anima mea pristinae sanitati. Eja, fac, Domine, lætifica animam meam in salutari tuo, & misericordias tuas in æternum cantabo.

Oratio secunda ante prandium.

O Deus Altissime, qui habitas colles æternos, qui pugillo contines totum orbem terrarum, qui solus sedes super sublimia Coelorum, quantus sum ego, ut loquar verbis meis tecum? Tu, cujus sapientia mirabilis attingens a fine usque ad finem: cujus fortitudo terribilis detrahens in infernum rebellem, & ferreis funibus alligans fortem: qui in solo verbo commoves terram de loco suo, orbis terrarum bases dilocantur, & columnæ ejus concutiuntur: a cujus tonitruui voce formidant montes, & exultant ut arietes: Sanctus Deus: Sanctus fortis: Sanctus immortalis, qui in ictu oculi perdis omnia, & solo sermone restauras universa: quis sum ego, ut ante
tan-

tantæ Majestatis præsentiam assistere au-
 deam? Audacia profecto est loqui velle
 cum Omnipotente Deo , qui creatus
 de nihilo, & plasmatus de luto contem-
 ptibilis valde est, vermis, non homo;
 si tamen homo, vanitati similis: imo
 vanus in concreto, & universa vanitas
 in abstracto. O Domine Deus, ignosce
 mihi: audacia quippe est velle ad Omni-
 potentem, cum sim vermiculus, jactare
 sermonem. Sed audaciam loquentis excu-
 sat extrema necessitas deprecantis, &
 nimia benignitas Salvatoris. Scio, quia
 non permanebunt injusti ante oculos tuos,
 & quia longé es a corde, cui dominatur
 iniquitas. Tamen nihilominus scio, quo-
 niam omne, quod veniat ad te, non
 eijcies foras. Venio ad te, ut amoveas
 a me plagas tuas, quas digné promerui
 propter iniquitates meas. Accedo ad te,
 ut a te, qui pater es luminum, mens
 sedentis in tenebris illuminetur, & fa-
 cies mea non confundatur. Appropinquo
 tibi, ut appropinques mihi, & mundes
 cor meum ab iniquitate tu, qui solus fa-
 cere potes mundum de imundo con-
 ceptum femine. Si a te discedere velim,
 quo ire potero, ut vitam invenire pos-
 sim, cum non sit alius extra te neque
 in Coelo, neque in terra, sed tu solus
 salus, vita, & resurrectio nostra Deus
 in similitudinem hominum factus, per
 quem salvati, & liberati sumus? Ad te
 ergo veniam, o bone Jesu, qui expan-
 dens manus tuas tota die clamas sine di-
 scrimine invitans: venite ad me omnes,

NON

non nisi ut reficias lassos, & corroborea debiles. Ecce lassus a via iniquitatis: ecce debilis in operatione virtutis, vir infirmus, homo marcidus, egens recuperatione, plus deficiens virtute, & abundans paupertate; inanis homo, totus in circuitu passionum morbis infectus, peccatis onustus, & meritis vacuus. O Domine, afflictio mihi magna est, & continuus dolor cordi meo! quia non sum sicut cœteri homines. Cœteri enim si peccatores sunt, forsitan sunt mobilitate animi, vel ignorantia. Ego autem (O me miserum!) peccator sum ex malitia. Cœteri dum peccata perficiunt, quid faciant, fortasse nesciunt, quia vel inconsideratione, vel perfecta sine libertate consumant actum. At ego malum coram te feci non nesciens Dominum. Cœteri peccatorum rubore suffusi ausi non sunt oculos in Cœlum levare. Mihi vero facta est frons meretricis, & nolui erubescere. Fornicata est anima mea cum amatoribus multis, & non est recordata finis sui cum turpiter inserviret voluptatibus carnis. Utinam stulta aliquando saperet, & intelligeret, & novissima provideret. Sed hei mihi, hei mihi! quia indisciplinatae carnis obtenebrata passionibus transilit effrons contemnens futura atque incerto discurrens per illicita desideria circumfertur hinc inde tanquam filia vaga. Cumque post unctum oleo, ut tibi in Sanctuario oblationem mundam offerrem, ad cor redire debuissim, sacratissimi instituti, quod ipsa tantæ Digni-

gnitatis ratio expostulat, prorsus oblitus
 liberioris vitæ præruptam semitam sum
 sequutus. Ingressus domum sanctifica-
 tionis tuæ, cum ibi sanctè vivere opor-
 teat, tanquam qui ministrat, a pravitate
 cordis mei mali non recessi, imo potius
 super dolorem vulnerum tuorum addidi.
 O me plusquam dici potest, insipientem,
 quandiu ponam consilia in anima mea,
 & dolorem in corde meo per diem!
 Dorsum verti Dei Sanctuario, atque
 odio prosequens animam volutatus sum
 usquequaque in carnis sterquilinio. Ete-
 nim homo absque consilio, & sine pru-
 dentia, qui dum immodestis passionibus,
 atque carnalibus desideriis tribui cultu-
 ram, Sanctum canibus dedi, & porcis
 tradidi margaritam. Hei mihi misero!
 Reliqui domum meam, dimisi hæredita-
 tem meam, dedi dilectam animam meam
 in manu inimicorum ejus! qui me justi-
 tiæ vestibulis spoliantes etiam colli pro-
 tecta nudarunt, atque plagis impositis
 abierunt me non jam semivivo relicto,
 sed penitus mortuo. Mortuus sum, &
 spiraculum vitæ in me non est. Quem-
 admodum mortuus ob defectum vitalis
 spiritus non sentit ea, quæ vivo sunt
 sensibilia, ita ego ob spiritus, & vitæ
 defectum factus insensibile lignum, vel
 similis saxo nihil sentio: mirabilia Sacra-
 menta, quæ operata est manus tua, non
 percipio, quia amissa spiritualitate a prava
 peccandi consuetudine, relicta est mihi,
 ut ita dicam, sola animalitas, animalis
 autem homo non sentit ea, quæ spiritus
 Dei

Dei sunt. Præterea sicut mortuus amissit audiendi sensum, ita ego perdidici cordis auditum: te enim stantem ad ostium, & pulsantem non audio, neque sapientiam in summis excelsisque verticibus, supra viam, in mediis semitis clamitantem aure percipio: quia aures audiendi non habeo. Mortuus spiritu vocem non audio vocantis salubriter, sed tantummodo voces incantantium sapienter, dum a veritate quidem auditum avertō, & ad audiendas fabulas animum induco. Non videt mortuus, sed neque ego, quia spiritus vitæ defunctus. Occupant me horribilium volumina tenebrarum; & quia jacens in loco obscuro, colores discernere nequeo. Excoecavit me malitia mea, dum dissipato corde per fabulosum mundi theatrum secutum est oculos meos cor meum. Idcirco venerunt super me caligo, & tenebræ, & ecce facta est nox, atque in ipsa pertranseunt omnes bestię sylvæ. Leo superbiæ, tigris avaritiæ, ursus luxuriæ, leopardus iræ, lupo gulæ, vulpes invidiæ, & onager negligentiae. Has irruentes bestias non video, quia pertranseunt in noctis horrore, quando lucernam pedibus meis, quod est verbum tuum, oculi faciles amiserunt. Sicut mortuus non gustat, ita & ego non gusto, quia inebriatus de calice Babylonis saporem amisi supernæ dulcedinis. Idcirco omnem escam abominata est anima mea fastidio habens virtutem, & solummodo placet ei, quod gustatum affert mortem. Nihilominus
ani-

anima perdidit odoratum, dum carnalium illecebrarum assueta foetori post te non currit in odorem unguentorum tuorum. Perdidit tactum, dum immotas patitur manus ad praxim virtutum. Pedes amisit dum abiens post inordinatos affectus a justitiæ semita declinavit. O me nimium infelicem! Abstulerunt a me spiritum vitæ venena concupiscentiæ: atque in impetu malesuadæ carnis præcipitem me dedi in barathrum tenebrosæ caliginis, donec appropinquaverim usque ad portas mortis, factus sicut vulnerati dormientes in sepulchris. De profundis clamo ad te, Domine, & exalto vocem meam, ut veniant mihi miserationes tuæ, & vivam. Resuscita me, vivifica me, atque in potentia tuæ virtutis exalta me de portis mortis, & oculi mei non videant tenebrosa loca abyssi jacentis. Mittere de sede magnitudinis tuæ in emortuam animam sensum, & sapientiam: ipsa sola potest mihi esse remedio: nam per sapientiam sanati sunt, qui tibi placuerunt, Domine, a principio. Aures perfice mihi, atque, ut festinus obediam, fac me audire vocem tuam. Illumina oculos meos, ne unquam obdormiam in morte: per ipsos enim tanquam per fenestras intravit mors, & cordis pretiosum rapuere thesaurum. Pone ergo in oculis meis vigilem circumquaque timorem, & averte eos, ne videant vanitatem. Da, Domine, naribus meis spiritum tuum, ut sentiens vestimentorum tuorum fragrantiam, humanitatem scilicet

cet

et Divinitati conjunctam, curram post te, donec inveniam. Aufer ab ore meo saporem sæculi, & da mihi, ut gustem, & videam quam suavis est, Domine, spiritus tuus; qui ut dulcedinem tuam in filios demonstrares, pane suavissimo de Cœlo prællito bonis repleas exurientes. Fac, ut degustato jam carnalium rerum amaro felle tua replear suavitate. Conforta, Domine, manus dissolutas, & ne relinquantur viæ peccatorum super me & extendam manus meas ad operationes iniquas. Genua debilia roboras, & perfice gressus meos in semitis tuis, ut moveantur vestigia mea.

S E R M O II.

Sancti estote, quia & ego Sanctus sum.
 Levit. c. 19. v. 2.

PRædicaturus, Fratres dilectissimi, de sanctimonia, quam tantæ dignitatis exigit excellentia, atque simul de improporcionata, vel potius ex diametro opposita multorum vita, vel etiam de communi, quam parit opinio falsa, sensum vellem potius, quam verbis significare, profusis lacrymis aperire. Sunt etenim, quæ mihi exponere præcipiuntur, potius quam eloquio, profundo cordis digna lamento, & potius quam calamo, ferreo stylo. Igitur pro prædicationis exordio in lumborum contritione ingemiscam: atque gemitum meum ex imis visceribus, & ani-

& animi amaritudine proferam. Plorans
 plorabo, & a ploratu non quiescam,
 donec superest halitus in me, quia nos,
 qui Sacerdotes sumus, & ineffabilia Dei
 Sacramenta tractamus, nullum inter pol-
 lutum, & mundum, nullum inter pro-
 fanum, & Sanctum discrimen facientes
 profanis sacra miscemus, dum mensam
 Domini immunda carnalium affectionum
 fæce polluimus. Sancta, quæ manibus
 nostris quotidie tangimus, intellectu,
 quantum fas est, investigare contemni-
 mus, atque circa ea insensibiles tanquam
 lapides effecti sumus, quia mentis aciem
 a densis passionum nebulis purgare nolu-
 mus: idcirco occulta sapientiæ suæ, quæ
 iis, qui mundo sunt corde, Dominus
 manifestat, nobis aperire non juvat,
 imo potius quia in carnis voluptatibus,
 inordinatisve passionibus frontosi persisti-
 mus, cor nostrum excœcat, oculos no-
 stros claudit, & aures aggravat, ne for-
 te intelligamus, & sanet nos. Hinc est,
 quod devorata omni sapientia nostra a
 fera pessima, quæ effrons est sine disci-
 plina carnis immoderantia, ineffabilia,
 quæ gerimus, mysteria non capimus,
 neque sanctitatem, quam ab agente San-
 cta requirunt, ediscimus, sed neque edi-
 scere quærimus: imo sicut stultus, qui con-
 temnit, & transilit, transilimus, atque velut
 Ephraim vitula docta diligere trituram (1)
 Missam a consuetudine celebramus. Tre-
 menda, quæ gerimus, nulla mentis di-
 scussione revolvimus: sed quemadmo-
 dum

F

dum

(1) Osee c. 10. v. 11.

dum si quis mechanicæ artis exerceat officium, Sacerdotale complemus opere Ministerium. Materia hæc potius est apta lacrymis, quam digna sermonis.

Quamvis autem ob densam mentis caliginem debitæ sanctitatis proportionem altius solito agnoscere non valeamus; tamen per illuminatæ rationis instinctum, quod (1) *mentis* dicitur *habitus per omnia conveniens veritati*, investigare possumus. Optime nostis, quoniam omnia, quæ scripta sunt, ad nostram doctrinam scripta sunt. Legistis Leviticum, nihilominus legistis & Exodum. Ibi vidistis quam peregrinam sanctitatem exegerit Deus ab illis Sacerdotibus, qui, medullata holocausta cum incenso arietum Domino sacrificabant, atque carnes taurorum, & hircorum sanguinem offerebant. Passim legimus ad eos specialiter intimari: *Sacerdotes Sancti erunt Deo suo: Sacerdotes Sancti incensum, & panes offerunt Deo*; scriptum erat in lamina frontis ex auro: *Sanctum Domino*: in rationali: *Doctrina, & veritas*: in Sacerdotalibus ornamentis expressa erat præcipua sanctitas. *Sacerdos non egrediatur de Sanctuario, ne polluat nomen meum. Mundi estote, qui fertis vasa Domini*; & multa alia leguntur, quæ sub mortis pœna intimantur. Legistis quot malluvia, quot purificatoria illi Sacerdotes habuerint, priusquam accederent ad offerenda Sacrificia, & quam scrupulosa atque minaci simul expressione jubeatur sanctitatis,

(1) Ex Phylosoph.

tis, & munditiæ cordis custodia. Ad quid hæc toties repetita, & comminatoria intimatio de sanctitate ad Sacerdotes, animalium carnifices, vel occisores, qui aras adibant in holocaustis manus habentes plenas sanguine de Sacrificiis? Ad quid hæc admodum scrupulosa sanctitas in iis, qui in veritatis figura offerebant carnales hostias? O Fratres mei! si in figura tanta sanctitas, quam sanctitatem requireret veritas! Quæ cordis munditia, quæ sanctimonia in his, qui Sacrificium offerunt, in quo nulla Legalis hostia, sed ipse Christus est victima? Hæc secum Sancti, sicut oportet, animo revolventes concepto stupore timuerunt, atque Presbyterale munus pro viribus suscipere recusarunt. Nam si hæbraici populi Secerdotes, qui tauros, & hircos, hædos, & agnos legaliter immolabant, assidua comminatione sanctificari jubentur, perspicuum est altioris excellentiæ sanctitatem a nobis expeti, cum Sacrificium, quod offerimus, differat a Legali victima, quantum differt veritas a figura. De illis antiquæ Legis holocaustis scriptum est: (1): *Non accipiam de domo tua vitulos, neque de gregibus tuis hircos. Numquid manducabo carnes tauro- rum, aut sanguinem hircorum potabo?* Igitur si in offerentibus illa Legis holocaustomata, tam miram sanctitatem requirebat Littera, consideret charitas vestra, quam vitæ sanctimoniam requirat gratia. Corpus, & Sanguinem Domini

E 2

no-

(1) Psalm. 49.

nostri Jesu Christi conficimus: Filium Dei Unigenitum, per quem facta sunt omnia, non figuraliter, sed veraciter offerimus.

(1) Quo ergo solari radio non oportet splendidiorem esse manum Agni immaculati carnem dividensem, os, quod igne spiritali repletur, linguam, quæ tremendo nimis sanguine rubescit? Quæ morum integritas, quæ vitæ puritas, quæ sanctitas ornare non debet animum offerentis terribile Sacrificium, quod Angeli videntes horrescunt, neque libere audent intueri propter emanantem inde splendorem? Si iustum est introduci de filiis Israel pueros nobiles, decoros formâ, in quibus nulla esset macula, & eruditos omni sapientia, & doctos disciplina, qui possent stare in palatio Regis profani, quanto magis decoros formâ virtutis oportet esse eos, qui ministrant in conspectu Dei viventis? (2) Qua virtutum claritate irradiare non debet vita Ministri, cum minister ipsa sit Arca Testamenti? Qua sanctimonia splendere non debet anima sacrificantis, cum Tabernaculum Dei viventis sit anima Sacerdotis? Vere etenim cum serio mecum recogito quam sanctitatem a nobis Deus exigit ex officio, & oculos ad nostræ indebitæ conversationis extravagantiam converto: pili meæ carnis horrescunt, atque ossa mea terrore concussa contremiscunt. Quod si verum fatear; quoties venit in mentem sublimitas Dignitatis, toties invadit quædam affectio timoris, quæ

(1) Joan. Chrys. hom. 60. ad popul. Antioch.

(2) Daniel, cap. 1. v. 3.

quæ etiam compellit, ut somnus recedat ab oculis meis. Væ nobis miseris! nos quia passionum nubibus obscuratum patimur intellectum, neque perpendimus congruum, quod res expostulat, institutum, neque sicuti debemus, æstimamus officium. Nostram distrahit mentem visibilibus rerum figura: nostros rapit oculos ad se trahens falsaria sæculi scena, & nullus est, qui foetum concipiat de sanctitate, quia nullus est, qui recogitet corde: sicque vitæ seriem traducimus agentes secundum propriæ voluntatis propositum, ac si quædam esset hyperbole phrasis Scripturarum. Peregrinam sanctimoniam, fratres mei, Sacerdotale requirit officium. (1) *Quod si quemadmodum affectus sum, ac sentio loquar, non arbitror inter Sacerdotes multos esse, qui salvi fiant, sed multo plures, qui pereant. In causa est, quia res excelsam requirit animum, & innumeris, ut dicitur, oculis illis est opus undique.* Innumeris oculis opus est Sacerdoti, nequa vel levis umbra sinistri affectus, vel etiam species delicti, excelsæ, quæ exigitur, obstruat sanctitati. Ipse utique quatenus tali, ac tanto insignitus honore, qui terribili fungatur officio, atque ex hominibus assumptus, ut serviat Tabernaculo, homo Dei dicitur ab Apostolo (2). Ille homo Dei est, qui veteri cum suis actibus penitus spoliata novâ induitur creaturâ procedens homo, qui secundum Deum creatus est in veri-

F 3

tate

(1) Joan. Chrysost.

(2) In epist. ad Tim. 1. c. 6. v. 11.

tate, & justitia. Ille est, qui subiugata jam carne per exercitium, atque obtentâ virtute per habitum totus trahitur in odorem illarum delectationum, quæ in dextera Dei sunt, atque in sublime elevatus ut aquila hanc corde deserit regionem infimam dicens cum David (1) *quid mihi est in cælo, & a te quid volui super terram?* Ille est, qui conversâ oleastri naturâ per sui abnegationem floret sicut oliva fructifera in domo Dei redolens suavitatem. Et, ut brevi sermone comprehendam, ille est, cui comes est clara scientia, sancta vita, & bona fama. Hæc tria simul, fratres charissimi, a nobis exigit Sacerdotalis ratio Ministerii. Ecquidem melius erat Presbytero, si oculos, pedes, & manus non habeat, quam si his simul tribus carere contingat: quia debitæ justitiæ formam repellit, Deo, sibi, & populo malum inferens, si inventus sit minus habens. Ab eo exigitur clara scientia, secundum quod scriptum est: *labia Sacerdotis custodient scientiam, & legem requirent ex ore ejus.* Unde extat illud a Patribus: (2) *Illiteratos nullus Episcoporum promovere præsumat, quia litteris carens non est aptus officiis.* Ipse namque ab Isaia doctor dicitur parvulorum, quia ex ipsa officii natura tenetur populis Evangelicæ doctrinæ suppeditare pabulum. Docent nihilominus Deuteronomium, & Evangelium Sacerdotem habere interloquutoris officium. Quod

ad

(1) Psalm. 72.

(2) In jure Canon. dist.

ad obeundas hujus muneris partes scientiâ carere contigerit, quomodo iniunctum sibi Ministerium implere poterit? Idcirco ei, qui scientiæ copiam, & Scripturarum noluit profiteri peritiam, comminatur Dominus per Prophetam: [1] *quia repulisti scientiam, repellam te ne Sacerdotio fungaris mihi*. Requiritur insuper sancta vita, quia Sacerdoti peculiare est sancta tractare Mysteria. Neque ad hæc digne, sicut oportet, agenda quælibet sufficit sanctimonia: nam sanctitas offerentis cum sanctitate victimæ salutaris debet servare modum debitæ proportionis. Passim clamitant Scripturæ: *Sanctificamini, qui acceditis ad Altare in conspectu Domini*. Ad communicantes vero solummodo dicitur: *Probet autem seipsum homo*: Igitur in sacerdotibus virtutum quæritur eminentia. In laicis autem sufficit sola justitia. Ipse etenim Presbyter discrimen patitur, si de sancta vita periclitetur: nam si terribile Sacramentum non inveniat in sanctitatis proportionem Ministrum, retinet saltem devotionis effectum. Cumque Christus ex ore ejus incipiat evomere recipientem, tunc pedes suos miser inclinat in perditionem. Valde ergo timendum est, fratres mei charissimi, ne illa sine sanctitate, qua florere debemus, ad offerendum Domino sacrificium audacter accedamus: nam debita sine sanctitate accedere ad Sacrificium, temerè tentare est contra Dei debitum cultum, &

COR-

(1) Osee cap. 4. v. 6.

contra professionis nostræ propositum in animæ detrimentum.

Sacerdos (1), cum sacro unctus est oleo, *duas res professus est & sanctitatem, & Sacerdotium. Sanctitatem propter se, Sacerdotium propter populum suum Deus instituit. Absit, fratres mei, ut solâ justitiâ Ministerio respondere posse credamus, nisi jugiter sanctitatis comes sit virtus. Alia est justitia, & alia est sanctitas, Sanctitas sine justitia non est. Justitia vero esse potest sine sanctitate. Justitia in actu consistit: justificatur enim anima peccatoris ex actu contritionis, vel charitatis. Sanctitas vero non sic: nam sanctitas consistit in habitu. Hanc habet homo a diuturno virtutis exercitio. Potest peccator in ictu oculi justificari, sicut justificatus est David unum tantummodo verbum dicens in confessione, & latro similiter clamans in Cruce. Attamen ut quis sanctus evadat, opus est tempore. Transiens qualitas simplex justitia dicitur: sanctitas autem successiva, & non interrupta justitia est. Justitia, & si bonum ab integra causa, tamen virtutum praxim non habet: sanctitas vero quædam est eminentia virtutum habita per exercitium, atque spiritualium simul opulentia bonorum obtenta per habitum. Hæc eminentia, hæc opolentia, hæc sanctitas a nobis exigitur, fratres mei dilectissimi. Neque leve, ut ita dicam, discrimen patitur anima, si nos, qui tremenda gerimus, comitetur sola justitia.*

Hæc

(1) S. August.

Hæc quidem pertinet ad sæculares. Sufficit eis ad habenda promissa servare mandata. At nos, qui Dei omnipotentis Sacerdotes sumus, & tremendæ Majestatis Atria frequentamus, ultra venire, longe distare debemus. Magna revera confusio justiores, & fideliores laicos inveniri, quam Clericos: qui si, quemadmodum laicis Dignitate superant, sanctæ vitæ instituto non præcellant, cum ante Tribunal Christi steterint, audient, quod dicit Scriptura: *Aufer cidarim, tolle coronam*. Hanc longam vitæ distantiam figurally exprimit eadem Scriptura. Duo namque fiebant in lege veteri Sacrificia, oblationem scilicet, & holocaustum. In oblatione is, qui offerebat, animalis oblatus partim sibi reservabat. In holocausto autem totum animal ignis comburebat. Per oblationis Sacrificium exprimitur vita laicorum, qui salvâ justitiâ necessariam curam exercent temporalium. Per holocaustum vero sanctitas Sacerdotum, qui, ut extat a Patribus (1), *abjecta omnium terrenarum rerum curâ uni Deo prorsus vacare debent*. Nihil est, fratres mei, quod quis erroneam illam sententiam jactare præsumat: sufficit nobis honestè vivere, & animam a mortifero scelere reservare. Incircumspectæ hujus temeritas opinionis, quæ hodie in Clero prævalet cum injuria Sacrorum, & prævia ruina sequacium, longe sit a cordibus Sacerdotum, qui speciali debent præcellere sanctimonia, quoniam per ma-

208

(1) Ex Decreto S. Sylvestri P. P.

nus eorum offertur Nomini Sancto Dei oblatio munda. Non est ergo, charissimi, dicere: teneatur norma communis: sufficit vita, quæ vulgo dicitur ordinaria, vel media via: quia secundum significantiam Scripturarum in vita Sacerdotis non datur medium. Duos ficorum calathos ad portam Templi vidit Jeremias [1]: in altero vidit ficus bonas, bonas valdè: in altero ficus malas, malas valdè, quæ comedi non possunt, eo quod sint malæ. Hunc Scripturæ locum sacri Interpretes illustrantes ajunt, mediam non dari viam in iis, qui Tabernaculo deseruiunt. Unde Presbyter vel optimus, vel pessimus. Hujus rei veritas, quæ ex Jeremia (2) congruenter accipitur, nihilominus ex Apocalypsi manifestè comprobatur: ait enim Angelo Ephesi, id est, Sacerdoti, is, qui tenet septem stellas in dextera sua: *scio, quia patientiam habes, & sustinuiisti propter nomen meum, & non defecisti. Sed habeo adversum te, quod charitatem tuam primam reliquisti. Memor esto itaque unde excideris: & age pœnitentiam, & prima opera fac. Sin autem venio tibi, & movebo candelabrum tuum de loco suo, nisi pœnitentiam egeris.* Magna, & mirasententia, fratres mei, & quidem formidanda comminatio iis, qui mediâ viâ contenti ab illa distant sanctitate, quæ exigitur a Sacerdotio. Væ nobis! Si adversus Sacerdotem, qui charitatem habet, sed non primam, formidabilem pro-

fers

(1) Jerem. cap. 24. v. 1.

(2) Cap. 2.

fert Judex ab ore sententiam, quam sententiam dicet adversus eos, qui carentes omnino succo debitæ charitatis, nebulosa possident corda gradientes per anfractum mundanæ conversationis? Quam audient sententiam hi, qui nulla, vel brevissima, vel indevota ante Missam habitâ consideratione Sacrum rapidâ linguâ, festinisque motibus accelerantes tremendum excoriant Sacrificium intra duodecim minutorum spatium, statimque planetâ depositâ, atque vel momentanea, vel nulla gratiarum actione intermissâ habitum nimis cultum, & nitidum induentes adhuc rubescentibus labiis pretioso sanguine Salvatoris egrediuntur foras, vel ut exerceant mercaturas, vel ut visitent fœminas, vel ut celebrent conventiones iniquas, atque solutâ penitus modesti pudoris habenâ per calles lascivientes, in foro deambulantes, sæcularia negotia mundialiter agentes, in ludis, in jocis pascentes ventos, & sequentes aves volantes? Ubi facile reperietur, qui his vitiis, vel similibus involutus non teneatur? Hujusmodi Clericis plena est terra, & rara avis qui servatur immunis. (1) *Periit Sanctus de terra, & relictus in hominibus non est. Qui optimus est in eis, quasi paliurus, & qui relictus quasi spina de sepe. Optimus est hodie qui non est nimis malus.*

Ad Ecclesiasticos ait Christus: *vos de hoc mundo non estis.* Sed quomodo hæc sententia ad eos referenda est, qui cum de-

(1) Michææ c. 7.

dedignentur crucem suam tollere, & venire post Christum, dum mundi profana sequuntur, gloriantur patrem habere diabolum? Qui de mundo non est, quæ sunt de mundo non cogitat: secundum carnem non ambulat: sed superna ruminat, semper vigilat, incessanter orat, jejuniis corpus extenuat, atque carnem suam crucifigens cum vitiis tota eius conversatio in Coelis est. Non litigat, sed pacem cum omnibus habere curat: non incumbit politicis rebus: non implicat se negotiis sæcularibus: non disputat de præfecturis, sed ab omni sensibilibus rerum affectu illibatam servans custodiam cordis, ut Angelus in carne, sive homo sine carne vivit in terris. Ecce qui de mundo non est, fratres mei. At ubi quæso, possumus invenire Presbyterum, qui hujus vitæ, sicut oportet, servet institutum? Procul, & de ultimis finibus pretium ejus. Utinam ex centum Sacerdotibus inveniat unus, qui hanc Dignitati congruam vitæ rationem, ad quam tenetur, studio prosequatur. Sed o quam pauci sunt, qui de mundo non sint! Utinam solam tertiam partem stellarum, & non reliquum multitudinis post se traheret robusta cauda draconis. Sed vix invenietur ullus, qui non habeat characterem bestię, & adoret imaginem ejus. Apparent mundo Sacerdotes in copia, quorum inverecunda in contrahendis excessibus arrogantia, atque efferata morum licentia testimonium perhibent Sacros Ordines obtinuisse, ut peiores vi-

ve-

verent, atque petulantius quam cum laici pudori fræna laxarent. Passim occurrunt Sacerdotes, quorum incessus, exterior cultus, multiplicitas negotiorum operosa mundialium rerum sollicitudo, irrequieta Dignitatum ambitio, quætidiana in obeundis civilibus relationibus occupatio, distractæ vitæ turbulenta confusio, gyros denique viarum suarum apertè innuunt non esse nisi quandam fabulam Evangelium. Sanctuarium frequentant, non nisi in quantum ab eo lucrum reportant. Ab eis Ecclesia accipitur, non ut locus, quo cultus Deo dignè, & laudabiliter deferatur, sed ut telonium, vel mensa, qua occasionaliter eorum fames avara nutritur. Pro redditibus agonizant: pro præferentiæ gradu obtinendo die, ac nocte laborant: de anima vero sanctis moribus ædificanda parum, vel nihil curant. Tinea quæ eorum corda corrodit, ignis est, qui nunquam dicit: sufficit: sed affer, affer: ut in auratis curribus, in equis strenuè phaleratis, in serventium copiosa turba, in opipara mensa, in luxuriis, in regio domus apparatu, in extollendo nepotum catervam, in sectando mundi figuram, vel quod deterius est, in alendo concubinam patrimonium pauperum, & pretia peccatorum expendant. Ipsi sunt primi ad coacervandas operoso conatu pecunias ad sæculi pompas, ad mundi delicias, ad carnis illecebras, donec videantur Clerici longe multo deteriores quam sæculares.

G

Proh

Proh dolor! Sacerdotes Ministri Dei, qui coram plebe positi sunt in exemplum, in quos velut in speculum Laici oculos coniiciunt, a mundi spiritu miserabiliter occupati facti sunt hodie populi in scandalum, in miseram stragem debilium, atque in ruinam pusillorum. Ipsi sunt, qui proicientes post tergum sui muneris partes intermiscent se rebus, quæ etiam alienæ sunt a sæcularibus officium arripientes diabolicum turbandi Christianæ pacis concentum, dum quietis impatientes, atque irrequietæ dissensionis amantes, garruli, & vagi de domo in domum, de corona in coronam, de coquina in coquinam discurrentes sedent adversus fratres violantes famas, atque instar sussurronum non verecundantur inter familias disseminare discordias cunctis detrahentes linguâ mordaces non jam filii scorpionum, sed genimina viperarum: e quorum sacrilegis obloquutionibus odia, rixæ, & inimicitiae suscitantur, quæ non facile extinguuntur. Omnia critizant, de omnibus murmurant, alienas domos gubernant, qui suam bene regere ignorant, e quibus eordium revolutiones oriuntur, atque fraternæ dilectionis fœdera dissipantur. Quæ tantorum malorum causa? Multorum Clericorum pestilens lingua. Utinam abscindantur, qui turbant quietem: nam homines pestilentes dissipant Civitatem. Ipsi sunt, qui uxorem non ducunt, & matrimoniales conventiones faciunt, juvenum nuptias componunt, & disponunt intro-

mit-

mittentes se in his, quæ in Sacerdotalis Officii dedecus cedunt. Ad quid, Clerice, hæc tibi occupatio indecens, incompetens, & aliena, cui solummodo debet esse comes oratio, & cordis custodia? Quid tu his rebus inhæres, qui debes potius ad virginitatem hortari, quam ad copulam matrimonii? Ipsi sunt insuper, qui seditioso spiritu exagitati vel propter mundi respectum, vel propter turpe lucrum de parvis, minimisque rebus suscitant lites. Acceptâ levi iniuria, vel levi damno in substantia, vel quia jus idealiter apprehendunt ad ea, quæ in rigore justitiæ spectant ad proximum, ad Tribunal festinanter accurrunt captantes animos hominum, ut prosperum possint habere litigium. Rapta prorsus a litigiosis speciebus eorum mente dies, noctesque in civilibus exequendis infumunt, non attendentes, cum celebrant, ad Sacrificium, neque intendentes, cum recitant, ad Breviarium: sed totus eorum sermo de Actibus, de Fiscali, de Advocato, de Processu: neque nisi de litibus loqui possunt, neque sine lite pendente vivere queunt. Unde lites in vobis, o Clerici? Nonne ex concupiscentiis vestris, quæ militant in membris vestris? Diligitis lites, & contentiones, quia carnales estis, & spiritus in vobis non est. In vobis prævalet concupiscibilitas, atque irascibilitas soror ejus. Cum illa id, quod ardentem appetit, non adipiscitur, irascibilitas soror ejus irascitur, atque ob incrassatam passionem rationabilitas non

attenditur. Apostolus docet vos: *servunt Dei non oportet litigare, sed cum omnibus pacem habere.* Ad Sacerdotes, & consequenter ad vos hic sermo est, si vos jam servi Dei non sitis, sed carnis, & filii amaritudinis, quos genuit Balberith spiritus dissensionis. Legistis saltem in Missali: Jesu Christi Evangelium: si quis tecum contenderit volens tibi tollere tunicam, dimitte ei, & pallium, hoc est, dimitte majora, & lites, & quæ inde oriuntur, devita: nam cordis pax super omnia. Sed de cordis pace nihil curant, qui dum in carne militant, secundum carnem ambulant. Cordis pacem habere contemnunt, quia secundum carnem vivunt, dum non solum litigiis inserviunt, sed projecta sui muneris sarcinâ super humeros suos sæcularium negotiorum molem imponunt: terrenas administrationes, commissiones, & testamentorum curas assument. His alienis functionibus miserabiliter implicati totum extrahunt diem in scribendo epistolas de agendis negotiis, in apponendo annotationes in Rationalibus libris, in faciendo per numeros ratiocinium more computistarum, atque in celebrando cum Laicis fœdera conventionum: quo fit, ut negotiorum turbine convoluti, commissionibus irretiti, administrationibus immersi, atque externarum rerum occupatione distracti peculiare officium vel dimittant, vel negligenter agant, vel festinanter absolvant, vel rapta mente in diversa percurrant. Æstimantes tamqua
sc-

secundarium Sacerdotale Ministerium in evacuandis mechanicis rebus totum tempus infumunt: de officio autem, quod eis specialiter competit, sæpissime accidit, ut horâ ante mediam noctem incipiant ab hymno *Jam lucis orto fidere*. Quid tibi cum mundo, dic, Clerice, dic, Sacerdos, qui teipsum totum pro te, & pro toto mundo offerre debes ad Sanctuarium placabile sacrificium, & stare in conspectu Dei, ut avertas indignationem suam, ne perdat animas impiorum? Quid tu, cum filia misera Babylonis, qui frequentas Atria Dei Viventis? Quid tibi cum sæculi quæstionibus, quibus renunciaſti? Quæ conventio Sanctuarii ad sæculum? Deus, & Dagon in uno simul Altari esse non possunt. Ergo in ventum locuti sunt Patres nostri, cum declaravere dicentes: (1) *Sacerdotes abjesta omnium terrenarum rerum curâ soli Deo vacare debent: & alibi: Sacerdotes testamentorum curam non suscipiant, sed omni mundalium rerum occupatione postpositâ die, ac nocte lectioni, orationi, & verbo prædicationis vacare debent.* (2) Illud in memoriam revocare oportet, quod Missas celebrari prohibuerint pro animabus eorum, qui Clericos testamenti exequutores designarunt, quatenus eos ab Altari avocare præsumpserint. Igitur, si Missas celebrari prohibuerunt pro his, qui Clericos fidei commissos designarunt, itidem celebrari non debent pro defunctis Presbyteris, qui has sæculi curas susceperunt, quia ab

G 3

Al-

(1) Ex Decreto S. Sylvest. P.

(2) Ex Concilio Carthagin.

Altaris officio seipſos avocarunt. Quid turpius, quid magis diſſonum, quam qui ſoli Deo militare debent ratione Dignitatis, ſe terrenis, & ſæcularibus immiſcere negotiis? Melius erat illis non ſuſcepſiſſe Sacerdotis officium, quam poſt ſuſceptum apoſtatare deferentes inſtitutum. Sacerdos, qui Sacerdotio congruam vitæ rationem non ſervat, ſi non formaliter, interpretativè ſaltem apoſtata dicendus eſt.

O miſera Clericorum perditio! Fascinante mentes eorum maleſuadæ carnis ratione ſpecioſa, quam variis componit coloribus opinio falſa, atque exturbante ſyndereſim cauteriatâ conſcientiâ rerum ordinem cum pietatis injuria convertunt, atque divinæ rationi ſua jura negantes eum profanis ſacra confundunt. Pretioſum a vili ſeparare neſcientes profanant Sanctificium, dum ita ſæculi fallacis auram fitienter ambiunt, ut avidius, ardentiusque laicis diligant mundum. Levate oculos, fratres dilectiſſimi, & conſiderate ſemitas Clericorum, & videbitis in populo Clericos tamquam ſydera errantia huc illuc diſcurrentes ab indiſciplinata paſſionum turba raptos in diverſa. Cogitate greſſus eorum, & renunciate mihi, ſi addictius inhæreant ſæculo ſæculares, quam Sacerdotes. Effuſi ſicut aqua gradiuntur per plateas facientes bullas: dumque diſſipato corde per mundi delectabilia vagantur, non jam Sacerdotes Dei, ſed cultores ſæculi convincuntur. Heu miſeris! Odio habentes ſolitudinis

lo.

locum, detestantes orationis cubiculum, atque deferentes Sanctuarium ad mundi inania operoso conatu facilia corda convertunt, atque animum ad vitia blanda ullo sine casti timoris affectu ardentem inducunt. Videmus Clericos omissis Evangeliiis, & Prophetis, contemptisque libris opportunæ doctrinæ pro novellis vulgo *Gazetta* gentiliter agonizare. Mortali erga spiritualia fastidio affecti, atque canina fame audiendi nova raptati in die adventus cursoris currunt de domo in domum, de platea in plateam, de corona in coronam quæritantes quid novi in Aulis Principum, vel quæ sint recenter acta in terris Nationum: quod quidem non solum est curiosæ affectionis argumentum, verum etiam sæcularis animi testimonium, & dissipati cordis indicium. Quæ sursum sunt, quærite, non quæ super terram, ait Apostolus: præsertim Sacerdotes, quorum conversatio esse debet in Coelis: quos oportet non præsentium, sed notitiam inquirere futurorum. Quid ad te, si Cæsar cogitet arma parare? Si Princeps Turcarum Persas debellaturus velit copias immittere? Quid ad te politica investigare commercia, quærere de militia, & disputare de terreni regiminis forma? Quid ad te de præliis quæstiones revolvere, atque de rerum casibus cum stomacho concertare, qui Coelestium rerum debes haurire sapientiam, atque ad viam beatitudinis ineundam cæteris aperire notitiam? Desine ventos pascere, & noli post aves volantes currere. Sed o quanto

to dignum dolore Clericos neglecto Sacrarum Litterarum studio profanas fabulas, & comœdias legere! Sunt Clerici (quod quidem pudet dicere) qui vix norunt discernere Symbolum, vel saltem ignorant Missæ ceremonias, attamen optime norunt per partes exprimere, & quandoque (quod turpius est) repræsentare comœdias. Est plurimis familiare vitium frequenter adire theatrum, ubi per oculos conceptâ formâ a repræsentante figura adversus interiorem hominem arman- tur appetitus, insurgit desideriorum exer- citus, atque passionum impellente vigo- re fit in corde tumultus, specierumque vivacitate confusa mente rapitur animus. Ibi ad excitandam lasciviam gerunt fœ- minæ, ornatu meretricio compositæ, mo- tus inverecundos, saltus immodestos, ge- stus impudicos, cantus amatorios, salaces nutus, atque ita elegantulam præferunt formam, ut ad hujus ignis voracem flam- mam etiam frigida senectutis pectora ca- lesiant. Ibi ab specie pulsante carnis po- tentias irrequieto pruritu spiritus anima- les ebulliunt. Ibi amandi artem spectan- tes ediscunt, atque peractâ scenâ rever- tuntur in domum exaltatæ carnis patien- tes incendium. Quid ergo turpius, quid indecentius, quid periculosius, quam discipulus Christi in schola diaboli? Quem motum, quæso, in carne percipit Sacer- dos Omnipotentis ad conspectum puellæ saltantis, & ad dulce melos incantatri- cis? Quem sentit affectum ad lepidè pe- tulans verbum histrionis? Quis tam fœ-
lix,

lix, qui ad motus foeminæ provocantis a morosa saltem delectatione servatur immunis? Solus ille audebit asserere hujusmodi videri posse sine cordis ruina, qui nescit quam vigorosa sit carnis potentia. Et tu, Clerice, qui etiam a levitatis umbra cor mundum servare debes, ad theatrum convenire non times? Tu, qui non solum baptismi pacto, sed etiam Sacerdotii instituto satana renunciaſti, & omnibus pompis ejus, abjectâ gratiâ libertatis iterum satanæ servus adſcriberis? Theatrum, forſitan dices, indifferens eſt. Quomodo in theatrō dari poteſt indifferentia, cum in re perſonetur intrinſece mala? Quis dicat indifferens eſſe theatrum, in quo omnimodé carnis ſuſcitatur incendium, & ex quo carnales cogitationes ebulliunt, quæ cor ad carnis deſideria potenter impellunt? Etiam ſi indifferens eſſet, tamen a theatro debet abſtinere Sacerdos, quia ratione inſtituti non ſolum abſtinere debet a malo, ſed etiam ab iis, quæ habent ſpeciem mali (1). Non debet domum riſus adire Sacerdos, qui orandi, & flendi ſuſcepit munera, neque cor debet ad ſæculi convertere gaudia: ibi enim cor ſultorum, ubi lætitia. Riſum Sapiens errorem reputat, & gaudio dixit: *quid fruſtra deciperis?* (2) Curioſitas ergo, ſcurrilitas, riſus, & his ſimilia ab Eccleſiaſtica abhorrent regula. Demiror quidem profanos Clericos, qui viliffimé computantes ſublime ſui Ordinis inſtitutum

(1) D. Thom. de negot. Clericor.

(2) S. Ambroſ.

tum ad mundi spectacula, ad hujus vitæ delicias, ad sæculi oblectamenta corda convertere non horrescunt immemores illius, quod scriptum est: *quantum glorificavit se, & in deliciis fuit, tantum dæte ei tormentum, & ludum* (1). Et Christus ait: *væ, qui ridetis nunc!* Attamen Clerici seductivâ carnis opinione traducti lubrica, quæ sequuntur oblectamenta justificant specioso baptizantes ratiocinio, quæ nocent animo, quo passionibus semel imbuto haud facile credunt auditui nostro. Affectionibus occupati tradunt Sanctorum verba despectui, & inversâ iam a passione recte sentiendi formâ tantummodo sola vexatio intellectum dabit auditui.

O fratres mei! nos Ministri Altaris, nos Sacerdotes Omnipotentis, qui ad placandam divini furoris iram inter vestibulum, & Altare plorare debemus, accurrimus in domum risus? Nos, qui specialiter divino cultui dicati sumus, Sacris valere jussis deserimus Templum, & venimus in theatrum? Væ nobis miseris! nos, qui ut ad debitam sanctitatem, quam Officii munus expostulat, pervenire possimus, cordis custodiam, & orationis instantiam prætermittere non debemus, animum per fallax sæculi choragium effundimus, & cor per nociva mundi gaudia contempto Domino dissipamus. Ubi non est sepes, hæreditas diripietur. Idcirco quia Clerici super exteriores sensus non vigilant, atque de cordis custodia nihil curant, facti sunt

(1) Apocal.

sunt sicut columba seducta non habens cor quietis impatientes, garruli, & vagi, loquaces, & blaterones totam animam effundentes per linguam, atque rationi, modo, & prudentiæ parantes injuriam. Tamquam arundines vento agitatæ, tamquam fluctus feri maris circumcursare videntur per vias, vicos, & plateas spumantes confusiones suas. Liberos dimitunt oculos, quo fit, ut animam rapiant objecta per sensus: nam cor per oculos a figura, quæ in mundo geritur, facile rapitur. Sed quia parum cautè procedunt, cor sequitur oculos Clericorum: nam dum gyrant sine fræno vagantes, per varias secundum diversas passiones rapiuntur species. O fratres mei! dum in oculis est libertas, non potest in affectibus esse securitas. Hevam oculi perdiderunt: perdiderunt & Dinam. Filii Dei, quia viderunt filias hominum, quod essent pulchræ, aquis diluvii deleti fuerunt de Libro vitæ. Oculi perdere Regem Prophetam in sanctitate gygantem. Perdiderunt oculi Salomonem: Alienigenarum mulierum incauta visio sapientem apostatare fecit, dum Deo debitum cultum negavit, & demoniorum simulacris tribuit. Sanson, dum oculos habuit, fortitudinem perdidit: amissis oculis pristinum robur recuperavit. Oculos habens incidit in capturam: cæcus autem obtinuit victoriam. Quis supputare poterit numerum perditorum, quos oculi perdiderunt? Quod si ex iis nonnulli in se reversi per poenitentiam purgarunt animam

a li-

a libertatibus oculorum; tamen non omnes ad hanc gratiam pervenire meruerunt. Nihil nequius oculo, dilectissimi: ab oculo enim, dum non cauté custoditur, anima deprædatur. Quid in Clero peperit mala? Oculorum licentia, quam filiam gignit cordis incuria. Idcirco quia oculorum libertas immodesté in Clero grassatur, & cordis custodia similiter non habetur, Clerum plerumque videmus a iustitiæ semitis Laicis longius abesse, atque in morum corruptione ad gradum pessimum descendisse. Omne malum a sensuum libertate sumit initium: e contra sanctitas a sollicita sensuum custodia sumit exordium. Quare ergo defecit sanctus? quia liberé vagatur sensus. Non servatur a Clericis cordis custodia, neque adhibetur super sensus debita vigilantia, sed sola prævalet cum virtutis iniuria facilis lingua, & oculorum effrænata licentia ita, ut multi ex Clericis, qui ratione officii omnium virtutum genera profitentur, loquaciores, & curiosiores foeminis inveniantur. Idcirco cor durum patiuntur, erga spiritualia remissum, gelidum, paralyticum, aridum sine succo devotionis, sine affectu virtutis, sine ardore pietatis super Angelico pane nauseam subeuntes, & sola Ægypti olera concupientes. Hæc omnia Clericis attulit mala mentis evagatio per sensus, & cordis incuria effusi per appetitus.

Propterea in Clero sapientia devorata est, sed & scientia Dei vix invenitur in eo. Utamque fugavit avara cupiditas, atque

atque incircumspecta vivendi libertas prostravit animas suas. Idcirco æmulari non cogitant charismata sanctitatis, quia rapuit corda eorum filia misera Babylonis. Depravatis moribus, turpi vitâ, turpi quæstu, scandaloso fastu abundat Clerus, fratres mei; & multi ex eo neque Sanctorum verbis a turpitudine continentur, neque flagellis emendantur, sed quia perversi, difficilè corriguntur. Ad te, Domine, qui solus potes facere mundum de immundo conceptum semine, clamamus humiles in oratione ennixè precantes, ne effundas iram tuam super miseros peccatores. Injustè egimus, & voci tuæ non obedivimus, cum neque officio debitam sanctimoniam, sed neque justitiam apprehendere cogitavimus. Profanavimus Sanctuarium evertentes iniquis moribus testamentum tuum. Ullo sine timore futuri ambulavimus vias difficiles secundum pravitatem cordis nostri mali. Nunc autem cogitantes vias nostras convertimus pedes nostros in testimonia tua. Peccavimus, Domine; sed ecce ipsi nos reprehendimus, & agimus pœnitentiam in favilla, & cinere. Respice tu de Cœlo, & erue nos a delicto, ut sine cessatione per ævum confiteamur Nomini Sancto tuo. Tu, qui Sanctus, dulcis, & suavis es universis, sanctifica Sacerdotes, ut non jam amplius in Dei Templum inferamus delicta, sed diebus, ac noctibus extollamus manus nostras in sancta, donec simul cum quatuor Animalibus cantemus canticum novum per infinita sæcula. Amen.


H

QUAR-

Q U A R T A D I E

Hodie servatur Jejunium.

ORATIO PRIMA IN MANE:

 Tu, Domine, cujus voluntas suâ non potest benignitate privari, cujus charitas infinita, cujus pietas immensa, & cujus miserationum abyssus multa, respice de Sede sancta tua, & cogita de me. Ecce homo marcidus egens recuperatione, plus deficiens virtute, & abundans paupertate. Misera facta est anima mea, & deficiente spiritus animosa substantiâ sine vigore desuper contabescit in ærumna. Nihil in me video, nihil sentio, nisi concupiscentiarum legem in carne mea, & vigorosos impetus ad perpetranda mala. Rapere me volunt rebelles impulsus ad perficienda seditiosæ carnis delideria. A variarum specierum figura inferioris portionis agitatâ potentia, atque passionum impellente vigore fit tumultus in anima, concertatio periculosa, cordis irrequieta turbatio, atque interioris hominis turbulenta confusio. O quot, & quanta patitur anima mea, Domine! Et in tanto conflictu, in angustia tanta omnino deficiente spiritus succo factus sum tanquam lignum aridum in eremo sine virore virtutis in tempore siccitatis. Facta sunt viscera mea quasi
mon-

montes Gelboe, quia nec ros, nec pluvia venit super me; sed sola animæ desolatio, mentis ariditas, cordis amaritudo, virtutum extrema nuditas, atque devotionis summa paupertas. O me miserum! Hæc omnia mala venerunt super me, quia in me abjectus est clypeus fortium, & in me ceciderunt fortes Israel. Abjectus est clypeus, qui est timor Domini, cum ullo absque timore futuri in tuæ Majestatis offensam scelera perpetravi. Ceciderunt in me fortes, dum in carnis obsequium contempsi rationis nutum, & elegi vias iniquitatum liberum depravans arbitrium. Idcirco prohibiti sunt Coeli, ne pluant super terram, & ne rorent desuper super sitientem animam. Hinc est, quod in hac die aruit tamquam testa virtus mea ullo sine sapore erga spiritualia, & ullo sine affectu erga virtutis opera. Si orem, oratio insipida mihi est, atque interdum vado ad orationis locum quasi tractus ad equileum. In tempore orationis intus in corde sentio duritiem filicis, vel naturam imitor adamantis. Servare mandata gravi sine pugna non est. Tantummodò sentio ad inordinatos actus quasi præcipientes carnis impulsus. Non est in terra cordis mei humor junci, neque viror calami, sed ariditas sine affectu, & sterilitas sine fructu. Quid faciam, miser, cum videam Cælum desuper ferreum, & terram æneam! Da benedictionem Pater, quia terram arentem dedisti mihi: da & irriguam aquis. Da irriguum superius,

irriguumque inferius concede roganti; ut non jam quid valeat locum tribuere dolori. Da capiti meo aquam, da flumina lacrymarum, & in gemitu sine cessatione laborans lavabo per singulas noctes lectum meum. Si tu retinueris aquas omnia siccabuntur, neque erunt fruteta in campis, quæ fructus facere valeant: si vero effuderis, subvertent terram. Effunde igitur super me misericordiam tuam, illam mundam aquam de supernis fontibus, qua corda purgantur ab omni inquinamento carnis, & spiritus. Recordare, Domine, quod filio tuo passo in carne scissæ sunt aquæ in deserto, & torrentes in solitudine, ut, si quis sitiat, veniat ad aquas absque argento, & absque ulla commutatione, atque in abundantia miræ dulcedinis dabitur ei bibere de fonte vitæ gratis. Ecce ego, Domine, venio incessu veloci de terra sitienti, ad te, apud quem est fons vitæ; & venio ad bibendum quemadmodum desiderat cervus ad fontes aquarum. O quis ex hac biberet aqua, cujus vi mysticâ hydropis corripiuntur interiora, cujus morbi ipsa sitis est medicina! O aqua, qua mundantur delicta, renovatur natura, sedatur carnis concupiscentia, pacificantur omnia, visibilia calcantur, superna toto cordis anhelitu diliguntur, & bibens nova efficitur creatura ad hominem, qui secundum Deum creatus est in veritate, & iustitia! O quis ex hac biberet aqua! Utrique tali fluminis impetu lætificaretur Civitas tua, quam ædificasti,

siti, anima mea, quam redemisti. O quis
 dabit mihi hujus aquæ poculum, & jam
 non sitiam in æternum, sicut sitit, & sitiet
 ille, qui rogabat Abraham, ut mitteret La-
 zarum cum aquæ gutta ad temperandum
 æternæ inflammationis incendium! Bibat
 anima mea, Domine; venio enim sitibundus,
 quia fatigatus ab itinere. Errans
 sicut ovis, quæ periit, ambulavi per
 montes superbiæ, per valles avaritiæ,
 per prata luxuriæ, per terram prærup-
 tam, desertam, inviam, & inaquosam,
 atque in toto viarum mearum aberrante
 curriculo non inveni, nisi cisternas, ci-
 sternas dissipatas, quæ continere non va-
 lent aquas. Bibi usque modo aquam in-
 sectam veneno, cujus activa vis destruit
 salutem, obnubilat mentem, arefacit vo-
 luntatem, & facit, ut Patria abeat in
 oblivionem. Nunc autem ab iniquitatis
 semita lassus, infirmus, & sitibundus ve-
 nio ad te, o bone Jesu, ut hanc mihi
 tribuas aquam, & fiat in me fons aquæ
 salientis in vitam æternam. Da mihi
 eam, Domine, ut jam non veniam hau-
 rire huc, ubi puteus est altus: in mun-
 do enim non est nisi labor, dolor, &
 gemitus, afflictio animi, & angustia spi-
 ritus. Hydria, qua aquas haurio ex fæ-
 culento hujus mundi puteo, hydria est
 sine solo, quia, postquam concupiscen-
 tiarum sitim expleverim, iterum sitio.
 Aquæ, quas haurio, aquæ sunt turbi-
 dæ, sordidæ, & lutulentæ, quæ biben-
 tis animam replent dolore, & amaritu-
 dinæ. Dum bibuntur, videntur mulcere

palatum, in novissimo autem amaræ quasi absynthium salientes in interitum. Non jam hauriam, Pater Sancte, aquas de puteo sæculi pereuntis: non jam bibam de luto fæcis: da tu mihi haurire aquas in gaudio de fontibus Salvatoris. Dignare compati infirmitatibus meis, & irriget ossa sitientis animæ pluvia voluntaria, quam segregasti hæreditati tuæ. Ecce arida relicta est anima mea, & humorem non habet: contabescit sine succo virtutis, sine liquore charitatis, sine sapore devotionis: ingemiscit sola sine adiutorio, tristis sine solatio, afflictæ sine refugio tanquam granum super petrosa, quæ vim non habent humoris, vel tanquam arbor sterilis in terra salsuginis. Tu autem Pater, qui Agricola es, planta eam secus flumen tuum, quod repletum est aquis, ut in tempore suo referat fructum suum tanquam lignum, quod plantatur secus decursus aquarum. Manda nubibus cœli, ut pluant super terram, terram aridam, & desolatam, terram hispidam omni virtutum germine destitutam. Da tu benignitatem, & terra mea dabit fructum suum. Mitte in arentem animam torrentem illum, cujus aquæ egrediuntur ad tumulos sabuli orientalis, de quo per Prophetam dicis, (1) quod vivent omnia, ad quæ venerit torrens. Scio, quod si hæc in me venerit aqua, statim vivet anima mea, & laudabit te. Eja, Domine, quia dulcis, quia benignus, quia multæ misericordiæ omnibus

in-

(1) Ezech. c. 47.

invocantibus te, exaudi, quia clamo,
 fac, ut inveniam, quia quæro, aperi mi-
 sericordiæ januam, quia pulso. Ulquequo
 clamabo, & non exaudies? vociterabor
 ad te vim patiens, & non salvabis? Quod
 si homo peccator sum, exauditionis causa
 non est orantis persona, sed tuæ im-
 mensæ Bonitatis excellentia. *Exaudivi te,*
dicis cuidam animæ deprecanti, quia in-
vocasti me. Non dicis: exaudivi te, quia
 sanctus, quia justus eras, sed *quia invo-*
casti me. Igitur si sola invocatio [ne quæ-
 so, accipias, Domine in culpam loquaci-
 tatem meam. Bonitas tua, & necessitas,
 quam patior extremam, hanc mihi lo-
 quendi præbent audaciam] sufficit, ecce
 invoco te; exaudi me. Audiivi quendam
 dicentem: *optavi, & datus est mihi sensus:*
invocavi, & venit in me spiritus sapientia.
 Tu scis, Domine, quia desiderio lan-
 gueo: & invoco nomen tuum, donec
 attenuati sint oculi mei suspicientes in
 excelsum. Neque, quia dignus, postulo;
 neque quia indignus, a postulationis in-
 stantia cessare debeo, quia tu, ut exau-
 dias, non respicis ad præteritam orantis
 malitiam, sed ad Bonitatem tuam. Si
 peccata sacramentaliter absoluta forent
 exauditionis obstaculum, quis est homo,
 qui speraret a te petitionis effectum? Ne-
 mo ex cunctis filiis Adam, quia sicut
 scriptum est: *non est homo justus in terra,*
qui faciat bonum, & non peccet: neque
 infans unius diei dicere potest: mundum
 est cor meum, purus sum a peccato.
 Hujus rei scientia confortat cor meum,

ut

ut fiducialiter agam in te. Ne ergo, quæso, confundas me ab expectatione mea. Cito velociter exaudi me, Domine. Converte cordis mei petram in stagna aquarum, & pectoris mei rupem in fontes aquarum. Non est tibi difficile omne verbum, neque abbreviata manus tuâ, ut vivificari non possit a tua misericordia suspirantis anima. Tantummodò dic animæ meæ: salus tua ego sum: & ego dicam tibi in exultatione: salus mea tu es.

Oratio secunda ante prandium.

AD te, Domine, flexis genibus in faciem suam corruit humilis factus confusus. Ne, precor, projicias a facie tua hunc pauperem, inopem, & mendicum, hunc egenum, & compunctum corde humiliter deprecantem, qui nullum respuis ad te reversum de iniquitatis semita peccatorem. Faciem, & non dorsum, ostende mihi in tempore accepto, & ne repellas orantem pro peccatis in tempore opportuno. Hei mihi! quid faciam miser, si me projicias a facie tua, & excludas a misericordia, cum non sit in alio aliquo salus, sed tu solus, sis salus, vita, & resurrectio nostra! Ad quem ibo? ad quem confugiam, ut solatium inveniam? Si ad Principes ire velim, in Principibus non est salus. Si ad homines faciem convertam, quæ mihi spes elucere potest, cum sit universa vanitas omnis homo vivens? Si ad meipsum, non est auxilium mei in me. Igitur ad quem

quem ibo, ut pronunciem necessitates meas? Ad te, qui dicis: omne, quod veniat ad me, non eiiciam foras. Ad te veniam, qui erga nos nimio tractus amore inclinasti Cœlos, & descendisti non horrens Virginis uterum, neque infame recusans Crucis subire patibulum, ut delectes Decreti Chyrographum, atque a diabolicæ tyrannidis iugo saluum faceres genus humanum. Ad te veniam, qui misericordiâ motus, ut de servis Principis huius mundi filios faceres libertatis, indignatus non es apparere mundo in habitu peccatoris: ad te, qui cum sis sine quantitate magnus, pro nobis factus es parvulus: ad te, qui cum sis sine qualitate bonus, inter sceleratos reputari dignatus es: ad te veniam Deum, hominem factum publicanorum, & peccatorum amicum: perditorum hominum amatorem: si enim eos non amares de Cœlo non descenderes. Quod si me nimis timidum, & pusillanimum meæ reddere velint iniquitates, tamen magnam mihi præbent fiduciam latrones, & meretrices. Surgunt Crucifixores, & rapiunt Cœlum: surgam & ego, ut in novissimo forsan contingat eorum habere consortium. Ergo ad te veniam, qui manus habes apertas, & das omnibus affluenter, & non improperas: ad te Crucifixum, qui es mare magnum, & spatiosum manibus, illic miserationes, quarum non est numerus. Ad te veniam immundus ad mundum, peccator ad sanctum, impius ad piûm, æger ad medicum

cum, invalidus ad adjutorium, pauper ad refugium, ut secundum miserationum multitudinem saties bonis animam inanem, repleas in bonis desiderium meum, atque deterfis tuo sanguine meis iniquitatibus coronas me in misericordia, & miserationibus. Ad te venio, qui dicis: *venite ad me omnes, qui laboratis, & oneratis estis*, ut a labore fessus, a peccatorum onere gravatus reficiar, atque iniquitates meas digneris a me longé facere quantum distat ortus ab Occidente. Circumdant me, Domine, multa mala, quibus non æquabitur maris arena. In peccatorum profundum demersus tamquam exosam habui disciplinam, atque ad animæ regulamentum omnino repuli scientiam in tuæ divinæ Legis injuriam. Per perditionis salebras ambulavi, atque per omnem viam non bonam festino pedecucurri. De animæ detrimento vitando nihil sollicitus, parum inter pericula cautus effusus sum gressus dirigens in incertum, donec descenderim in profundum. Nunc autem (hei mihi!) inter densissimam tenebrarum caliginem palpo, sicut cæcus parietem non habens in itinere ducem, nec ullam luminis claritatem. Sed hinc horror, inde terror, inde pavor in via a confusa conscientia. Non dum ambulo, cum jam offendo: gressus ponere patet periculo. Non incedere velle est quidem horrido jacere sepulchro. Quid agam penitus ignoro. In veritate quidem anima mea turbata est valde. Sed tu, Domine, usque quo? Quare tu,
cui

cui datum est nomen super omne nomen nomen Salvatoris, ab iniquitate mea mundum me esse non pateris? Averte, Domine, tot, & tanta mala ab oculis meis: aufer mentis albuginem, & oculi tui videant æquitatem. In nihilum reductus sum, miser, & egens, pauper, & dolens, ab itinere devians, in tenebris ambulans, jacens in custodia, oppressus in angustia, ulla sine substantia, & factus sicut uter in pruina. Erige tu, qui erigis omnes, qui corruunt, de pulvere egenum, de stercore pauperem, de inopia inopem, de luto facis mendicum, & de lacu miseriæ peccatorem. Illumina tu, qui illuminas cæcos, hunc miserum, qui amisso fidere in via virtutis ambulat in loco horroris, & vastæ solitudinis. Illumina oculos meos, Domine, fac, ut videam: & quia propter cæcitatem cordis non potui, ut viderem meæ delyria vanitatis, neque præcipitem cursum in barathrum miseriæ perditionis, illumina tu mirabiliter a montibus æternis, ut videam, & videns abiiciam opera tenebrarum, & induar arma lucis. Ne repellas orantis desiderium, neque a misero peccatore ex toto corde clamante avertas auditum. Quod si profundè peccavi, atque in terra Sanctorum iniqua gessi, tamen major est misericordia tua, quam iniquitas mea. Tu scis, Domine, quia non mentior dicens mea crimina superare maris arenam: sed & si omnem superant numerum, tamen Bonitatem tuam vincere non possunt. Quis sapiens, &

in-

intelliget misericordias tuas? Non fuerunt magnalia in Ægypto, neque mirabilia in terra Cham, neque terribilia in mari Rubro, quale est eripere hominem a peccato. Superexaltaris, Domine, parcens nobis, & nominis tui gloria usque ad altissima. Parce ergo, parce mihi misero: orantis dimitte peccatum: ne, quæso, inveniatur iniquitas mea ad odium: neque peccatum meum sit sicut peccatum Juda, quod stylo ferreo scriptum est, & non delebitur in sempiternum. Confiteor in conspectu tuo, Domine, quia defecerunt in vanitate dies mei, & in malis demoratus sum; sed tantummodó respiciat me oculus tuus in bono, & statim cor meum factum tanquam cæra liquecens ad te revertetur, & anima mea in bonis demorabitur. Elige me, & assume: si enim assumpseris, & elegeris, inhabitabo in Atriis tuis. Quid faciam, miser! ex me ea, quæ debeo, tibi reddere non possum: quia in me non est nisi radix peccati salientis in interitum. Quid potest homo, nisi cadere, & in perpetuum non resurgere? Numquid potest reddere digna, cujus cogitatio prona est ad malum ab adolescentia sua? Non ferunt tribuli ficus, neque mala punica rubus. Tamen scio quid faciam, ut tibi in integrum debita reddam: da mihi, Domine, quod meum est. Mea est humanitas tua: caro de carne mea, os de ossibus meis est. Natura tua divinitas: mea autem humanitas. In te humanitas assumpta fuit, atque ineffabili modo

do unita Divinitati. In me autem rationalis substantia, & caro natura, sicut placuit Auctori. Unde extat illud: nobis datus, nobis natus. Igitur cum sis carne de carne mea, & ego caro de carne tua, per Sacramentum tuæ carnis a quocumque debito reddor immunis: Humanitas enim divinæ naturæ inseparabili nexu conjuncta tantæ est virtutis, ut obligationem superabundanter impleat debitæ satisfactionis. Quæ crimina? quæ peccata? quæ scelera non redimet reddens in integrum tui pretiosissimi sanguinis pretium? quæ sordes dilui non possunt per tuæ passionis salutare Lavacrum? Passio tua est vas olei, quo tibi reddimus creditori nostro, & adhuc vivimus de reliquo. Per passionis tuæ inestimabile Sacramentum non solum solvis cunctorum vincula peccatorum, verum etiam das dona hominibus, & augmenta gratiarum. In sanguine tuo sordentia a delictis vestimenta lavamus: te moriente vivimus, & livore tuo sanati sumus. In Cruce non vibrat gladium divina justitia, sed totum est paternalis amor, nimia charitas, & misericordia. Ecce ego, Salvator meus, Redemptor meus, Reparator meus, ecce ego ante te e Cruce pendentem, ne, quæso, hanc deferas ovem errantem. Recordare, quod sum causa tuæ viæ: da locum inter oves pascuæ tuæ. Non supponit meritum conversionis auxilium: ipse enim dicis: quis ante dedit mihi, ut reddam ei? Igitur si tu, Domine, conversus non es, convertere,

I & cri-

& eripe animam meam; saluum me fac propter misericordiam tuam. Si autem ego conversus non sum, converte me, & convertar ad te: tunc dicam: postquam convertisti me, egi poenitentiam. Manda virtuti tuæ: quia, cum ipse feceris, quis tuæ poterit resistere voluntati? O bone Jesu, si inveni gratiam in oculis tuis, intret in conspectu tuo oratio mea: ne redeat, precor, effectum vacua, sed charismatum donis referta descendat, ut hujus pauperis anima tibi vivat.

S E R M O III.

*Estote ergo perfecti, sicut & Pater vester
Cælestis perfectus est. Matth. c. v. v. 48.*

DE perfectione ad vos, Fratres dilectissimi, sermonem habere jussus, ejus necessitatem in prædicationis aranam deducere supervacaneum existimaui, quia quatenus Omnipotentis Dei Sacerdotes sumus, qui Agnum immaculatum super Altaris aram quotidie offerimus, omnes, nisi quis forsitan idiota, manifestè novimus, quod ex ipsa Sacerdotalis Officii intrinseca conditione in nullo deficientes esse, sed in omnibus perfecti flare debeamus. Idcirco quia res satis nota, atque inconcussa sine controversia, non immoror. Ad opportunitate elucidanda venire oportet.

Dominus noster Jesus Christus, ut nos
con-

conformes fieri imagini suæ ex justitia, quæ ex fide est, obtinere possimus; atque ut etiam Patris, cujus filii nominamur, & sumus, similitudinem referamus, dicit ad nos: *estote perfecti, sicut & Pater vester Cælestis perfectus est*. Magna, & mira sententia, Fratres mei, & quidem serio pensanda intimatio est. Videte quoniam non dicit: *estote perfecti* sicut Abraham, Isaac, & Jacob perfecti fuerunt: sed neque dicit (quod quidem multo majori admiratione dignum) *estote perfecti*, sicut Joannes Baptista perfectus fuit: sed Sanctorum omnium clarissima perfectionis monimenta transcendens ipsum totius bonitatis centrum nobis proponit ad imitandum. Heu! heu! triennis venerat Joannes periclitantis sæculi fugiens tumultus montium tacitos habitare secessus. (1) Habebat vestimentum de pilis camelorum, & zonam pelliceam circa lumbos suos: esca autem ejus erat locustæ, & mel sylvestre: tanta erat ejus vitæ innocentia, & fama sanctitatis, ut etiam Christus putaretur a Phariseis: & tamen, etiam si Christi testimonio major inter natos mulierum, non proponitur nobis ad imitandum. O quam magna confusio Sacerdotum! sed potius dicam: o periculum! Si ille, qui Christum baptizavit, talem vitæ seriem traduxit, ut ejus sanctimoniam admiratus sit mundus, quid nobis facere oportet, qui majorem illo potestatem habemus? Quem igitur exitum, nisi infortunem ha-

I 2

be-

(1) Matth. c. 3.

bere possunt ii, qui, cum propter sacro-sanctum incomparandæ Dignitatis Officium, ne levi quidem criminis umbrâ cor maculent, discretam colere solitudinem, ab omni que hominum conturbatione semoti esse deberent, amant hominum turbas, populi repetunt coronas, mundanæque consuetudinis implicamenta sectantes non jam Sacerdotes esse videntur, sed negotiatores vel milites? Quam sortem consequi possunt, qui non vestimentum de pilis camelorum, non zonam pelliceam induunt, sed tot subtilia habent indusia, tot præclara vestimenta, quot dies habet hebdomada? Et quidem delicatis vestibus uti peccatum est: nam si peccatum non esset, nunquam Christus Præcursores de asperitate laudasset (1). Quid sperant ii, qui non solum locustas non comedunt, nec mel sylvestre, sed gravata corda patiuntur in crapula, & ebrietate? O fratres mei, si ita asperum vitæ institutum Præcursoris exigebat officium, consideret charitas vestra, quam vitæ seriem sibi requirat Sacerdotale ministerium. Propterea Christus Dominus non Baptistam, sed Patrem, qui in Cœlis est, nobis proponit ad imitandum: quia ad implendum, sicuti decet, officium tantæ Dignitatis, non est, nisi Pater, qui possit esse regula perfectionis. Perfectio nihil aliud est, Fratres mei, nisi cor ab omni tam spiritualium, quam sensibilibus proprietate liberum possidere. Est ergo per-

(1) S. Greg. Mag.

perfectio, quam exigit nostra Dignitas, quædam animi nuditas a quacumque aliena rei concupiscibilis affectione, ab omnique libera proprietate. Quod si quis etiam charismatum dona aliquantula cum proprietate possideat, ipse utique a perfectionis semita deviat: quia perfectio tota consistit in eo, quod animus immunis servetur a proprio. Summa insuper debitæ perfectionis in eo sita est, ut Clericus in cunctis conetur contra ictum fluminis, id est, contra torrentem propriæ voluntatis: nam ibi est perfectionis occasus, ubi quislibet residet propriæ voluntatis affectus. Non consistit in tugurio, non in eremo, sed in corde solitario, nudo undique in cunctis a proprio: ut ita dicam, Sacerdos sic de cordis solitudine debet esse sollicitus, ne unquam patiatur, ut, quantumvis minimus, subintret affectus, sed omnium concupiscibilium affectione solutus sic vivat, ut dicere valeat: *Deus, & ego solus*. Ad hanc cordis solitudinem, Fratres mei, ad hanc animæ perfectionem habendam omnium rerum abdicationem docet ipse Christus existere necessariam, dum dicit: (1) *nisi quis renuntiaverit omnibus, quæ possidet, non potest meus esse discipulus*. Huic quidem renuntiationi tamquam fundamento perfectio innititur, atque in spiritualium abdicatione completur. Prima, quæ temporalium abdicationi nuncupatur, conditio est, sine qua nemo esse potest Christi discipulus.

I 3

Se-

(1) Luc. cap. 14. V. 33.

Secunda vero conditio est, sine qua nemo perfectus. Hac impræsentiarum ommissa in sermone quatenus extra propositi metam vagante, atque ad eos, qui per viam spiritus ambulant, pertinente, de prima juvat verba componere. Perfectio alia est Laicalis, alia Monachalis, alia Presbyteralis, & alia Pontificalis. Consistit Laicalis in observantia mandatorum, atque in affectiva abdicatione temporalium; quorum proprietas, si habeatur ex jure, tamen prohibetur in corde: juxta illud: *divitiæ si affluant, nolite cor apponere*. Laicis labor commendatur: sollicitudo vero penitus interdictur. Possunt tamen Laici possidere divitias, fundos, & prædia: sed salvâ justitiæ formâ; quæ si violetur, perfectionis ratio dissolvitur. Monachalis in affectiva, & effectiva simul temporalium abdicatione fundatur. Presbyteralis autem consistit in renunciatione omnium, quæ possidemus, secundum formam, quam exigit Christi discipulatus. Quod si Ecclesiastici possident Ecclesiæ bona, puta decimalia, oblationes fidelium, & pingua beneficia, ea possident, & possidere possunt ex ministerio dispensationis, non vero ex jure proprietatis. (1) Ex Ecclesiæ enim redditibus nihil sibi assumere possunt præter ea, quæ pietatis spiritus non carnalis prudentiæ nutus, ad pauperem vitam, & vulgarem vestitum necessaria judicaverit. Quod si Canonici, Parochi, seu qui Ecclesiasticæ rei sub-

(1) Patet in Conc. Carthagin.

substantia potiuntur, quid ultra ad convenientem statum tenendum necessaria, de Ecclesiæ bonis accipiant, ut in proprios usus convertant, sacrilegium incurrun, rapinam operantur, semetipsos in inferna demergunt: quia Ecclesiæ bona sunt etenim pretia peccatorum, & patrimonia pauperum, quæ non nisi in pios usus converti debere Sacro-Sancti Canones, & Sanctorum Patrum assidui clamores evincunt.

Quid est ergo, quod pene omnes in Ecclesiâ Dei a speciosa seductivæ opinionis fallacia traducti, atque mordacis avaritiæ nefaria passione decepti patrimonia pauperum, victualia pupillorum in proprios usus, utcumque placet, sine conscientiae remorsu convertere non horrescunt? Quid est (quod non sine vivo viscerum dolore dicere possumus) quid est, inquam, quod a violenta invasione, a sacrilega rapacitate, a questus turpitudine facta est hodie Ecclesia Jesu Christi sylva furum, spelunca latronum? Oportet potius quam verba, perfundere flumina lacrymarum, atque die, ac nocte de cordis fundo proferre lamentum. Serpit enim hodie putrida tabes per omne Corpus Ecclesiæ: & quo latius, eo desperatius: eo periculosius, quo interius.

(1) Passim in Clero curritur a doctis, pariter & indoctis, ut hæreditate possideant Sanctuarium non jam quærentes spiritum, sed purum rei materialis emolumentum. Omnes avido impetu

(1) S. Bernard.

tu currunt per inextricabile avaritiæ barathrum, atque famem patientes ut canes circumeunt civitatem quæritantes validioris favorem, ut si forte queant Jesu Christi rapere patrimonium, & de bonis pauperum nummis impinguare peculium. Animam venalem habentes, atque cum diabolo sacrilegum foedus miserabiliter ineuntes adinstar rapacis aquilæ, vel Piratarum more spoliant Dei Templum nihil omnino timentes, si impié diripiant Jesu Christi ærarium imitantes nefariam indolem tyrannorum. Laicus aperto ore fieri vult Clericus, quia in Clero tutó, & sine labore conceditur victus. Clericus pro obtinendo beneficio incessanter sudat. Parochus ad Canonicatum suspiriosus anhelat. Canonicus pro Episcopatu habendo gentiliter agonizat. Episcopus pro Capello in somnis laborat. Cardinalis pro summi Pontificatus apice ambitionis, & avaritiæ febribus æstuat. Omnes avaritiæ spiritu fascinati quæ sua sunt, quærunt, non quæ Jesu Christi. *A minori usque ad majorem omnes avaritia student.* (1) O Ecclesiæ Militantis hora calamitosa, in qua non per Clerum quid cernitur, nisi ferox avaritia! Omnes irrequieto caninæ famis pruritu in ambitionis, & avaritiæ stadio currunt, sitienter ambiunt, pedibus, & manibus repunt, ut si forte possint ad rapinam habere locum. Hinc est, quod ad Præfecturas, & Dignitates ascendere quærant: quas si virtutis, & litterarum me-

ri-

(1) Jerem. c. 6.

cito adipisci non valeant, quandoque pecuniis, vel muneribus impetrant einentes Ecclesiastica sicut in nundinis emi solent boves, & pecora. Superbiæ, & avaritiæ lepra correpti infatigabiliter sudant, ut ascendant usque ad Cœlos: sed oppressi a gloria sicut fulgur de Cœlo cadentes descendunt usque ad abyssos: cogitatio enim ut ascendant, indubitanter a diabolo est, qui primus dicebat in corde suo: *ascendam super altitudinem nubium super astra Dei exaltabo Solum meum.* (1) Igitur ditari, & honorificari appetunt, superexaltari cupiunt, & elevari super cedros Libani: sed quia in ascentionis negotio a diabolo diriguntur, dejecit eos Dominus dum allevarentur. Levate capita vestra, Fratres mei, ingredimini Sanctuarium, & sedulo circumspicite semitas Clericorum, & renunciate mihi, si forsan vidistis Christi discipulum, qui non respiciat ad lucrum, vel ad ascensum. Ad lucrum respiciunt, de quo queritur Dominus dicens (2): *quis est in vobis, qui claudat ostia, & incendat Altare meum gratuito?* Rara avis in terris, cujus intentio non sit filia cupiditatis. Haud facile reperietur, qui non diligat munera, & non sequatur retributiones (3). *Sacerdotes ejus in mercede docebant.* Prædicatores pro modica mercede prædicant, si majorem reperire non valeant: nam si duæ, vel tres Parœciæ, ubi quadra-

(1) S. Vincent. Ferrer. serm. de monte Isaïz.

(2) Zachar. Malach. c. I.

(3) Mich. c. 3. v. 11.

dragésimales sermones habentur, occurrant, pro pinguiori pulpito gentiliter agonizant: atque eo pervenit immodesta multorum avaritia, ut pro Novenario prædicando, vel pro Quadragesima habenda, non pacem evangelizent, sed intestina in populis jurgia disseminent fraternam turbantes populi dilectionem, & tollentes de medio Reipublicæ tranquillitatem. Presbyteri si non habent eleemosynam, non celebrant. Si defunctus pauper sepeliatur, ille solus assistit, qui sub pœna tenetur: attamen in divitis funere Clerici congregantur ut aquilæ. Defuncti pauperis officium rapida cum festinatione persolvitur. Divitis vero magna cum solemnitate cantatur. Canonici, si pinguis distributio fuerit, omnes interfunt. Si vero portio modica distribuatur, pauci numero assistunt. Sunt, qui ad Parochiæ curam anhelant non ovium quærentes lucrum, sed lanam. Non de animarum salute cogitant, sed ad pingue beneficium habent mentem intentam. Cum ad Parochiam, quæ sibi ad victum, & vestitum necessaria præbet, ascenderint, statim irrequietos avaritiæ incipiunt sentire tumultus, atque hæc apud se non rectè cogitant in corde suo: Parochia hæc inops, & pauper est. Illam me oportet, si fieri potest, adipisci: nam habet oves, & boves universas insuper, & pecora campi. Si illam non, illam saltem, quæ abundat fructu frumenti, vini, & olei: sed illa potior absque dubio, cujus campi imple-

pleti sunt ubertate, & valles abundant frumento. Sic in hujusmodi cogitationibus volventes animum noctem, & diem protrahunt. Unde, ut obtineant Prælatum, pauperis Paroeciæ Coelum sibi adversari, vel aliam causam facile fingunt: atque usque in senectam, & senium quiescere non possunt transmigrantes de Parochia in Parochiam propter lucrum. Qui sunt omnes isti, nisi fures, & prædones in Ecclesia, quorum animas in inferna demergit omnium malorum radix avaritia? Qui sunt, nisi simoniaci, cum in eis sit temporale lucrum tota ratio agendi? Cum respectus terrenæ mercedis proponatur, ut finis ita, ut neque Prædicator prædicaret, nisi rem a prædicatione perciperet, Presbyter Sacrum non faceret, si eleemosynam non haberet, Canonicus, quia tenuis distributio, choro interesse negligeret, clara simonia est. O Fratres dilectissimi! quis est in Ecclesia Dei, qui puro oculo solem considerat, & acie non palpitat? (1) *Inruitus sum, & non erat homo.* Omnes quæ sua sunt, quærunt more gentilium: omnes intentam mentem habent ad lucrum more mercenariorum. Quid de ascensu dicam? quid loquar, cum Phariseorum vitia ad nos transiisse videamus, atque immodestius, quam quondam, prævalere palpemus? Quis est, qui abiit post Christum exemplum humilitatis, & Phariseos non sequitur amantes primas Cathedras in Sinagogis, & pri-

(1) Jerem. c. 4. v. 25.

primos recubitus in cœnis? Quis est,
qui quiescit sedens in loco novissimo,
cum stare possit in alto? Ministrari, non
ministrare quæritur in Dei populo: &
quod quidem calamitosius est, multi,
qui adhuc idonei non sunt ad discipu-
latum, doctrinæ, & regiminis cathe-
dram ambire non erubescunt: ex quo
oborta sunt multa mala in Ecclesia Dei
Viventis, absurda, irrationabilia saltem
perpetui digna doloris: (1) difficile est
enim, ut bono peragantur exitu, quæ
malo fuerunt inchoata principio. (2)
Nemo ex prudentibus læto animo crea-
tur Episcopus, nisi temerarius: neque
forſitan benè præfuit, nisi qui intravit
in Ovile quasi compulsus. Quid scele-
stius, quam ambitio in Sancta Civitate?
quid iniquius, quam superbia in Sancto
monte? In schola satanæ discitur: Di-
gnitates appetere: ipse enim dixit: hæc
omnia tibi dabo, si cadens adoraveris
me. In schola Christi docemur Dignita-
tes fugere: ipse enim sciens, quia ven-
turi erant, ut facerent eum Regem, fu-
git in montem. Ecce cujus sub castris
quis militet, innotescit. Quis est Digni-
tatum cupidus, nisi præsumptuosus, &
Clericus temerarius? Numquid tu sapiens
ad officii munus? numquid ad Episcopa-
tum idoneus? Si dixeris: sum etenim:
propulsari debes tamquam superbus. Si
autem dixeris: non: quare ultra suffi-
cientiam super humeros tuos præsumis
gra-

(1) S. Leo. Mag.

(2) S. Ambros.

gravem imponere sarcinam in Ecclesia Dei inevitabile præjudicium, atque in tuæ ipsius animæ detrimentum? Quare non times tantam suscipere obligationem ultra virtutem? Sed o sæculi nostri deploranda calamitas! Jam jam attingimus illa tempora, de quibus ait Apostolus: (1) *in novissimis diebus instabunt tempora periculosa*: sunt enim homines seipsum amantes, cupidi, superbi, elati, qui animam suam tamquam levem stipulam reputantes cum humani generis hoste superbo foedus percutiunt dicentes ei: da nobis honorificentiam, & rerum mundi substantiam, & cætera tolle tibi. Parum interest animarum suarum miseranda perditio, dummodo honoris gloriam assequantur simul cum luero. Hæc solummodo inquirunt, hæc appetunt: atque donec æstuantis animi desiderium expleverint, non dormiunt.

Pungit viscera eorum ambitionis aculeus, & stimulus avaritiæ, ut occupent Sedes Ecclesiæ. Sudant, ut obtineant; obtinent, ut habeant unde impinguentur incrassentur, dilatentur, & recalcitrent: ut voluptuose vefcentes nutriantur in croceis vitam instituentes suavem, non jam rationi conformem, sed vero gentilem. Ecclesiæ occupant bona, ut recondant in theca vinaria generosa vina, in penu pretiosa obsonia, in arcis delicata lintamina, multipliciaque mutatoria serica, byssina suorum corporum curam gerentes, sed de pupillis, & orphanis, quorum

K

rum

(1) Ad Timot. 2. c. 3. v. 1.

rum patrimonia sacrilegè dissipant, nil curantes. Videmus Clericos gloriantes in byssino, in profana capillatura, in veste pretiosa apparentes mundo potius comicos, quam Dei Ministros, insumentes in multiplici ornatu pecuniarum acervos, varia habent indumenta æstiva. hyemalia, venatoria; & pauperes, quos elegit Deus in hoc mundo, in sordida, & lacera veste revelantes quandoque, quia nudi, turpitudinem suam, sine indusio, sine calceis a frigore livida habentes corporis membra: quid crudelius, quid magis impium, quam in suæ vanitatis ornatum bona convertere pupillorum, & nudos eos relinquere, ut pereant in angulis populi adinstar canum? Propter miseriam inopum, & gemitum pauperum exurget Dominus. Quid ultra fecere Pharisæi quam multi Clerici, multi Parochi, multi Canonici, qui pingues marsupio, graciles animo, Sacerdotes unctionis Sacramento, sed fallaces in proposito, ut rem suam agant, egentes spoliant quasi lupi rapientes prædam? In vanitatibus profusè expendunt, quod crudeliter subtrahunt ab ore pauperum. Ipsi per calles gradiuntur in patula pompa, in metreticia vestium cultura; fugiunt cum transeuntibus se collidere quasi apud se dicentes: noli me tangere ne culta vestis discrepet a compositione. Pretiosam hanc vestium culturam Illusoriæ opinionis fucō fascinati justificant, atque honestam reputant, & necessariam, ad conciliandum scilicet statui congruentem ho-

norem, & reverentiam. Sed utique semetipsos decipiunt, qui per exteriorem ornatum honorem quærunt; alius enim est Spiritus mysticæ Civitatis, & alius est spiritus Babylonis. Iste personas accipit in specie. Apud illum non est acceptio personarum, nisi in virtute. Iste honorem defert per insensatos, qui externarum rerum figurâ pascunt gentiliter oculos. Ille est, de quo legimus: *omnis gloria ejus filie Regis ab intus*. (1) Istius honor honor est vanus. Illius autem honor est solidus. Unde Patres nostri in Spiritu Sancto legitimè congregati dixerunt; *Sacerdos honorem, & auctoritatem non externarum rerum pretiositate, & culturâ, sed fidei meritis quærat*. (2) Sobrie, juste, & pie vivat in hoc sæculo Clericus, sequatur sanctimoniam, quia etsi vestem gestet vulgarem, rusticam, vel incisam, magnam statim conciliabit a populo reverentiam. Quæ autem Clerici cogitant de cultæ vestis necessitate ad venerationem conciliandam a fidelibus populi, ratiocinia sunt diaboli, qui sub honesti cultus specie confirmat vanitates, pompas, & profusiones in Ecclesiæ Dei contumeliam, in virtutis ignominiam, & egenorum manifestam injuriam. Medium honestum esse non potest quo, etsi concilietur auctoritas, deseritur humilitas, & reiicitur hospitalitas. Proh dolor! diabolus modicum laboravit, & Clericorum corda facile obtinuit,

K 2

dam

(1) Psalm. 44.

(2) Concil. Carth.

dum sub rationalis politiæ specioso colore pompam in vestibus, profusiones in sumptibus, regium apparatus in domibus, currus, & aurum in curribus, non solum tamquam inviolabilem legem statuit, verum etiam plus solito invalescere fecit. Conciliandæ auctoritatis gratia susflat ad Ecclesiasticorum aures pessima ratiocinia, atque adeo ea figit in cerebro, ut nullius momenti, nulliusque valoris habeatur Patrum sententia ex opposito. Ipse facit, ut Ecclesiastici conciliandæ auctoritatis causa vivant in magna gloria, & nihil, vel parum curent de carne mortificanda. Non decet, inquiunt, olera tantum edere, sive legumina: sed ratione auctoritatis necesse est, ut multiplices parentur epulæ pretiosi valoris. Maledicta auctoritas, quæ Ministros Sanctuarii facit inimicos Crucis Christi. Hinc est, quod Ecclesiastici non proponentes Deum ante conspectum suum, sed apponentes ultra magnificare se super terram sine conscientiae remorsu devorant Ecclesiæ substantiam: Mundi sequuntur gloriam, delectat eos vitam habere jucundam, non formidantes suæ cupiditatis edacem vermem nutrire ex ære legitimo viduarum, sed neque horrentes suæ superbiæ luxum fovere de sanguine pupillorum. Ipsi carnis curam facientes in desideriis dormiunt in molli culcitra: humi vero sine opertorio paupercula vidua. Ipsi sub tecto accubant circumquaque pendente tentorio: pauperes autem hyemali tempore pernoctant

stant sub diu. Non est in Clericis misericordia, sed quædam cordis durities saxo simillima. Omnia sibi volunt, ut large infumant in gula, in luxu, & in superbia.

De Ecclesiæ bonis ædificant Palatia ostendentes mundo suæ superbiæ aper-
tissima testimonia, atque relinquentes posteris suæ tumidæ vanitatis magnifica monumenta. Exornant de pauperum patrimonio domos suas sternentes pretiosis peristromatibus habitacula, atque mira ex vario colore picturâ decorantes cubilia. Sed, quod deterius est, ablatis de parietibus Sanctorum imaginibus ornant habitationes suas mappis, vel mundi descriptionibus, vel depictis scæminis sine vestibus, vel gentium simulachris, aliisque ridiculis historiis. Heu miseri! posuerunt signa sua signa, non Christi, sed diaboli. Per externa pagana gentilica cognoscimus interiora. Emunt viginti argenteis Dianæ balneum, ut exornent cubiculum, & a paupere flagitante solidum faciem avertunt. Ad hoc insuper in Ecclesiam intrant, ut egenorum substantiam transferant in superbiam. Supellectilia ex argento in mensa habere gloriantur, atque in tantum progressa est multorum phylautia, ut non Parochus, non Canonicus, sed homo communis, vel rusticus reputetur, qui argentea pocula ad infundenda vina, & vasa itidem ad inferendas dapes non habet. Quâ conscientia id agere præsumunt, qui ea, quæ possident, convertere debent in cibos esurientum,

atque in instaurandas ruinas Ecclesiarum?

Non sic cujusdam Ecclesiæ Parochus, qui animarum curam gerebat non longe a meo natali solo: is enim ad mensam sedenti Episcopo (venerat Episcopus visitare Parochiam) cochlearia, & fuscinulas de ligno posuit. Episcopus hanc rem ægré accipiens Parochum voluit pecuniaria poena mulctare. Sed Parochus, qui de sua spe, & operatione securus erat, Episcopo dixit: Domine mi, argentum, & aurum non habeo, neque quid aliud temporale, seu terrenum pretio dignum possideo: Omnia, quæ apud me sunt, Domino meo ostendo. Ecce hac in crumena quingenta ducatorum ad refocillandas animas pauperum, ad alimenta, & coopertoria viduarum, & egentium. Si ergo Dominus meus Episcopus mulctare voluerit, mulctet. Utcumque placuerit in oculis suis, faciat. His auditis tacuit Episcopus, atque insignis misericordiæ ediscens, exemplum Parochum laudibus commendavit, sibi in amicitia familiariter junxit. Affluebat ille Parochus temporalium rerum substantiâ: nam septem baptismales fontes habebat illa Parochia: & tamen loqui potuit in conspectu Prælati: argentum, & aurum non est mihi. O felix Parochus! fortasse tu solus peregrinus in Jerusalem. Omnes, quæ sua sunt, quærunt. Omnes sibi commoda sitienter inquirunt. Omnes sibi utilia apertis faucibus ambiunt. Jucundantur in rerum pretiositate, gloriantur in pecuniarum profusione: epulantur quo-

tidie splendide: promptuaria eorum plena eructantia ex hoc in illud: suppediantur mera vina de longinquis asportata Regionibus summo comparata pretio: exquisitæ dapes apponuntur in edulio: ad satietatem edunt, festivé bibunt: honorificat eos multiplicitas epularum: non propter necessitatem comedunt, sed propter purum appetitum convertentes in accidentia substantiam, & in substantiam accidentia: quia tota edendi ratio gula est. Pauperes vero si fame moriantur, nihil interest. Juxta est dies, & adesse festinant tempora, in quibus ventrem escam, & ipsam animam destruat in novissimis epulonum Pater orphanorum, & Judex viduarum. Exemplo revelabitur ira Dei super immisericordes, qui subvertentes lancem justitiæ deficere faciunt egenos terræ. Stabunt in illa die in magna constantia viduæ, orphani, & pupilli, atque in conspectu districti Judicis audietur ex ore eorum querela gravis: (1) ab ore nostro crudeliter subtraxistis, quod in superfluitatibus, in comestationibus, in luxuriis, in pompa, & in vanitatibus vestris expendistis. Aures vestras ad clamorem nostrum obturastis. Nostra deprædati estis adulterantes officium piæ dispensationis. Quid facturam putatis, fratres dilectissimi, cum dies novissima reveletur, Judicem, de quo scribitur, quod *inultum abire non patitur* (2)? Sed heu! heu! Ecclesiasticorum mentes adeo

(1) S. Beng.

(2) Job.

adeo contenebravit ambitionis, & avaritiæ nubes obscura, ut neque futuri memoria eorum moderetur abusus, neque profanos compescat excessus.

Quis non flet videns ita gloriosos incedere Sacerdotes, quos propter divitiarum, & gloriæ jactantiam vocat Dominus vaccas pingues, (1) in auratis curribus procedere cum magna gloria retro sequente in cultis vestibis fervorum ceterâ ambulantes pompaticè per loca publica, atque exaltato corde vani tumoris gratiâ relinquentes ubique suæ timidæ vanitatis impressa vestigia? Quis non doleat videns ab ipsis Sacerdotibus profanatam Jesu Christi Ecclesiam, cum ita in meretricio corporearum rerum nitore in curribus, & in equis strenuè phaleratis, in sæculari pompa, atque in tot fervorum jactantia ardentius laicis de calice bibant Magnæ Meretricis? O miseranda Ecclesia Salvatoris! Ecce substantia, quæ religiose instituta est ad sublevandam egenorum penuriam, superbia eorum, qui discipuli Christi non sunt, sed Leviathan, convertit in pompam. Unde hæc in Ecclesiasticis bonorum Ecclesiæ sacrilega dissipatio? Unde domus eorum pretiosa suppellectilia, præclara vestimenta, mensa luxuriosa, aurata vehicula, magnifica Palatia, luxus, fastus pharisaica pompa & reliquæ vanitates, quas non sine vivo cordis dolore cernimus in Ecclesia? De Ecclesiæ patrimonio foveantur hæc omnia

(1) Amos 4.

omnia. Ipsa vero Jesu Christi Ecclesia in habitu pauperis, facta sicut homo ignobilis, hispida, denigrata, habet diruta, vel saltem nutantia Templa, sine debito pavimento, in Atriis virgulta nata sicut in saltu, & in montibus, nidificant passeres in Altaribus, paramenta lacera, vel corrosa a muribus, fiunt paludes a pluviis de Coelo cadentibus, Ecclesiastici autem ullæ sine remorsu saltem animi dubitantis in curribus, & in equis? Ecclesia Dei deserta adinstar solitudinis, & Sacerdotes in cultu mundanae conversationis? Ecclesia sacris destituta vestibus, & Clerici in pompis, & sæculi vanitatibus? Ecclesia incomposita, inculta, denigrata, similis facta carbonibus, & Ministri Altaris dissipantes Ecclesiæ substantiam cum meretricibus? Quis audivit unquam talia sic horribilia? Subintrarunt vulpes in vineam, ut devastarent eam rapientes uvas, & vix fuit, quæ servaverit a rapina manus innoxias, quia non intrantes per ostium, sed aliunde ascendentes *omnes quotquot venerunt, fures sunt, & latrones.* (1) Pauci sunt, qui intrant per portam, sed perfodientes muros pene omnes latentem intrant, ut excoercent Ecclesiam, ut pauperum patrimonia diripiant, & Ecclesiæ redditibus nobilitent domos suas, consanguineos extollant, atque inclytam, & illustrem faciant familiam. Clericus, cum esset laicus, non habebat nepotes: factus autem Canonico, vel Episcopo ebulliunt tamquam mures.

Hos,

(1) Joan.

Hos, ut ditent, & adaugeant, emunt de bonis Ecclesiæ prædia, possessiones, vel oves, vel porcorum greges, vel tribuunt pecuniarum copiam, ut exerceant mercaturam. Alunt domi consanguineorum copiosam catervam, atque omnes, si fieri potest, divitiis impinguant. Ipsi vero arbitantes ea, quæ Clericus possidet, esse legitima, si Clericus moram fecerit, subripiunt, quod possunt, tranquilla conscientia. Unde multi Clerici non alunt nepotes, sed domesticos fures. Si Ecclesiasticus sit super candelabrum positus, de nepotibus altiora tentat, hoc est, de Ecclesiæ redditibus Villas comparat, & Marchionatum fundat. O deploranda Ecclesiæ calamitas! In quo sacro codice, in qua sacra pagina, in quo Ecclesiastico Canone hujusmodi sacrilegium fieri posse legere, qui talia agunt? Quomodo non timent in gratiam nepotum demergere animas in profundum? Quâ conscientia dic, Clerice, dic, Sacerdos, emis de bonis Ecclesiæ oves, boves, & capras, prædia, villas, & fundos, ut extollas consanguineos? Quid magis justitiæ, & pietatis rationi dissensaneum, quam de Ecclesiæ redditibus Marchionatum fundare? Si in Marchionatum convertere Ecclesiæ bona non est aliena rapere, quid est rapina? Ergo inventum locuti sunt Patres nostri, dum in Synodo congregati dixerunt: (1) *Ecclesia bona patrimonialia sunt pauperum: caveant ergo Sacerdotes, ne de Ecclesia reddi-*

(1) S. Bonifac. P. Concil. Carthag.

bus dicent, sive extollant consanguineos. Quod si consanguinei pauperes sint, ut pauperibus distribuant. Ergo vel erronea est sententia Patrum, vel qui consanguineis Ecclesiæ bona concedunt, salvari non possunt. Ineluctabilis consequentia est. Dicet aliquis: consuetudo est antiqua a potestatem habente affatim nota, & non compressa. Breviter respondebo: multa mala in Ecclesia Dei per patientiam a Sede Apostolica tolerantur, quæ si deducerentur in iudicium, arguerentur. Ad quid opus est, ut Papa hanc pestilentem praxim, imo potius abusum denuo succidat, cum Sacrorum Canonum, & Patrum sententia sacrilegam esse rapinam luce clarius aperiatur? Etiam ipse huiusmodi bonorum exitus hanc elucidat veritatem: nam sæpe videmus hæc bona, quæ ab Ecclesia auferuntur, & consanguineis dantur, vix ad secundam generationem pervenisse. Clericorum bona evanescent tamquam umbra. Non dabunt nepotes radices altas: quod si in tempore germinaverint, cito deficient: quia, quæ male erogantur, male dilabuntur, atque quæ inutile habentur, cito disparent ut nubes a ventis, quia bona maledictionis. O vere deflenda Ecclesiasticorum fasciatio! Carnis, & sanguinis densa nubes contenebrat oculos eorum, ne videant, quia cognati, seu nepotes sunt, qui animas Clericorum in inferna deducunt. Non desunt, qui vel carnis passione seducti, vel parum litterati illud & carnem tuam ne despexeris cognatis favere intel-

intelligent, & quia sensus illos pro con-
sanguineis. Attamen erronea quidem in-
telligentia est: nam secundum Canonici-
cam interpretationem per *carne[m] tuam*
proximum tuum, id est, quemlibet ege-
num debemus accipere: ipse enim est
caro de carne nostra, nosque caro de
carne sua, atque frater in Christo, qui
dicit: omnes vos fratres estis.

Est & alia mortifera lues in Ecclesia,
paupertas avara longe quidem deterior,
quam gula, & abominabilior, quam
pompa. Apparet enim Clericorum innu-
mera multitudo, qui pluris quam ani-
mam æstimantes pecuniam diabolicâ the-
saurizandi pestilentia laborant. Per diem
non quiescunt, per noctem non dor-
miunt, sed cum diabolo vigilant, at-
que cum eo semper exuriunt. Vitam
vivunt crudelem, & rigidam, castigant
gulam, ut quæ ab ore auferunt, in
crumena reponant. Humanam fugiunt so-
cietatem, fugiunt amicitias ob vitandas,
quæ inde oriuntur, expensas, ita ut
etiam in medio magnæ Civitatis vivant
similes facti pellicano solitudinis. Come-
dunt caules, olera, legumina, & quæ-
que vilissima: poma non sana, sed putre-
scientia: vinum, quod bibunt, quando-
que vinum non est, sed acetum: omnia
hæc, & multa alia libenter tolerant, ut
pecuniam (dicam) peculium adaugeant.
Tantalica thesaurizandi fame correpti
tempora observant: at ubi nubes vident
retardantes pluviam, frumenta, oleum,
seu vinum abscondant, donec propter
pe-

penuriam augeatur pretium, & inde majus possint habere lucrum. Quid vilius, quid crudelius, quam hujusmodi Clericorum avara manus? Ipsi sunt non Ministri Dei Viventis, sed homicidæ Communitatis (1): *Qui abscondit frumenta, maledicetur in populis*, & portabit infame nomen ante faciem multitudinis. O quam innumeri reperiuntur hujus furfuris Clerici, qui a sarrana elusi propter avaritiam de nihilo, nisi de thesauro cogitant, quem morientes vel relinquunt absconditum, vel nepotes furantur, vel homo extraneus devorat illum, atque in ebrietatibus, commensationibus, & luxuriis expendunt, quod ille miser congregaverat in fame, frigore, & siti sustinens crudele martyrium, & quod longo tempore retinuerat otiosum. O stulte, hac nocte animam tuam repetent a te, & quæ congregasti, cujus erunt? Thesaurizas, & ignoras, cui congregas ea. Habebit prodigus hæreditatem, & pecunia tua tecum erit in perditionem. Grande periculum, Fratres mei, grande periculum, si moriatur Clericus habens peculium! Si quemadmodum affectus sum, ac sentio, loquar: ejusdem periculi, est mori uno cum aureo ultra id, quod necessarium rationalis prudentia judicat, in crumena, ac si quis moriatur dormiens simul in lecto cum concubina (2): ratio est, quia id, quod repositum habuit, ab ore pauperum suffulit, & non restituit. Secundo, quia qui

L cum

(1) Prov. cap. 11. v. 26.

(2) S. Thom. a Villanova ait uno cum Julio in crumena.

cum auro moritur, cor ejus in auro esse convincitur: quod quidem si ibi non esset, vivens, vivens erogasset. In mortis hora tremenda cor a thesauro avertere est, (1) si non omnino, pene impossibile primo, quia non sine dolore relinquitur, quod cum delectatione retinetur. Est autem amissionis dolor secundæ mortis præcursor. Secundo, quia Clericus in illa hora propter avaritiæ lepram admodum debilem patitur animam. E contra spiritus, qui creati sunt ad vindictam, Scriptura testante (2), in die consummationis effundunt virtutem. O quam grande periculum! O quam grande malum avaritia Clericorum ipsi etenim Regnum Dei non possidebunt: sed erunt foris ut canes, venefici, impudici, homicidæ, & idolis servientes (3). Quod mercenarius, qui uxorem, & filios habet, aliquantulum pecuniæ recondat, non demiror: demiror si quidem, quod Clericus, qui habet fontem in domo, ex quo haurit quotidie indeficientem aquam, faciat sibi cisternam. Nonnulli sub pietatis colore suam nutriunt avaritiam thesaurizandi foventes insaniam: ajunt enim se pecunias reponere, quia in testamento pia opera volunt fundata relinquere: quæ quidem diaboli manifesta tentatio est. Vides viduas egentes, puellas periclitantes, orphanos nudos, esurientes pupillos, peregrinos, & vagos subsidio destitutos, & claudis viscera tua ab eis, quo-

(1) S. August.

(2) Ecclesiastic. cap. 39. v. 33.

(3) Apocal. c. 22.

quomodo credere possumus charitatem habere erga futuros pauperes, qui charitatem non habet erga præsentes? Longe sit a me charitas tua: ipsa enim est non charitas, sed sævitia. Fundas in morte, quia in morte necesse est omne relinquere. Si adhuc viveres, non fundares.

O pestilens avaritia quam laté, quam potenter dominaris in Ecclesia! In primis Ecclesiæ sæculis splenduisse legitur rerum temporalium abdicatio heroica. Postquam autem redditâ Ecclesiæ pace aperta est ad possidendum janua, turbata est iustitiæ forma, & prævaluit pertinax avaritia. Unde verum esse videtur illud, quod a plerisque dicitur, scilicet, quod eo die, quo Constantinus Imperator baptismum suscepit, audita est in Lateranensi Basilica vox dicentis: *hodie effusum est venenum in Ecclesia Dei* (1). Venenum hoc Clericorum avaritiam esse quis dubitat? Ex eo tempore incæpit irrequieta cupiditas Clericorum corda corrodere, & Ecclesiasticos occupare. Constantini pia munificentia causa non fuit, sed occasio. Causa ea est, quæ physicé vel moraliter inducit ad effectum: occasio vero ea est, quæ movere solet affectum. Occasio in re intrinsecé peccaminosa scandalum est: in materia vero honesta, vel indifferente licita. Igitur Constantini donatio pia fuit, sancta, & laudabilis, quidquid in nos verbis malignis garriant hujus illuminati sæculi nebulones, qui in gratiam Principum Ecclesiam temporalia possidere non posse defendunt sæ-

L 2

cu-

(1) S. Vincent. Ferrer. in Serm. S. Sylvest.

culentam Wiclet, Hus, & Hieronymi de Praga (1) cacologiam revocantes, atque immunditiam in sordidam infamiae cloacam jam diu projectam removentes. In prædiis ergo, & possessionibus crimen non datur: sed in male utentibus invenitur. Invenitur in Clericis, quorum occupat interiora pecuniarum fames avara, atque adeo hæc dira pestis invaluit in Ecclesia, ut facta sint hodie in plebis scandalum tyranna viscera Clericorum. Laicis citius currunt ad aurum: velociore aquilis ad mortua corpora feruntur ad argentum, atque tota eorum occupatio est augere peculium. Pauperem in angustia rogantem dato forsitan solido a se repellunt. Quod si pauper preces repetat in humilitate, nesciunt ei respondere pacifica in mansuetudine: sed intonantes dura exasperant pauperem in inopia dicentes ei: *vade: declina*. Tu Parochus, tu Pastor in populo, & egentem dimittis sine subsidio? Qui egentibus ovibus non tribuit eleemosynam, quomodo credere possumus, quod pro ovibus ponat animam? Ego saltem non credam: nam qui in modico iniquus est, in maximo iniquus est. O sacrilega, o crudelis avara manus! Equus tuus stat in stabulo ante præsepe plenum: canes tui abundant panibus, & pauperi nudo, & esurienti vix porrigitur solidus? Sed heu! heu! non solum Ecclesiae bona pauperibus non distribuunt, verum & sunt, qui negotiatoriam artem sacrilego ausu exercentes emunt

(1) Hi omnes damnati sunt a Constant. Concil. sess. 8. & 15.

emunt modico panis in die angustiae inopis suppellectilia pretiosi valoris. Pauper necessitate compulsus dat pretiosa quæque pro cibo, atque ea forsitan vendit obulo. Et tamen Clericus mercator pessimus Sacrum facit sine conscientiae scrupulo? O quis det, ut Jesu-Christi sponsa, quæ ita turpiter dehonestatur, ab hujusmodi Clericorum pestilentia libera gloriaretur. Utinam hujuscemodi Clericorum adultera generatio finem haberet, qui libellum repudiî dantes Sanctuario, infami, atque crudeli incumbunt mercimonio. Sed utinam alia pessima, & germana avaritiæ soboles itidem extingueretur, quæ in Ecclesiæ ignominiam, & Ecclesiastici Ordinis despicientiam miserabiliter invalescit. Soboles hæc Clerici sunt, qui propter terrenum emolumentum, seu turpe lucrum vilia gerere munia non verecundantur inservientes in domibus divitum, equitum, vel Marchionum, ut Factores, Pincernæ, Pedissequi, & foëminarum clientes. Ipsi sunt, qui abiectâ Sacerdotali debitâ reverentiâ curam gerunt de coquina, dispensantes coco saleem, carbonem, & oleum, servis annonam, pistori farinam, & alia hujusmodi. Ipsi curam agunt de Vinitoribus, de Agricolis ponentes rationem cum eis, & operariis reddentes mercedem laboris. Alia nec non domestica exequuntur munera conditione Servilia non jam Clerici, sed potius famuli: non jam Sacerdotes, non Ministri Altaris, sed actores infimæ servitutis. Quid turpius, quid indecentius, quid ignominiosius, quam Sacerdotem di-

vino dicatum Ministerio in laicorum domibus se tam indecoro, tam vili mancipare servitio? Idcirco Clerici facti sunt hodie contemptibiles valde. Nos proterunt sæculares, despiciunt nos, confundunt nos, in faciem nos cædunt, non verentes Sacrosanctum offendere Sacerdotium. Quare hæc patimur, Fratres dilectissimi? Quia, ut ea, quæ in mundo obtinere desideramus, habere possimus, aliena prorsus ab instituto negotia assumimus; quia digna vilipendio gerimus.

Percute cardinem, & commoveantur superliminaria, ait Dominus per Prophetam (1): avaritia enim in capite omnium, & novissimum eorum in gladio interficiam. Peccata populi mei comedunt, & ad iniquitatem eorum sublevant animas eorum (2). Idcirco comedent, & non saturabuntur (3). Væ, væ qui opulenti estis in Sion Optimates, capita populorum ingredientiæ pompaticæ domum Israel, qui ut faciatis vobis in domo mea nomina superborum, conteritis super pulverem terræ capita pauperum. (4) Numquid super his non visitabo, & in gente tali non ulciscetur anima mea? Cito velociter arguam in ira mea inclytos populi mei animo superbientes, atque disperdam in furore charitatis fœdera dissipantes. Ab eis auferam ea, in quibus habent fiduciam nutriendes superbiam: & scient, quia ego sum Dominus.

O Fra-

(1) Amos c. 9. v. 1.

(2) Osee c. 4.

(3) Amos c. 6.

(4) Jerem. c. 5.

O Fratres charissimi, ecce impleri pal-
pamus, quod scriptum est. Ecce flagellat
nos Dominus, sicut comminatur in Scri-
ptura, dum permittit, ut sæculares a no-
bis auferant temporalia. Vos ipsi videtis
quot, & quanta patiatur Mater Ecclesia.
Quæ autem est hujus tribulationis causa?
Ecclesiasticorum avaritia. Quare nos per-
cutit Dominus? quia bonorum dispensa-
tionem malè gerimus, & adinstar Villici
diffamati ipsius bona dissipamus. Vix vi-
detur in Clero misericordia: videtur autem
profana pompa, superbia, divitiarum ja-
ctantia, & pertinax avaritia. Idcirco ve-
nit super nos ista tribulatio: atque uti-
nam in temporalium spoliatione finem ha-
beat, & ultra non procedat. Sed cor
meum majora mala formidat. Legistis in
Scriptura, quia *per quæ quis peccat, per
eadem torquetur* (1). Peccavimus per avari-
tiam: & ecce bonorum sustinemus jactu-
ram. Hujus percussuræ, Fratres mei, effi-
cax medicina alia non est, nisi lacryma-
bilis poenitentia. O tu Domine, suavis,
& mitis, & multæ misericordiæ omnibus
invocantibus te, recessimus a Testamento
Sancto tuo: peccavimus, & verè deliqui-
mus, & ut digni sumus, non recepimus.
Post nostrarum carnalium cogitationum
studia abeuntes vocî tuæ non obedivi-
mus, sed a te vocante aures avertimus,
& avaro corde Sancta violavimus. Sed
tu, quoniam benignus es, attende de Cœ-
lo, & cogita de nobis: aufer iniquitates
nostras, & consistentes tibi ne perdas,
& fac

(1) Sapient, c. 11.

& fac nos tuo dignos Sanctuario, ut fideliter expleto vitæ curriculo edamus, & bibamus super mensam tuam in Regno tuo. Amen.

Q U I N T A D I E

ORATIO PRIMA IN MANE.

Usquequò clamabo, Domine, & non exaudies? vociferabor ad te vim patiens, & non saluabis? Clamavi, & clamo manibus meis die, ac nocte contra te, & non exaudis me. Sto extollens manus meas in Sancta, & non respicis me: sed in duritia manus tuæ adversaris mihi quasi Coelum ponas adinstar ferri. Usquequò irasceris super orationem servi tui, continebis te, tacebis, & affliges me vehementer? Si inter me, & te dividerunt peccata mea, & dignus inventus sum, ut me proijcias a facie tua, quare ab iniquitate mea mundum me esse non pateris, & cordis mei non sanas sauciata vulnera tu, qui solo sermone restauras universa? Quare non indulges misero peccatori, & non dimittis crimina delinquenti, cum sis Agnus Dei, qui tollit peccata mundi? Credo Scripturæ dicenti: *Altissimus odio habet peccatores*. Illud tamen scio, quod si peccatores non amares, de Cœlo non descenderes. Idcirco, quia amas nos, inclinasti Cœlos, & descendisti apparens mundo

do in similitudinem carnis peccati. Accepta non iusti, sed servi formam militasti in nostrae carnis substantia: ut per hoc instrumentum Divinitati conjunctum donares nobis omnia delicta. Et haec est, Domine, spes nostra Humanitas tua. Os tuum, & caro tua omnes nos. Igitur nemo carnem suam odio habuit. Amas nos, & quidem nimium: si enim quis, dum in humanis ageres, te invenire volebat, non te querebat in domo Matris tuae, quae super omnes sanctissima creatura est: non in domo Praecursoris tui, quo inter natos mulierum non surrexit major: sed in domibus publicanorum, & peccatorum: ibi inveniebat te, Domine, qui te querebat, in domo telonarii turpissimi negotiatoris, & in domo mulieris peccatricis: inveniebat te non cum mundis, sed cum leprosis, cum paralyti laborantibus, & daemonia habentibus. Cum huiusmodi inveniebaris, pro quibus fortem ut mors ostendisti dilectionem, donec temetipsum tradideris pro peccatoribus innocentem. Nimium me diligit, qui pro me vitam ponit. Posuisti pro nobis animam ut Pastor bonus: atque non solum das animam, ut Decreti chyrographum in Cruce deleres, sed etiam patibulo adactus proprio sanguine pascis oves. O miranda dignatio! Tu ipse Sacerdos, & Sacrificium: Pastor, & cibus ovium. Quid debuisti ultra facere, & non fecisti? Quid adhuc retines, quod non dederis? Neque tu quidem habes quid amplius possis dare: neque nos habemus quid ultra petere. Dicat apud
 se

se stulta cogitatio mea quodcumque voluerit, quibus scilicet meritis Coelum intrare praesumis? quia cum divinae inseparabiliter copulata sit humana natura, morte tua intercedente mundamur a peccatis in tui sanguinis effusione multo melius, quam a lepra mundatus est Naaman Syrus in Jordane. Habemus Pontificem Deum simul & hominem, cujus morte pretiosa manet in integrum satisfacta divina Justitia. Ipse longè fecit iniquitates nostras in Cruce, quantum distat ortus ab Occidente. Igitur tantâ circumdatus misericordiâ cur timebo in die mala? Hei mihi! timeo, Domine, quia scelera mea multa, & dies iræ dies illa. Novissimæ tubæ sonitus turbat me: cumque mecum recogitem meæ crimina juventutis, & oculos judicantis, horrescunt pili carnis meæ a facie pavoris. Propterea adhærente pavimento anima mea, humi prostratus, atque humiliter ex animo provolutus deprecor faciem tuam in toto corde meo, ut in abundantia tuæ divinae pietatis eripias me de lacu miseriae, & de luto faecis. Remitte mihi, Domine, remitte mihi, ut refriger priusquam abeam, priusquam deposito mortali corpore vadam ad terram tenebrosam, & opertam mortis caligine: quia non mortui laudabunt te, neque confitebitur tibi pulvis. Parce mihi misero peccatori, & ne tradas animam meam crudeli. Usquequò non parcis mihi, abjectum non reducis in misericordia, & non lavas me ab iniquitate mea? Ubi sunt misericordiae tuæ antiquae, Domine? Per
Isaiam

Isaiam dicis: adhuc illis loquentibus ego audiam. Ecce raucae factae sunt fauces meae: quia laboravi clamans, & rugiens a gemitu cordis mei, ut ostendas mihi misero peccatori salutare vultus tui. Sed quó a me ardentius quæreris, eo citius elongaris. Surgo, & venio ad te media nocte pulsans, mittens in astra clamores, ut cominodes mihi tres panes, quia amicus meus venit de via, & panis non est in domo mea, quem ponam ante illum. Amicus meus animus meus est, qui ab itinere fatigatus languens jacet sine viribus: non enim est in eo vigor virtutis, neque fervor ad cursum suscepti itineris, neque calor devotionis ad opera charitatis. Idcirco venio ad te, ut cominodes mihi tres panes, fidem vivam, spem robustam, & charitatem heroicam. Tres panes peto a te, Domine, ne mihi deneget, antequam moriar, scientiam, sensum, & sapientiam; scientiam, ut cognoscam in terra viam tuam. Sensum, ut intelligam in via immaculata. Sapientiam, ut mecum sit, & mecum laboret in iustitia, atque hac irrigante viscera salutaris pluviae centesimum fructum afferam in patientia. Sed quia non in solo pane vivit homo, animam esurientem tuo refice verbo. Vivus namque, & efficax est sermo tuus, & penetrabilior omni gladio ancipiti. Fiat super me, Domine, in hac hora: a regalibus Sedibus veniat, atque in viscera penetrans animae suspirantis de voluptatis tuae torrente inebriet cor, quod amoris desiderio languet. Eja, Domine, exaudi

de

de Templo Sancto tuo vocem meam, & fac me audire vocem tuam. Exurge, quare obdormis, & oblivisceris inopiæ meæ? Si quiescis jam in cubili tuo cum pueris tuis, qui per fidem vicerunt regna, atque deposita carnis sarcina: lætantur in gloria, memorare quia nihilominus puer ego sum, qui quanquam adolescentulus, & contemptus, tamen justificationes tuas non sum oblitus. Noli itaque reprobare me a pueris tuis. Non in justificationibus meis preces prosterno, sed in miserationibus tuis multis tuæ immensæ Bonitatis clementiam exoro. Surge ergo de cubili inter pueros tuos, & da mihi quotquot habeo necessarios. Absit, ut a janua discedam, donec desiderium meum a te, qui das omnibus affluenter, obtineam. Panem peto non lapidem: ovum non scorpionem: piscem non serpentem: Spiritum tuum de altissimis, cujus aqua munda diluente crimina peccatoris, convalescat puer ille tuus ad opera charitatis. Usquequò petam, & non accipiam? Usquequò quæram, & non inveniam? Usquequò pulsabo, & non aperies januam? Propter improbitatem saltem exaudi me. Non possum non in te confidere, Domine: etiam si moram feceris, expectabo te: quia nunquam tu petentem a te salutem dimisisti inanem, neque optatam roganti fraudasti consolationem. Quis non sperabit, ut exaudias vocem orationis, cum etiam ipsum diabolum te deprecantem audieris (1)? Rogabant dæmonia ne imperares illis, ut in abyssum irent: sed

ro-

(1) Lucæ c. 8.

rogabant te dæmones dicentes; (1) si ei-
cis nos, mitte nos in gregem porcorum:
& dixisti illis: *ite*. Si ergo Legionem exau-
disti, quare fiduciam non habeam, quod
exaudies hominem, quem tuo pretioso san-
guine comparasti? Si rogantes audisti dæ-
mones, potius homines: nam propter ho-
mines, & propter nostram salutem descen-
disti de Cœlis, & incarnatus es. Hac in-
finita Bonitate confusus, atque magna fi-
ducia roboratus supersperabo semper, ut
in multitudine miserationum Domini Sal-
vatoris benignè exaudias vota rogantis,
& prævenire me indulgeas in benedictio-
nibus dulcedinis. Quis est, qui desperet,
ut annuas postulatis, cum statim admise-
ris preces Legionis? Infernorum abyssus
locus est, qui paratus est diabolo, & An-
gelis ejus, & tamen rogantibus ne mittas
eos in sibi paratum locum, præstas audi-
tum. Differs ad tempus: attamen differre
concedere est. O benignissime Jesu, quam
bonus, quam suavis, quam misericors, quam
dulcis! Sit nomen tuum benedictum in sæ-
cula ab omni creatura, quia multa nimis
tua misericordia non solum super justos,
sed etiam super ingratos, & malos.

Oratio jecunda ante prandium.

O Quot, & quantis tribulationum an-
guistiis convolvitur anima mea, Do-
mine! Coangustant me undique multa ma-
la, quæ tamquam prælo constringunt, &
commovent de loco suo viscera mea. Te-
M ne-

(1) Math. c. 8.

nebrofus turbo cor poffidet, & occupante terrore defertam animam ago dies, quibus nunc milito, in fletu, et planctu bibens de vino amaritudinis, & jugiter victitans de pane tribulationis. Ardua in anguftia pofitus rugio a gemitu cordis mei levans in cordis impetu vim clamoris ad te, qui habitas in Coelis. Contriftatus fum enim in exercitatione mea a voce inimi- ci, & persequentis. Immittit inimicus meus in me cogitationes multas, & malas torquentes cor meum, ut ablata fpe promiffæ falutis desperem a gloria retributionis. Peccatorem me videt, aridum, defolatum, indevotum, sterilem, fine affectu virtutis, fine fervore charitatis, fine fucco devotionis agentem vitam utpote qui accepit in vano animam fuam; & vocem arroganter exaltans ait Angelis fuis: persequimini, & comprehendite. Deus dereliquit eum. O me miferum! Conturbant animum voces adverfariorum, nimiusque terror comprimit offa mea conftituens animam in anguftia. Hoc in terrore tuarum miferationum memoriam faciens refpondeo eis: ego autem ad Deum clamabo: & Dominus falvabit me: in Deo falutare meum: Deus auxilii mei, & fpes mea in Deo eft. Igitur fuper inimicos meos defpiciet oculus meus. Sed ipfi tamquam catuli leonum rugientes, ut rapiant, dicunt animæ meæ: transmigra in montem ficut paffer. Impellunt me, Domine, ut vadam per falabras perditionis, & non revertar. Ego vero fperans in te, qui falus mea es, audacter dico eis: Deus meus, & Salvator meus

meus, adiutor meus non emigrabo. Sed ipsi frendentes in me dentibus suis adhuc in ira molesti erant mihi dicentes: quando morietur, & peribit nomen ejus. At tamen ego & si pavore concusus, fidei scuto munitus respondeo eis: non moriar, sed vivam, & narrabo opera Domini. Ipsi vero adhuc de perditione mea habentes fiduciam magis, ac magis clamant tentantes subtiliter, & persequentes crudeliter, quos ad aures loquentes audio: devorabimus. O Deus cordis mei, usquequó improperabit inimicus? Quare me quasi solum relinquis in certamine, & pauperem, cui non est adiutor, despicias in opportunitatibus, in tribulatione? Non ad te pertinet pupillum eripere de manu fortiorum ejus, & liberare animam inopis a facie tribulantis? Quare avertis faciem tuam a me? Recordare quia tu es, Deus, fortitudo mea. Coarctor nimis in conflictu adversariorum: irruunt in me fortes irreparabile minantes excidium, & quasi certum sibi pollicentes de certamine triumphum. Et tu in tanta angustia, in tribulatione tantā faciem tuam abscondis, & animam meam non liberas de manu diripientis? Apprehende arina, & scutum, & veni in adiutorium meum, quia tu es, Domine, qui in potentia virtutis tuæ molas confringis adversario, atque in multitudine roboris tui bella conteris ab initio. Quis sum ego, ut certamen inire præsumam cum rugiente leone, cum Behemot antiquo serpente, cui datum est bellum facere cum Sanctis, & vincere eos? Ipse patres

nostros adhuc carnis rebellionē carentes ab optimæ pacis culmine dejecit. Ipse gigantes in sanctitate protrivit: ipse sapientes delusit. Quid igitur huic misero non timendum, qui malesuadæ carnis involucria secutus justitiæ semitas ignoravit? Ipse beligerandi arte doctissimus est. Ego vero carnem habeo pessimam sociam amicam suam etiam me nolentem captivantem in Lege peccati, & retrahentem me a lege justitiæ. Quæ ergo spes victoriæ, cum ita debilem patiar animum, & non habiter in carne mea bonum? O Domine! inopem per carnem, cujus portionem occupat, sine cessatione periculosus hostis exagitat. Ibi sedet quasi leo in spelunca sua occupans carnem, ut si forte possit, in occultis trucidet innocentem, superiorem portionem. Neque reflexa ejus malitia in eo est, ut ad malum impellat, sed ut malum, ne malum esse videatur, sub verisimilitudinis speciebus fraudolenter abscondat. Nonnunquam ut incautos deiciat a culmine mentis, transfiguratur in Angelum lucis. Combinat species: revolvit humores, simulachra ingerit in phantasias, exagitat carnis potentias: unde factio passionum tumultu fit, ut appareat virtus heroica falsa justitia. O quis cognoscere potest astutias diaboli, Domine? Quis cognoscet dentium hujus tortuosi serpentis armaturam, arcum, & pharetram, atque quam parat, ut trucidet in occulto, ancipitem sagittam? Ipse cum suis narravit, ut absconderet laqueos, & dixit: quis videbit eos? Quis revelabit faciem indumen-

ti ejus? **P**ortas vultus ejus quis aperiet? Non est super terram potestas, quæ comparetur ei, qui factus est, ut nullum timeret. O tu Pater luminum, illumina tenebras meas, ut hujus homicidæ reflexos calles agnoscam: circundet me sperantem in misericordia tua tuæ protectionis scutum, nequando dicat: prævalui adversus eum. Ne me, precor, deferas in tempore malo concertantem cum hoste superbo, qui est arte belligerandi cum triumpho doctissimus ab initio. Igitur pone me juxta te: doce manus meas ad prælium, & digitos meos ad bellum, quia tunc non timebo a facie insultantis, cum tu mecum sis tamquam bellator fortis. Usquequò oblivisceris me in finem? Respice de Cælo, & cogita de me: neque tradas bestiis animam confitentem tibi, & invocantem nomen Sanctum tuum in die belli. Si (quod absit) averteris faciem tuam a me, quò ire potero? Ecce perditio mea ex me: auxilium meum tantummodò ex te. Domine vim patior sanguinolentum sustinens inimicum: accelera: noli tardare, ut præstes adjutorium. Alliga in fortitudine tua Fortem armatum, atque de cordis mei atrio expelle occupatorem iniquum, qui per fallaces illecebrarum delicias possedit usquemodò rationales potentias, atque deducens me suaviter per vitia blanda ambulare me fecit in via tenebrosa. Portabat me ad hujus nequam sæculi gloriam tamquam ovem ad victimam, & ego nesciebam. O quanto dolore, Domine, concutitur anima mea, cum in me reversus

agnosco, quoniam te Pastorem sequi stultus recusavi, & post carnivorum lupum venire non exhorui. Te æternæ vitæ pascua pollicentem insipiens deserui: te paterno amore vocantem audire contempsî: & homicidam ab initio in interitum ducentem sequi in deliciis habui. O me milies miserum! Erravi, Domine, erravi: Pastorem reliqui, & lupum elegi. Relinque in deserto gregem, & quære me mei sollicitus ovem errantem: atque inventum in hac horrida sæculi solitudine impone me super humeros fortitudinis tuæ, & reduc me, ne penitus peream, in ovile. Tu es Pastor meus essentialiter bonus: Pastor, & pascua: Pastor, qui electas proprio sanguine pascis oves: pascua, quæ dat debilibus crassa in pinguedine carnes. Eja, Domine, quære me valido cum clamore balantem: ne obtures aures ad ovis clamorem, sed adjunge me ad oves pascuæ tuæ, ubi non est vitalis cibi indigentia, neque salientis aquæ defectus, neque ruina maceriæ, neque transitus. O quis mihi tribuat, ut pane de Cœlo præstito cibares esurientem, & satiares bonis animam inanem! Quis det, ut de torrente voluptatis tuæ potares siti laborantem, & de petra melle saturares inopem! Quando hæc erunt, Domine, ut de mensa, quam parasti in conspectu meo, assumat anima fortitudinem adversus omnes, qui tribulant me? Coarctor in angustia sustinens per momenta periculosa certamina. Crudeliter persequitur pauperem insensissimus hostis: circuit, ut devoret quasi leo rapiens,

piens, & rugiens: & quia nisi tu eras in me, forté vivum deglutisset me, & fuisset similis descendantibus in lacum, ubi non est nisi fletus, & stridor dentium. Festina, Domine, in adjutorium; neque exaltet super me caput suum Leviathan Princeps superborum, antiquus ille tyrannus, qui ambulans in magnis, atque in mirabilibus super se super astra Dei exaltare præsumpsit Solium suum volens tibi usurpare gloriam propter superbiam, & nostram perdere miserabiliter animam propter invidiam. Circumeinge me, Domine scuto virtutis tuæ; indue me Dei armaturam, ut possim stare adversus insidias Diaboli. Da mihi puero tuo viriliter inire certamen: concede superbum vincere leonem, atque super excelsa mea deduc me victor in psalmis canentem.

S E R M O IV.

His plagatus sum in domo eorum, qui diligebant me. Zachariæ c. 13. v. 6.

O Quis dabit capiti meo aquam, & oculis meis fontem lacrymarum, & deducet quasi torrentem lacrymas pupilla oculi mei plorans die ac nocte per vitæ residuum infanda mala, quæ invalescunt in domo Dei coram facie populorum! Quis det, ut in Scythica nemora ab omni prorsus conturbatione semota venirem, vel in Oaxim magnam mortalium plantis impe-

imperviam sine comite penetrarem, ubi brevi clausus in antro similis factus viverem pellicano solitudinis, & sustentarer, quandiu vixero de pane lamentationis! Heu, heu! quis mihi hoc tribuat, ut auferat mala ab oculis meis, & jam non aspiciam hominem ultra, donec jacentem in gemitu occupet hora novissima, & me nimium dolentem separet mors amara! Anxiata est valde anima mea, Fratres charissimi: sedet in angustia vivo transverberata dolore, & tota oppressa amaritudine. Video enim Magnificos domus Dei cum injuria pietatis, cum infamia virtutis, cum ignominia Ordinis projecisse a se stolam Sacerdotalem, & induentes infimæ servitutis amictum mutasse colorem: video Ecclesiasticum Statum projectâ post tergum justitiæ formâ, quam tanti muneris excellentia requirit a Sacerdote, in sui vulnus atque in Ecclesiæ dedecus a Dei spiritu defecisse: atque taliter se gerere moribus, qualiter usque modo in temporum Chronologia non legimus: video Altaris Ministros transmigrasse de monte Sanctificationis in terram falsuginis ad mores indisciplinatæ gentis, turpiterque corruisse in platea Civitatis: video Inclytos Civitatis Sanctæ deserto sanctitudinis loco in Babylonem venisse, atque commutantes signa Sacerdotalia accepisse characterem bestię, dum post delyramenta sæculi pereruntis apparent incedentes quasi temulenti a calice Babylonis. O! quis non fleat, quis non proferat vivo cum dolore lamentum videns conglutinas cum terra ani-

ani-

animas Sacerdotum, & conformes huic
 sæculo Ministros Dei Viventis, qui infer-
 viunt Sanctuario? Quis non doleat videns
 filios Excelsi abalienari retrorsum confun-
 dere Ministerium, profanare Dignitatis of-
 ficiū claudicantes a semitis suis, semeti-
 ipsos in inferos demergentes, atque pra-
 vitatis exemplo plebem Christi sicut escam
 panis devorantes? Oportet potius, quam
 sermonem habere, lachrymis operam da-
 re. Hanc de Coelo prospiciens vitæ de-
 formitatem conqueritur Dominus, atque
 tactus dolore cordis intrinsecus lamenta-
 tur dicens: O vos omnes, qui transitis
 per mortalitatis viam, attendite, & vide-
 te, si est dolor, sicut dolor meus! Ecce
 qui edunt mecum in mensa, levaverunt
 contra me calcaneum suum. Foderunt ma-
 nus meas crudelius quam ferrum, scelera
 Sacerdotum: & *his plagatus sum in domo*
eorum, qui diligebant me. Obstupefcite, Cœ-
 li, super hoc, & portæ ejus desolamini
 vehementer; quia is, cujus ineffabili pro-
 videntiâ totus regitur mundus, sustinet a
 peccatoribus plagatas habere manus. Filios
 ennutrivit, & in sublime posuit: portavit
 eos per hujus peregrinationis horridam so-
 litudinem sicut mulier charum, quem ge-
 nuit, portat infantem. Sed ipsi in arcum
 pravam conversi super exaltantem eos ma-
 gnificant supplantationem. Quis audivit
 unquam talia horribilia, quæ fecit nimis
 Sacerdotale genus, gens sancta, tribus ele-
 cta? Quid est, quod perforatas patitur
 manus, & amaré volvitur in doloribus
 candidus, & rubicundus electus in milli-
 bus?

bus? Amici, & proximi confixere reddentes odium pro dilectione. Per manus enim Sacerdotes figuraliter exprimuntur: ipsi namque operantur in domo Dei offerentes Sacrificium, & prædicantes Dei verbum. Duo hæc præcipua sunt munera Sacerdotum, quibus ex ipsa Officii natura in vinea Salvatoris incumbunt. Unde quia manus pollutæ, quia Sacerdotes Sacratissimi instituti fœdera dissipantes, atque concupiscentiarum legibus inhonestè fervientes transmigrarunt ad carnalia, quæ rulas voces ingeminat Dominus dicens: *his plagatus sum in domo eorum, qui diligebant me*. Sed quid sunt, Domine, plagæ istæ in medio manuum tuarum? Sacrilegia sacerdotum; quæ quidem duas crudeles plagas comprehendunt scilicet pessimum vitæ institutum, & scandalum. Istæ sunt plagæ in medio manuum tuarum, Domine: & quasi non ista sufficiant ad lancinandum animum, super dolorem vulnerrum tuorum plagam desperabilem addiderunt, impœnitens cor.

(1) Depone, depone, anima mea, jucunditatis, & lætitiæ vestimentum: sede in pulvere induta cilicium, & fac tibi planctum amarum ab imo eructans pectore verba plena dolore: quia profanatum est usque ad summum Atrium Altaris, atque adulteris, & non filiis plena est terra sanctificationis. Ulula satis, anima mea, mittens in sidera voces: voca lamentatrices ut sedeant tecum lugentes indefesso a lacrymis oculo invalescentia mala.

(1) Prima Plaga.

la, quæ pietatis oculus videt in Sanctificio. Videt oculus, & utinam oculus non videret, quod montes excelsi, qui in circuitu Dei sunt, verticem inclinantes in terram humiliaverint gloriam suam. Videt oculus, quod Ecclesiastici seductivâ male-suadæ carnis opinione traducti, atque immodestæ passionis spiritu miseré fascinati sanctitudinis loco valere jussu recedant a Sanctuario, & libeat infami tyranni Principis se mancipare servitio, dum proijcientes post dorsum sacratissimum sui Ordinis institutum ad profanas mundi quæstiones irrequieto conatu corda convertunt. Videt oculus, quod Altaris Ministri de morum disciplina nihil animo revolventes, atque de vitæ sanctimonia minimé cogitantes violent Templum Domini; siquidem acceptâ quasi in derisum reverentiâ Sacrorum majorem inde ad perpetranda mala licentiam assumunt, unde exactioris vitæ deberent accipere regulamentum. Videt oculus, quod animam tamquam levem stipulam reputantes Materialistarum mores totis viribus imitentur, atque mundanæ phylosophiæ delyramenta cervicosâ quadam animi temeritate sequantur. Videt oculus, quod spiritus renovatione contemptâ effusa sint viscera Sacerdotum per mundi theatrum, atque laxatâ penitus casti pudoris habenâ facti sint populis in proverbium. O miseranda hujus nostri temporis hora! Prævaluit super laicorum vitia Clericorum execrabilis arrogantia. Laici, quia forsitan pauperes sunt, & stulti ignorantes viam Domini prolabuntur in

vi-

vitia carni servientes in lege peccati. Sed Sacerdotes, qui cognoverunt judicia Dei sui, in quibus subest divinæ Legis scientia, magis hi simul fregerunt jugum, ruperunt vincula (1): magis hi extenderunt manus suas ad perpetranda mala transgredientes legitima Dei sui inverecundâ fronte, atque prætereuntes sermones Dei pessimé. Versa in desuetudinem sanctarum Legum custodiâ, factâque in oblivionem Sacerdotali Ministerio competente justitiâ fervet in Clero liberrimæ vitæ contumax arrogantia. Prævalet in sacerdotio incomposita vivendi ratio, effrons morum dissolutio, Sacrorum impia despectio, & tantummodó retenta est, ne Clerici perdant a proprio, & ut placeant sæculo, politica compositio. A prædominante passione Clericorum devoratâ sapientiâ potentes in iniquitate gloriantur in malitiâ non aliter ac si eo animo susceperint Sacerdotium, ut vitam viverent more gentilium. Obscurato penitus splendore virtutum a densa nube servilium cupiditatum in Clericis est, tota ratio agendi immoderantia passionum. Unde carnalium affectionum vorticibus involuti apparent deformatâ facie in conspectu populi, quos ex habitu cognoscēs Clericos: si vero mores spectes, Epicureos, vitâ paganos: nam quæ Clerici quærunt, hæc gentes inquirunt. Quærunt Clerici mundi gloriam, terrenarum rerum substantiam, carnis luxuriam, & omnem, quæ in mundo est, mali concupi-

(1) Jerem. c. 5.

cupiscentiam. (1) *Omnes isti Principes declinantes, as, & ferrum: universi corrupti sunt: non est qui invocet justitiam, neque qui servet, sicuti debet, legis custodiam.*

O pristina Matris Ecclesiæ gloriosa tempora, in quibus Sacerdotes callentes ad unguem sui muneris Sacramentum apparebant populo tamquam sol universo mundo candidiores nive in puritate, nitidiores lacte in conversatione, rubicundiores ebore antiquo in charitatis virtute, saphyro pulchriores in omni charismatum genere! Sed o misera nostra tempora confessionis spiritu paria: attamen moribus admodum dissimilia! Ubi est illa morum gravitas, ubi veneranda illa animi Religiositas? Ubi illa virtutum exacta cultura? Ubi Sacerdotalis illa modestia? Ubi circumspecta illa in habitu, in gestu, in incessu, in eloquio reverenda gratia, qua sibi conciliantes populi devotionem alliciebant ad virtutem? Heu! meritó exclamare possumus cum Prophæta: (2) *Quis in vobis derelictus est, qui vidit domum hanc in gloria sua prima? & quid vos videtis hanc nunc? nunquid non ita est, quasi non sit in oculis vestris?* Proh dolor! obscurata est gloria domus Dei a malitia habitantium in ea. Dilecta perdidit pulchritudinem, & Agni Sponsa amisit compositionem dum sumpsit Clericorum incorrupta propensio in omni vitiorum genere libertatem. Fœdata est, contaminata est inverecundis Sacerdotum moribus Ecclesia Dei: perdidit in

N

Cle-

(1) Jerem. c. 6.

(2) Aggæi c. 2. v. 4.

Clero virtutem: etiam pietatis amisit speciem: mutavit in miserabili nostri temporis hora colorem. Spiritu confessionis eadem est, & fides ejus semper intacta, perpetuó pura: at Clericorum moribus longé diversa, ex diametro opposita. Sacerdotes in tempore illo non egrediebantur de domo in medium populi, nisi rationabili necessitate compulsi: cum per calles transibant, nihil nisi grave moderatum, ac Religione plenum præseferabant. Hodie vero quietis impatientes in capillatura, & habitu ad modos composito die, ac nocte circumcursant plateas, atque effuso corde per varias mundanarum rerum figuras fora, calles, & compita repetunt, atque nutantia corda miseré subeuntes profano oculo per loca populo frequentia lasciviunt. Mundi spiritu miserabiliter occupati, ut sibi concilient ab hominibus reverentiam, ut vani honoris flatum acquirant, ut humani respectus umbram lucrifaciant, modos affectatæ compositionis inveniunt aptantes non vestimenta corporibus, sed corpora vestimentis. Cum arte compositi, & foeminiliter culti priusquam egrediantur extra domum, prætereuntem imaginem considerant ad speculum: cumque extra domus limina venerint, vagari incipiunt ad se avocantes oculos insensatorum, &, quod turpius est, nutantia corda mulierum. In tempore illo cum Sæculares per callem videbant incedere Sacerdotem, si sedentes erant, omnes assurgebant, atque detractó pileo vellem ejus deosculabantur deprecantes eum.

eum: commenda nos Deo tuo. Hodie vero cum Clericum vident gradientem per callem, vel per plateam, inter se dicunt: Clericus iste vadit ad illam. Olim Sacerdotes ut divinum recitarent officium, solitudinem cogitabant, & silentium. Hodie autem videmus Clericos per frequentes Civitatis vias persolventes horas Canonicas, vel in curru cum Breviario in manu associantes foeminas, earum inservientes obsequio, & miscentes colloquium cum officio, vel super fenestras incumbentes jactantes oculos in transeuntes. In tempore illo removentes a se familiaritates, & sæculi vicissitudines Scripturarum lectioni, & orationi vacabant Sacerdotes. Hodie vero de Scripturarum lectione, de oratione, & solitudine fastidiosi tumultus amant viventes mundialium rerum negotiis involuti, relationibus, connexionibus, & familiaritatibus irretiti ad sæcularia totum referentes animum, & mortali odio prosequentes devotionis studium. Deserentes locum, in quo debet orare Sacerdos, populi compita circumcursant, ubi dissipato corde, & vagantibus oculis per ea, quæ in sæculi scena repræsentantur, adinstar insensatorum, qui peritura diligunt, inanium rerum colore pascuntur. Væ miseris! effusi sunt sicut aqua, & non crescent. Odium quietis deturbat modum debitæ conversationis. Consuetudo cum Sæcularibus reverentiam abstulit a Sacerdotibus. Cum laicis nimis familiariter agunt; cum laicis comedunt, simulque colludunt: & quia cum eis ita familiariter faciunt, assi-

duitate viluerunt. Videntur Ministri Altaris in cauponibus, in tabernis comedentes, & bibentes ultra mensuram cum hominibus sæce Reipublicæ, confabulantes de carne, donec absorpti a vino titubent linguâ, & abrupto modestiæ fræno a sordido corde eructent colloquia prava. Projiciunt post tergum statuta Patrum, qui dicunt: *Clerici edendi, vel bibendi causa tabernas non ingrediantur, nisi necessitate compulsi*, (1) Quid turpius, quid inhonestius, quam Clericus in taberna cum gente ordinaria repetens pocula? Corruo præ verecundia. Ego ipse, qui magnam Europæ partem de Corvalani deserto egressus lustravi, multa christiano pudore digna vidi. Quæ inde reverentia erga Sacerdotium? Quæ venerationis gratia, nisi Ecclesiastici Ordinis ignominia? Hinc est, quod ultra scandalum vilem patitur Ecclesia contemptum. Dehonestant hujusmodi Sacerdotes Ecclesiam Dei. (2) Sed cui va? nonne his, qui commorantur in vino, & student calicibus epotandis? Sacerdotes in tempore illo, si quid supererat temporis, in Ecclesiam conveniebant, atque populum verbo doctrinæ catechizabant. Hodie vero diem extrahunt ludentes ad chartulam pictam, & profundentes iniquo dispendio Ecclesiæ substantiam, qui solidum erogare nesciunt in pauperis eleemosynam. Conveniunt non in Ecclesiam, ut instruant, sed in Café, ut commenta enarrent, vel ut fabulas audiant: vel ut aperiant aliorum mores, & vitam. O no-

(1) Dist. 44.

(2) Prov. c. 23. v. 29.

O nostri temporis hora periculosa! Non sunt ista sicut illa fuere gloriosa tempora. Fuerunt primitivæ Ecclesiæ Sacerdotes orbis terrarum clarissima lumina. Hodie vero non sumus, nisi tenebræ, & lubricum, sive tinnientia cymbala. Abnegamus virtutem, & solam retinemus pietatis speciem. (1) Venerabilis quidam Episcopus sermonem ad Clerum faciens intimo cordis ejulatu clamabat dicens: „væ nobis, „Fratres dilectissimi, væ nobis! In tem- „pore illo calices erant cuprei, & Sacer- „dotes aurei. Nunc autem sunt calices „aurei, & Sacerdotes cuprei „. Hoc dicebat venerabilis ille Prælati in sæculo tertio. Sed quid nos, Fratres charissimi, quid nos post tot elapsa sæcula dicere possumus, qui Anti-Christo vicini jam sumus? Mundus quó magis antiquatur, & fenescit, eó in deteriora descendit: & homo, quó magis in senium provehitur, eó magis ægritudinum, atque dolorum copiâ gravatur. Igitur si Episcopus ille eo tempore sic clamabat, quo Sancta Mater Ecclesia per totum terrarum orbem sanctitate florebat, quem nos oportet edere planctum, in quos fines sæculorum deveniunt, & novissima hora est, in qua abundat malitia, & refrigescit charitas multorum? In veritate quidem dicere possumus: Calices ex auro gemmis ornati, & Sacerdotes lutei: calices ex pretiosa materia, & Sacerdotes phantasmata. Væ nobis, Fratres mei, væ nobis: omnis com-

N 3

po-

(1) In Vitis PP.

†

positio nostra ablata est (1). Pulchritudo nostra, & claritas nostra desolata est. (2) Obscuratum est aurum: mutatus est color optimus: in vasa testea opus manuum figuli conversi sumus. Denigrata est super carbones facies nostra, & non sumus cogniti in plateis. A capite aureo descendimus in tibias luteas, in pedes fictiles rumpi faciles. (3) Pristinus ille calor, qui ferbuit fovens primitivam Ecclesiam, conversus est in levem favillam, atque ignis ille missus de Coelo, & absconditus in terra versus est in aquam crassam. O tempora! (4) si rerum raritas pretium facit, nihil pretiosius in Ecclesia Dei bono, utilique Clerico: rara avis in terris, nigroque simillima cygno. Sunt iusti, atque sapientes: Ecclesia namque esse non potest sine iustis (5). sed habes pauca nomina in Sardis. Omnes declinaverunt: simul inutiles facti sunt. Non est, qui invocet iustitiam, neque qui sermō inducat animum ad virtutis sequelam. Sed omnes eō tendunt, ut rem hauriant ex Tabernaculo, qua propria voluntas satisfieri possit obsequio. O Fratres mei dilectissimi, quid dicerent, si de sarcophago, in quo jacent, prodirent Apostoli, & viderent Ecclesiasticum Statum conversum in pharisaismum? Quid dicerent, si viderent Clericos magnificantes fimbrias, dilatantes phylacteria, amantes primas cathedra-

(1) Mach. I. c. 2.

(2) Jerem. Thren.

(3) Machab. 2. c. 1.

(4) S. Bernar. sup. Cant.

(5) Apocal.

thedras, ambientes honorem, & captantes auram popularem? Quid dicerent, si viderent, quod materialis substantia transferit in rei summam, & opus Dignitatis in ceremoniam? Quid dicerent si viderent Clericos ædificantes palatia, ementes oppida, procedentes in aurato curru cum majestate regia sequente post tergum fervorum copiosâ turbâ, atque incolatum explentes in vita delicata? Quid dicerent, si Clericum viderent diversicolore habitu indutum equo strenuè phalerato infidentem per medium populum lascivire non jam Sacerdotem, sed Militarem; non jam Ministrum Christi, sed Anti-Christi? Quam, quæso, sibi fingit ideam de Ecclesiastica perfectione Clericus, qui habitu Clericali deposito, & militarem habitum induens pretiosè ornatum equum ascendit, fræno, & calcaribus ex auri pallore præclarè renitentibus, sellæ equestris ex aureo, vel argenteo filo pretiosè elaboratâ fimbriâ, per loca populo frequentia deambulat obiectum admirationis, prodigium vanitatis? Clericus iste cum ita gloriosius procedit in publicum, ait esse fabulam Evangelium, & paradoxon, quod nobis promittitur in futurum. Quid demum dicerent Sanctissimi Apostoli, si de tumulo caput leverent, & viderent, quod Sacerdotes Phariseos longè superent? Jejunabant bis in Sabbato Pharisei: Clerici autem contemnentes hæc arma justitiæ in epulis, in conviviiis assuescunt delicias habere, donec gravata patiantur corda in crapula, & ebrietate. Extendebant palmas suas ad

peu-

pauperem Pharisei propter vanam gloriam. Clerici vero manus abscondunt propter avaritiam. Erant Pharisei in Templo longas orationes orantes. At Clerici non solum non longas, sed neque breves. Pharisei foris erant dealbata sepulchra. Clerici autem quod intus habent, apparet extra. Igitur in eo differunt Clerici a Phariseis, quod Pharisei hypocritæ erant: sed Clerici scandalizant.

(1) O nostri sæculi infelix hora! O nimis calamitosa tempora, in quibus non solum non apparet in Clero debita sanctimonia, sed neque iustitia: imo potius sine conscientiae remorsu vivendi prævalet arrogantia, adinstar gentium vita jucunda, atque in Christi opprobrium, & animarum flebile detrimentum morum licentia, vita scandalosa. Minimè cogitantes, quia domus Dei sunt, quam decet sanctitudo, neque ponentes in præcordiis talia, quod corpora eorum sint Spiritus Sancti Templum, & anima siquidem Corporis, & Sanguinis Christi Sacrarium, Templum Domini profanis abominationibus violant, atque abalienati retrorsum animas suas carnalium affectionum vix intermissâ sordè corrumpunt. Passim occurrunt de Clero (quod non sine vivo ab imis visceribus ducto dolore dicere possumus), qui repulsâ cum infamia tantæ Dignitati debitâ reverentiâ, Clericalisque verecundiæ jam larvâ depositâ diffunduntur meretriciâ fronte per enormia crimina deducentes animas suas in interitum, atque populo
Dei

(1) Secunda plaga.

Dei fatale parantes scandalum . Utinam oculus non videret, quæ amaré plangeret: sed nondum oculos aperimus, cum jam jam perpetuo digna ejulatu iniqua, & infanda a Clericis perpetrari videmus . Videmus (heu ! heu !) quamplurimos Altaris Ministros sic iniqué, & turpiter vivere, ut dici queat Sacerdotale suscepisse Ministerium potius ad funestam ruinam multorum, quam ad salutem animarum, cum tot indigna relatu palam gerentes, minimos, qui in Christo credunt, deducunt in profundum . (1) *Insolentia Clericorum*, cujus Mater est negligentia Episcoporum, ubique terrarum turbat, & molestat Ecclesiam . Dant Episcopi Sanctum canibus, & margaritas *porcis*, dum ullo absque timore, sed arrogantis animi libertate per illicita desideria carnis opera perficientes gloriantur in malitia auctores iniquitatum vitæ scandalo trucidantes animas parvulorum . A Clericis discunt laici vitæ superbiam, sæculi pompam, carnis luxuriam, injuriarum vindictam, atque intendentes oculos ebibunt avaritiæ pestilentem aquam: cumque edocere deberent populos elementa virtutis, conversâ rota nativitatis Scholam aperiunt miseræ perditionis . Unde queritur Dominus per Jeremiam: (1) *Pastores multi demoliti sunt vineam meam* . Facti sunt filii mei perditionis, lamentatur Ecclesia, atque de filiis in infensissimos hostes commutati dum inverecundis moribus a me temeré tentant auferre

(1) S. Bernar. in ep. ad Ilnoc. PP.

(2) G. 12, v. 10.

ferre pulchritudinem, totamque de medio tollere compositionem. Non latrones, & homicidæ sic contribulant animam meam. Ipsi potius causa sunt gemitus, & amaritudinis, qui adstrictius reliquis portantur ad ubera Matris. Ipsi, qui edunt panes meos, dum sibi instituunt vitæ libertatem, magnificant super me supplantationem: nam videntes laici in Clericis vitæ laxissimum inde assumunt sine remorsu pravitatis exemplum, ut liberè manus extendant ad opera tenebrarum: dicunt enim: si Clerici, qui nobis in speculum positi sunt, in quos oculos conijcere debemus, ut actus nostros componamus, hæc, & illa faciunt, quare nos eadem facere non possumus? Hinc est, Fratres dilectissimi, quod hodie (1) *populum videmus nugacem*, carnalem, luxuriis deditum, vitiorum cœno involutum, eo quod tales habeat Sacerdotes. Non est jam dicere *sicut populus sic Sacerdos*: sed potius *sicut Sacerdos sic populus*: & ut ita dicam, non sic populus ut Sacerdos, quia non ita pessimè vivunt Sæculares ut Sacerdotes. Corrupta est in populis morum disciplina, liberrimæ vitæ prævalet arrogantia, morum dominatur effrænata licentia. Sed unde oborta sunt hæc in populo detrimenta? A Sacerdotum scandalosa vita: (2) *causa enim sunt ruina populi Sacerdotes mali*. O Deus altissime! quid fiet de Clericis, qui cum populo præbere debeant exempla virtutum perversis actibus *confortant manus* pes-

(1) S. Gregor. M.

(2) Idem Greg.

peffimorum? Quid de Presbyteris, qui frontosâ pravitatis audaciâ nulla exhibent exempla virtutis, sed populo præbent pabula mortis? Expediſt eis, ut ſuspendatur mola aſinaria in collo eorum, & demergantur in profundum Maris. Non mirum, Fratres mei, non mirum, ſi plebs Chriſtiana ab inſtituti rectitudine devia procedat, cum linea, ſeu forma ſe curvam, & tortuoſam exhibeat. O Clerici, vos eſtis lux mundi, qui accepitſtis Miniſterium, ut ſanctè Sanctum offeratis Sacrificium, atque verbo, & exemplo illuminetis mentes hominum? Non lux mundi, ſed potius tenebræ, quibus laici jacent hodie miſerabiliter involuti. Heu popule Dei, ſi lumen, quod in te eſt, tenebræ ſunt, tenebræ tuæ quantæ erunt? Idcirco quia Clerici exuentes arma lucis a vigore paſſionum amplexantur opera tenebrarum, quia via eorum tenebroſa, quia impudenter ſe gerunt contra Sacrorum Canonum inſtituta, facta eſt nox in plebe Chriſtiana, in qua a malitia Clericorum ex duobus his unum, vel idiotaiſmus in doctrina, vel laxiſmus in conſcientia. Et vos eſtis ſal terræ, qui confricatione virtutum reſervatis animas a putredine peccatorum? Potius offenſionis petra in miſeram ſtragem animarum. Heu heu! vellem potius deducere quaſi torrentem lacrymas, & aduſque extremum vitæ ſpiraculum ebibere fletus amaritudinem, quam de ſcandaloiſis Clericorum moribus habere ſermonem. Etenim dolor occupat linguæ facultatem, atque cordis mei juche lamentum

tum vocis obturat organum. Video, & vident omnes (quia quæ palam fiunt, latere non possunt) Ecclesiasticum Statum in deplorabili statu constitutum. Omne caput languidum, & omne cor mœrens, enervata virtus in corpore, corpus deficiens virtute, & ut propheticiis verbis utar, *a planta pedis usque ad verticem capitis non est in Ecclesia Dei sanitas: sed livor, & plaga tumens, quæ neque est circumligata, nec curata medicamine, nec fota oleo, sed plaga quasi desperabilis.* (1) Omnes amici, & omnes inimici: omnes necessarii, & omnes adversarii: omnes proximi, & nulli pacifici: omnes domestici, & fideles nulli: ut impleatur, quod per Prophætam dicitur; *amici mei, & proximi mei adversum me appropinquaverunt, & steterunt:* (2). Plorans plorat in nocte Jesu Christi Ecclesia, atque oppressa amaritudine gemit quasi turtur solitaria: *facta est in pace amaritudo mea amarissima.* Amara in nece Martyrum: amarior in conflictu hæreticorum: amarissima in dissoluta, & procaci vita Clericorum. O me nimium dolentem! Si inimicus meus, si Turcarum Princeps, si Lutherani, si Calvinistæ, & reliqui Novatores maledixissent mihi, sustinuissem utique, & abscondissem me forsitan ab eis. Sed a Sacerdotibus, qui sedent super mensam meam, & gravio rem mihi inferunt injuriam, ubi me abscondam? O dilectissima Mater Ecclesia, magna est velut mare contritio tua! Foves in

(1) S. Bernar.

(2) Psalm. 37.

in gremio multos non commensales, sed canes Nutris multos non amicos fideles, sed scorpiones. (1) Sed quis consolabitur te? Solus ille, qui dicit: ecce ego mittam in vos egestatem, & maledicam benedictionibus vestris, & maledicam illis, quoniam non posuistis super cor, ut daretis gloriam nomini meo. Ecce ego proijciam vobis brachium, & dispergam super vultum vestrum stercus solemnitatum vestrarum; & scietis, quia misi ad vos mandatum istud, ut esset pactum meum cum Levi. Vos autem recessistis de via & scandalizastis plurimos in Lege, & irritum fecistis pactum meum. Propterea dedi vos contemptibiles, & humiles in omnibus populis, sicut non servastis vias meas. (2) *Vae* Pastoribus, qui vita scandalo disperdunt, & dilacerant gregem pascuæ meæ. Vos, Sacerdotes dispersistis gregem meum: & ego visitabo super vos malitiam studiorum vestrorum.

Adversus Sacerdotes, Fratres dilectissimi, fremit ira furoris Dei, atque super Altaris Ministros vigilat virga indignationis suæ: ipsi enim prolongantes iniquitatem, & adaugentes malitiam exasperant Dei patientiam, atque justum Judicem provocant ad iracundiam. Transilientes terminos debitæ conversationis præcipitem sequuntur gyrum sapientiæ carnis, cum contumelia virtutis. In aliis palam notatur vita gloriosa, in aliis venerea, in aliis de mundo sollicita, in aliis dissoluta, in aliis politica, in aliis miscellanea, & pene in omnibus ab instituto prorsus aliena.

O

Unus.

(1) Malachiæ c. 1.

(2) Jerem. c. 23.

Unusquisque coram facie sua ambulat: Omnes ubi est impetus carnis eorum, illic gradiuntur: neque revertuntur, cum incedunt. Unusquisque sibi retinet vitam secundum quam sibi fingit ideam: atque arbitratur se benè incedere per illum tragem, cujus novissima deducunt ad mortem. Speciosâ illusi opinione, quæ robur obtinuit a carne, nullum de inordinata vita patiuntur scrupulum, sed ac si tuti, & securi, in Fortis armati pace conquiescunt. Hinc est, Fratres mei, quod Sacerdotes ad Altare offerentes irritant Dominum, quia ut Agnum offerant immaculatum, non sacrificant iustitiæ Sacrificium. Unde ait Dominus per Jeremiam: (1) *ut quid mihi thus de Saba affertis, & calamum suave olentem de terra longinqua? Holocausta stomata vestra non sunt accepta, & victimæ vestra non placuerunt mihi.* Imo de Sacrificio, quod offerunt, hauriunt mortale venenum. Iniqua gerimus, Fratres, in terra Sanctorum. Profanamus perversis moribus Sanctuarium: idcirco percutit nos Dominus cœcitate, ne videamus præruptas semitas nostræ concupiscentiæ, neque viam iustitiæ. Quod si, Dominus ad suam Bonitatem non respexisset in misericordia, jam diu abstulisset a nobis divina Sacramenta, & translato Sacerdotio dedisset genti facienti fructus ejus in abundantia. Non temerè dico, Fratres, sed ut affectus sum, ac sentio, loquor: perspectâ seriò sanctimonia, quam exigit institutum, atque itidem seriò consideratâ vivendi ratio

(1) C. 6. v. 20.

tionē, quam communiter tenet universitas Clericorum, Deo gratias agamus, si ex decem Sacerdotibus salvetur unus. Nolite mirari, si talem proferam ab ore sententiam. Dixit quidam, in cujus ore Spiritus Dei erat: (1) Si contingat, ut unus de Sacerdotibus in Cœlum ascendat, lætabundi Angeli adinvicem colloquuntur dicentes: gaudeamus, & exultemus, quoniam post tot annorum curricula de Sacerdotibus solus iste Cœlum intravit. Difficile quidem est Sacerdotem, qui in conspectu hominum optimus esse videtur, Cœlum intrare; quanto difficilius eos, qui immemores mandatorum Dei ad faciendum ea, sobriē, justē, & piē nesciunt vivere? Sed quis est iste optimus, & laudabimus eum? Prophæta respondit: *Periit Sanctus de terra, & rectus in hominibus non est. Qui optimus est in eis, quasi palicurus: & qui rectus, quasi spina de sepe.*

O Domine, multiplicasti gentem, sed non magnificasti lætitiā! (2) Multi Sacerdotes, sed pauci Sacerdotes. Multi in nomine, sed pauci in opere. Multæ revera sunt, & pessimæ abominationes, quas faciunt Sæculares. Sed adhuc conversi videmus abominationes majores his in Atrio domus Domini interius. (3) Videmus in ostio Templi Domini inter vestibulum, & altare viros dorsa habentes contra Templum Domini, & facies ad

O 2

Orien-

(1) S. Vincent. Ferrerius in serm. de omnibus Sanctis.

(2) Joan. Chris.

(3) Ezech. c. 8. t. 16. & seq.

Orientem, & adorantes ad ortum Solis. Numquid leve est hoc, ut Sacerdotes faciant abominationes istas, quia replentes terram iniquitate conversi sunt ad irritandum Dominum? Et ecce applicant ramum ad nares suas. Ergo & ego faciam in furore; ait Dominus: non parceret oculus meus, nec miserebor: & cum clamaverint ad aures meas voce magnâ, non exaudiam eos. (1) Secundum multitudinem eorum sic peccaverunt mihi. Gloriam eorum in ignominiam commutabo. Discedite a me omnes, qui in circuitu meo pollutis manibus offertis munera. (2) Non est voluntas mihi in vobis, & munus non suscipiam de manu vestra. (3) Audite, qui domos quadro lapide ædificatis: qui dormitis in lectis eburneis: et lascivitis in stratis vestris: qui comeditis agnum de grege, & vitulos de medio armenti: qui canitis ad vocem psalterii bibentes vinum in phyalis, gaudentes ad sonitum Organi, audite: ambulastis secundum desideria cordis vestri, & nihil vobis accidit triste. Sed juxta est dies perditionis, & adesse festinant tempora. Non tardat dies meus, in quo excitabor tamquam dormiens, tamquam potens crapulatus a vino, & quasi parturiens loquar in ira mea, & conturbabo vos in furore meo. Agite nunc dies vestros in inani cordis vestri lætitia. Distendatur secundum carnem voluptas in complacentia: qui in sordibus est, sordescat

(1) Osee c. 4.

(2) Malach. c. 1.

(3) Amos c. 6.

seat adhuc: gloriâmini in pompa: coronate vos rosis, & non sit pratum, quod non pertranseat luxuria vestra: quia prope est dies, ut succidatur ficulnea: & lignum in quocumque loco ceciderit, ibi erit.

O Pater Sancte, cujus voluntas benignitate sua privari non potest, habes autem pedes tuos confitentes reos. Ne declines in ira a servis tuis. Provocavimus te ad iracundiam irritum facientes pactum ob elati cordis nostri superbiam. Sed tu, Domine, attende de Cœlo, & vide de habitaculo sancto tuo, quia sumus fragiles, infirmi, & lutea vasa portantes. Confitemur humiles ante Solium gloriæ tuæ contra te Patrem nostrum impiè recalcitrasse, insipienter egisse: idcirco abscondis faciem tuam a nobis, & allidis nos in manu iniquitatis nostræ. Et nunc Domine Pater, opera manuum tuarum omnes nos. Ne irascaris, Domine, satis, & ne ultra memineris iniquitatis nostræ. Sed effunde super nos desuper misericordiam, & largire gratiam, ut Sacerdotes tui induantur iustitiam. Ecce cecidimus quasi folium universi, & iniquitates nostræ quasi ventus abstulerunt nos. Convertere, Domine, super servos tuos, tribus hæreditatis tuæ; & ne scribas stylo ferreo peccata nostra, sed munda, sana, lava, & exaltare parcens nobis in miserationibus tuis multis, ut tibi cum Sanctis tuis gloriosè cantemus per infinita sæcula. Amen.

Finis I. Part.

HAG 2011718

